

OVIDE

HEROIDES (3992 vers)

PENELOPE ULIXI

H_1 v.1 Haec tua Penelope lento tibi mittit, Ulixè ;
 2 nil mihi rescribas attinet ; ipse veni.
 3 Troja jacet certe, Danaïs invisâ puellis ;
 4 vix Priamus tanti totaque Troja fuit.
 5 O utinam tum, cum Lacedaemona classe petebat,
 6 obrutus insanis esset adulter aquis !
 7 Non ego deserto jacuissem frigida lecto ;
 8 non quererer tardos ire relictâ dies
 9 nec mihi quaerenti spatiosam fallere noctem
 10 lassaret viduas pendula tela manus.
 11 Quando ego non timui graviora pericula veris ?
 12 Res est solliciti plena timoris amor.
 13 In te fingebam violentos Troas ituros ;
 14 nomine in Hectoreo pallida semper eram.
 15 Sive quis Antilochum narrabat ab hoste revictum,
 16 Antilochus nostri causa timoris erat,
 17 sive Menoetiaden falsis cecidisse sub armis,
 18 flebam successu posse carere dolos.
 19 Sanguine Tlepolemus Lyciam tepefecerat hastam ;
 20 Tlepolemi leto cura novata mea est.
 21 Denique, quisquis erat castris jugulatus Achivis,
 22 frigidius glacie pectus amantis erat.
 23 Sed bene consuluit casto deus aequus amorî :
 24 versa est in cineres sospite Troja viro.
 25 Argolici rediere duces ; altaria fumant ;
 26 ponitur ad patrios barbara praeda deos.
 27 Grata ferunt nymphae pro salvis dona maritis,
 28 illi victa suis Troica fata canunt.
 29 Mirantur lassique senes trepidaeque puellae ;
 30 narrantis conjunx pendet ab ore viri,
 31 atque aliquis posita monstrat fera proelia mensa
 32 pingit et exiguo Pergama tota mero :
 33 "Hac ibat Simois, haec est Sigeia tellus ;
 34 hic steterat Priami regia celsa senis ;
 35 illic Aeacides, illic tendebat Ulixes ;
 36 hic alacer missos terruit Hector equos."
 37 Omnia namque tuo senior te quaerere misso
 38 rettulerat nato Nestor, at ille mihi.
 39 Rettulit et ferro Rhesumque Dolonaque caesos,
 40 utque sit hic somno proditus, ille dolo.
 41 Ausus es, o nimium nimiumque oblite tuorum,
 42 Thracia nocturno tangere castra dolo
 43 totque simul mactare viros, adjutus ab uno.
 44 At bene cautus eras et memor ante mei !
 45 Usque metu micuere sinus, dum victor amicum
 46 dictus es Ismariis isse per agmen equis.
 47 Sed mihi quid prodest vestris disjecta lacertis

48 Ilios, et, murus quod fuit, esse solum,
 49 si maneo qualis Troja durante manebam
 50 virque mihi dempto fine carendus abest ?
 51 Diruta sunt aliis, uni mihi Pergama restant,
 52 incola captivo quae bove victor arat.
 53 Jam seges est, ubi Troja fuit, resecandaque falce
 54 luxuriat Phrygio sanguine pinguis humus ;
 55 semisepulta virum curvis feriuntur aratris
 56 ossa ; ruinosas occulit herba domos.
 57 Victor abes nec scire mihi quae causa morandi
 58 aut in quo lateas ferreus orbe, licet.
 59 Quisquis ad haec vertit peregrinam litora puppim,
 60 ille mihi de te multa rogatus abit,
 61 quamque tibi reddat, si te modo viderit usquam,
 62 traditur huic digitis charta notata meis.
 63 Nos Pylon, antiqui Neleia Nestoris arva,
 64 misimus ; incerta est fama remissa Pylo.
 65 Misimus et Sparten ; Sparte quoque nescia veri.
 66 Quas habitas terras aut ubi lentus abes ?
 67 Utilius starent etiamnunc moenia Phoebi
 68 (irascor votis heu ! levis ipsa meis).
 69 Scirem, ubi pugnares et tantum bella timerem
 70 et mea cum multis juncta querela foret.
 71 Quid timeam, ignoro ; timeo tamen omnia demens
 72 et patet in curas area lata meas.
 73 Quaecumque aequor habet, quaecumque pericula tellus,
 74 tam longae causas suspicor esse morae.
 75 Haec ego dum stulte metuo, quae vestra libido est,
 76 esse peregrino captus amore potes ;
 77 forsitan et narres quam sit tibi rustica conjunx,
 78 quae tantum lanas non sinat esse rudes.
 79 Fallar, et hoc crimen tenues vanescat in auras,
 80 neve, revertendi liber, abesse velis !
 81 Me pater Icarius viduo discedere lecto
 82 cogit et immensas increpat usque moras.
 83 Increpet usque licet ! tua sum, tua dicar oportet ;
 84 Penelope conjunx semper Ulixis ero.
 85 Ille tamen pietate mea precibusque pudicis
 86 frangitur et vires temperat ipse suas.
 87 Dulichii Samiique et quos tulit alta Zacynthos
 88 turba ruunt in me luxuriosa proci
 89 inque tua regnant nullis prohibentibus aula ;
 90 viscera nostra, tuae dilacerantur opes.
 91 Quid tibi Pisandrum Polybumque Medontaque dirum
 92 Eurymachique avidas Antinoique manus
 93 atque alios referam, quos omnis turpiter absens
 94 ipse tuo partis sanguine rebus alis ?
 95 Irus egens pecorisque Melanthius actor edendi
 96 ultimus accedunt in tua damna pudor.
 97 Tres sumus inbelles numero, sine viribus uxor
 98 Laertesque senex Telemachusque puer.
 99 Ille per insidias paene est mihi nuper ademptus,
 100 dum parat invitis omnibus ire Pylon.
 101 Di, precor, hoc jubeant, ut euntibus ordine fatis
 102 ille meos oculos conprimat, ille tuos.
 103 Hac faciunt custosque boum longaevaeque nutrix,
 104 tertius immundae cura fidelis harae.
 105 Sed neque Laertes, ut qui sit inutilis armis,

106 hostibus in mediis regna tenere potest,
 107 [Telemacho veniet, vivat modo, fortior aetas :
 108 nunc erat auxiliis illa tuenda patris] ;
 109 nec mihi sunt vires inimicos pellere tectis.
 110 Tu citius venias, portus et ara tuis !
 111 Est tibi sitque, precor, natus, qui mollibus annis
 112 in patrias artes erudiendus erat.
 113 Respice Laerten ; ut tu sua lumina condas,
 114 extremum fati sustinet ille diem.
 115 Certe ego, quae fueram te discedente puella,
 116 protinus ut venias, facta videbor anus.

PHYLLIS DEMOPHOONTI

H_2 v.1 Hospita, Demophoon, tua te Rhodopeia Phyllis
 2 ultra promissum tempus abesse queror.
 3 Cornua cum lunae pleno semel orbe coissent,
 4 litoribus nostris ancora pacta tua est ;
 5 luna quater latuit, toto quater orbe recrevit,
 6 nec vehit Actaeas Sithonis unda rates.
 7 Tempora si numeres (bene quae numeramus amantes),
 8 non venit ante suam nostra querela diem.
 9 Spes quoque lenta fuit ; tarde, quae credita laedunt,
 10 credimus. Invita nunc es amante nocent.
 11 Saepe fui mendax pro te mihi, saepe putavi
 12 alba procellosos vela referre Notos.
 13 Thesea devovi, quia te dimittere nollet ;
 14 nec tenuit cursus forsitan ille tuos.
 15 Interdum timui ne, dum vada tendis ad Hebri,
 16 mersa foret cana naufraga puppis aqua.
 17 Saepe deis supplex, ut tu, scelerate, valeres,
 18 [cum prece turicremis sum venerata sacris ;
 19 saepe, videns ventos caelo pelagoque faventes,]
 20 ipsa mihi dixi : "Si valet ille, venit."
 21 Denique fidus amor quidquid properantibus obstat
 22 finxit et ad causas ingeniosa fui.
 23 At tu lentus abes, nec te jurata reducunt
 24 numina, nec nostro motus amore redis.
 25 Demophoon, ventis et verba et vela dedisti :
 26 vela queror reditu, verba carere fide.
 27 Dic mihi, quid feci, nisi non sapienter amavi ?
 28 Crimine te potui demeruisse meo.
 29 Unum in me scelus est, quod te, scelerate, recepi,
 30 sed scelus hoc meriti pondus et instar habet.
 31 Jura, fides ubi nunc commissaque dextera dextrae,
 32 quique erat in falso plurimus ore deus ?
 33 Promissus socios ubi nunc Hymenaeus in annos,
 34 qui mihi conjugii sponsor et obses erat ?
 35 Per mare, quod totum ventis agitatur et undis,
 36 per quod nempe ieras, per quod iturus eras,
 37 perque tuum mihi jurasti, nisi fictus et ille est,
 38 concita qui ventis aequora mulcet, avum,
 39 per Venerem nimiumque mihi facientia tela,
 40 altera tela arcus, altera tela faces,
 41 Junonemque, toris quae praesidet alma maritis,
 42 et per taediferae mystica sacra deae.

43 Si de tot laesis sua numina quisque deorum
 44 vindicet, in poenas non satis unus eris.
 45 At laceras etiam puppes furiosa refeci,
 46 ut, qua desererer, firma carina foret,
 47 remigiumque dedi, quo me fugiturus abires.
 48 Heu ! patior telis vulnera facta meis !
 49 Credidimus blandis, quorum tibi copia, verbis ;
 50 credidimus generi nominibusque tuis,
 51 credidimus lacrimis ; an et hae simulare docentur
 52 hae quoque habent artes quaque jubentur eunt ?
 53 Dis quoque credidimus. Quo jam tot pignora nobis ?
 54 Parte satis potui qualibet inde capi.
 55 Nec moveor quod te juvi portuque locoque :
 56 debuit haec meriti summa fuisse mei.
 57 Turpiter hospitium lecto cumulasse jugali
 58 paenitet, et lateri conseruisse latus.
 59 Quae fuit ante illam, malletem suprema fuisset
 60 nox mihi, dum potui Phyllis honesta mori.
 61 Speravi melius, quia me meruisse putavi ;
 62 quaecumque ex merito spes venit, aequa venit.
 63 Fallere credentem non est operosa puellam
 64 gloria ; simplicitas digna favore fuit.
 65 Sum decepta tuis et amans et femina verbis ;
 66 Di faciant laudis summa sit ista tuae.
 67 Inter et Aegidas media statuaris in urbe,
 68 magnificus titulis stet pater ante suis.
 69 Cum fuerit Sciron lectus torvusque Procrustes
 70 et Sinis et tauri mixtaque forma viri
 71 et domitae bello Thebae fusique bimembres
 72 et pulsata nigri regia caeca dei,
 73 hoc tua post illos titulo signetur imago :
 74 "Hic est, cujus amans hospita capta dolo est."
 75 De tanta rerum turba factisque parentis
 76 sedit in ingenio Cressa relicta tuo ;
 77 quod solum excusat, solum miraris in illo ;
 78 heredem patriae, perfide, fraudis agis.
 79 Illa (nec invideo) fruitur meliore marito
 80 inque capistratis tigribus alta sedet.
 81 At mea despecti fugiunt conubia Thraces,
 82 quod ferar externum praeposuisse meis.
 83 Atque aliquis "jam nunc doctas eat, inquit, Athenas ;
 84 armiferam Thracen qui regat, alter erit".
 85 Exitus acta probat ? Careat successibus, opto,
 86 quisquis ab eventu facta notanda putat.
 87 At si nostra tuo spumescant aequora remo,
 88 jam mihi, jam dicar consuluisse meis.
 89 Sed neque consului, nec te mea regia tanget
 90 fessaque Bistonia membra lavabis aqua.
 91 Illa meis oculis species abeuntis inhaeret,
 92 cum premeret portus classis itura meos.
 93 Ausus es amplecti colloque infusus amantis
 94 oscula per longas jungere pressa moras
 95 cumque tuis lacrimis lacrimas confundere nostras,
 96 quodque foret velis aura secunda queri
 97 et mihi discedens suprema dicere voce :
 98 "Phylli, fac expectes Demophonta tuum."
 99 Expectem, qui me numquam visurus abisti ?
 100 Expectem pelago vela negante tamen ?

101 Et tamen expecto. Redeas modo serus amanti,
 102 ut tua sit solo tempore lapsa fides.
 103 Quid precor infelix ? Te jam tenet altera conjunx
 104 forsitan et, nobis qui male favit, Amor,
 105 utque tibi excidimus, nullam, puto, Phyllida nosti.
 106 Ei mihi, si quae sim Phyllis et unde rogas,
 107 quae tibi, Demophoon, longis erroribus acto
 108 Threicios portus hospitiumque dedi,
 109 cujus opes auxere meae, cui dives egenti
 110 munera multa dedi, multa datura fui,
 111 quae tibi subjeci latissima regna Lycurgi,
 112 nomine femineo vix satis apta regi,
 113 [qua patet umbrosum Rhodope glacialis ad Haemum,
 114 et sacer admissas exigit Hebrus aquas],
 115 cui mea virginitas avibus libata sinistris
 116 castaque fallaci zona recincta manu.
 117 Pronuba Tisiphone thalamis ululavit in illis
 118 et cecinit maestum devia carmen avis.
 119 Adfuit Allecto brevibus torquata colubris,
 120 suntque sepulcrali lumina mota face.
 121 Maesta tamen scopulos fluctuosaque litora calco
 122 quaque patent oculis litora lata meis,
 123 sive die laxatur humus, seu frigida lucent
 124 sidera, prospicio quis freta ventus agat,
 125 et quaecumque procul venientia lintea vidi,
 126 protinus illa meos auguror esse deos.
 127 In freta procurro, vix me retinentibus undis,
 128 mobile qua primas porrigit aequor aquas.
 129 Quo magis accedunt, minus et minus utilis adsto ;
 130 linquor et ancillis excipienda cado.
 131 Est sinus, adductos modice falcatus in arcus ;
 132 ultima praerupta cornua mole rigent ;
 133 hinc mihi suppositas immittere corpus in undas
 134 mens fuit, et, quoniam fallere pergis, erit.
 135 Ad tua me fluctus projectam litora portent
 136 occurramque oculis intumulata tuis.
 137 Duritia ferrum ut superes adamantaque teque :
 138 "Non tibi sic," dices, "Phylli, sequendus eram."
 139 Saepe venenorum sitis est mihi, saepe cruenta
 140 trajectam gladio morte perire juvat ;
 141 colla quoque, infidis quia se nectenda lacertis
 142 praebuerunt, laqueis implicuisse juvat.
 143 Stat nece matura tenerum pensare pudorem ;
 144 in necis electu parva futura mora est.
 145 Inscribere meo causa invidiosa sepulcro ;
 146 aut hoc aut simili carmine notus eris :
 147 "Phyllida Demophoon leto dedit hospes amantem ;
 148 ille necis causam praebuit, ipsa manum."

BRISEIS ACHILLI

H_3 v.1 Quam legis, a rapta Briseide littera venit,
 2 vix bene barbarica Graeca notata manu.
 3 Quascumque adspicies, lacrimae fecere lituras ;
 4 sed tamen et lacrimae pondera vocis habent.
 5 Si mihi pauca queri de te dominoque viroque

6 fas est, de domino pauca viroque querar.
7 Non, ego poscenti quod sum cito tradita regi,
8 culpa tua est, quamvis haec quoque culpa tua est.
9 Nam simul Eurybates me Talthybiosque vocarunt,
10 Eurybati data sum Talthybioque comes ;
11 alter in alterius jactantes lumina vultum
12 quaerebant taciti noster ubi esset amor.
13 Differri potui ; poenae mora grata fuisset.
14 Ei mihi ! discedens oscula nulla dedi,
15 at lacrimas sine fine dedi rupique capillos.
16 Infelix ! iterum sum mihi visa capi.
17 Saepe ego decepto volui custode reverti,
18 sed me qui timidam prenderet, hostis erat ;
19 si progressa forem, caperer ne, nocte, timebam,
20 quamlibet ad Priami munus itura nurum.
21 Sed data sim, quia danda fui. Tot noctibus absum
22 nec repetor ; cessas, iraque lenta tua est.
23 Ipsa Menoetiades, tum cum tradebar, in aures :
24 "Quid fles ? hic parvo tempore," dixit, "eris."
25 Nec repetisse parum ; pugnas ne reddar, Achille.
26 I nunc et cupidi nomen amantis habe.
27 Venerunt ad te Telamone et Amyntore nati,
28 ille gradu propior sanguinis, ille comes,
29 Laertaque satus, per quos comitata redirem.
30 Auxerunt blandas grandia dona preces,
31 viginti fulvos operoso ex aere lebetas
32 et tripodas septem pondere et arte pares ;
33 addita sunt illis auri bis quinque talenta,
34 bis sex adsueti vincere semper equi,
35 quodque supervacuum est, forma praestante puellae
36 Lesbides, eversa corpora capta domo,
37 cumque tot his (sed non opus est tibi conjuge) conjunx
38 ex Agamemnoniis una puella tribus.
39 Si tibi ab Atride pretio redimenda fuisses,
40 quae dare debueras, accipere illa negas.
41 Qua merui culpa fieri tibi vilis, Achille ?
42 Quo levis a nobis tam cito fugit amor ?
43 An miseros tristis fortuna tenaciter urget,
44 nec venit inceptis mollior hora meis ?
45 Diruta Marte tuo Lyrnesia moenia vidi
46 (et fueram patriae pars ego magna meae) ;
47 vidi consortes pariter generisque necisque
48 tres cecidisse (tribus, quae mihi, mater erat) ;
49 vidi, quantus erat, fustum tellure cruenta
50 pectora jactantem sanguinolenta virum.
51 Tot tamen amissis te compensavimus unum ;
52 tu dominus, tu vir, tu mihi frater eras,
53 tu mihi, juratus per numina matris aquosae,
54 utile dicebas ipse fuisse capi,
55 scilicet ut, quamvis veniam dotata, repellas
56 et mecum fugias, quae tibi dantur, opes.
57 Quin etiam fama est, cum crastina fulserit Eos,
58 te dare nubiferis lintea velle Notis.
59 Quod scelus ut pavidas miserae mihi contigit aures,
60 sanguinis atque animi pectus inane fuit.
61 Ibis et o ! miseram cui me, violente, relinques ?
62 Quis mihi desertae mite levamen erit ?
63 Devorer ante, precor, subito telluris hiatus

64 aut rutilo missi fulminis igne cremer,
65 quam sine me Phthiis canescant aequora remis
66 et videam puppes ire relictas tuas !
67 Si tibi jam reditusque placent patriique Penates,
68 non ego sum classi sarcina magna tuae.
69 Victorem captiva sequar, non nupta maritum ;
70 est mihi, quae lanas molliat, apta manus.
71 Inter Achaeiadas longe pulcherrima matres
72 in thalamos conjunx ibit eatque tuos,
73 digna nurus socero, Jovis Aeginaeque nepote,
74 cuique senex Nereus prosocer esse velit.
75 Nos humiles famulaeque tuae data pensa trahemus,
76 et minuent plenas stamina nostra colos.
77 Exagitet ne me tantum tua, deprecor, uxor,
78 quae mihi nescio quo non erit aequa modo,
79 neve meos coram scindi patiare capillos
80 et leviter dicas : "Haec quoque nostra fuit."
81 Vel patiare licet, dum ne contempta relinquir.
82 Hic mihi vae ! miserae concutit ossa metus.
83 Quid tamen expectas ? Agamemnona paenitet irae
84 et jacet ante tuos Graecia maesta pedes.
85 Vince animos iramque tuam, qui cetera vincis.
86 Quid lacerat Danaas inpiger Hector opes ?
87 Arma cape, Aeacide, sed me tamen ante recepta,
88 et preme turbatos Marte favente viros.
89 Propter me mota est, propter me desinat ira
90 simque ego tristitiae causa modusque tuae.
91 Nec tibi turpe puta precibus succumbere nostris ;
92 conjugis Oenides versus in arma prece est.
93 Res audita mihi, nota est tibi. Fratribus orba
94 devovit nati spemque caputque parens.
95 Bellum erat ; ille ferox positus secessit ab armis
96 et patriae rigida mente negavit opem.
97 Sola virum conjunx flexit. Felicior illa !
98 At mea pro nullo pondere verba cadunt.
99 Nec tamen indignor nec me pro conjugis gessi
100 saepius in domini serva vocata torum.
101 Me quaedam, memini, dominam captiva vocabat :
102 "Servitio," dixi, "nominis addis onus."
103 Per tamen ossa viri subito male tecta sepulcro,
104 semper judiciis ossa verenda meis,
105 perque trium fortes animas, mea numina, fratrum,
106 qui bene pro patria cum patriaque jacent,
107 perque tuum nostrumque caput, quae junximus una,
108 perque tuos enses, cognita tela meis,
109 nulla Mycenaem sociasse cubilia mecum
110 juro ; fallentem deseruisse velis.
111 Si tibi nunc dicam " fortissime, tu quoque jura
112 nulla tibi sine me gaudia facta", neges.
113 At Danai maerere putant. Tibi plectra moventur,
114 te tenet in tepido mollis amica sinu.
115 Et quisquam quaerit quare pugnare recuses.
116 Pugna nocet, citharae voxque Venusque juvant ;
117 tutius est jacuisse toro, tenuisse puellam,
118 Threiciam digitis increpuisse lyram,
119 quam manibus clipeos et acutae cuspidis hastam
120 et galeam pressa sustinuisse coma.
121 Sed tibi pro tutis insignia facta placebant,

122 partaque bellando gloria dulcis erat.
 123 An, tantum dum me caperes fera bella probabas,
 124 cumque mea patria laus tua victa jacet ?
 125 Di melius ! validoque, precor, vibrata lacerto
 126 transeat Hectoreum Pelias hasta latus !
 127 Mittite me, Danai. Dominum legata rogabo
 128 multaque mandatis oscula mixta feram.
 129 Plus ego quam Phoenix, plus quam facundus Ulixes,
 130 plus ego quam Teucris, credite, frater agam.
 131 Est aliquid, collum solitis tetigisse lacertis,
 132 praesentisque oculos admonuisse sui.
 133 Sis licet immitis matrisque ferocior undis,
 134 ut taceam, lacrimis comminuere meis.
 135 Nunc quoque (sic omnes Peleus pater inpleat annos,
 136 sic eat auspiciis Pyrrhus ad arma tuis)
 137 respice sollicitam Briseida, fortis Achille,
 138 nec miseram lenta ferreus ure mora,
 139 aut, si versus amor tuus est in taedia nostri,
 140 quam sine te cogis vivere, coge mori,
 141 utque facis, coges. Abiit corpusque colorque ;
 142 sustinet hoc animae spes tamen una tui.
 143 Qua si destituor, repetam fratresque virumque ;
 144 nec tibi magnificum femina jussa mori.
 145 Cur autem jubeas ? Stricto pete corpora ferro ;
 146 est mihi qui fosso pectore sanguis eat.
 147 Me petat ille tuus, qui, si dea passa fuisset,
 148 ensis in Atridae pectus iturus erat.
 149 A ! potius serves nostram, tua munera, vitam.
 150 Quod dederas hosti victor, amica rogo.
 151 Perdere quos melius possis, Neptunia praebent
 152 Pergama ; materiam caedis ab hoste pete.
 153 Me modo, sive paras impellere remige classem,
 154 sive manes, domini jure venire jube.

PHAEDRA HIPPOLYTO

H_4 v.1 Quam nisi tu dederis, caritura est ipsa, salutem
 2 mittit Amazonio Cressa puella viro.
 3 Perlege, quodcumque est. Quid epistula lecta nocebit ?
 4 Te quoque in hac aliquid quod juvet esse potest.
 5 His arcana notis terra pelagoque feruntur ;
 6 inspicit acceptas hostis ab hoste notas.
 7 Ter tecum conata loqui ter inutilis haesit
 8 lingua, ter in primo restitit ore sonus.
 9 Qua licet et quitur, pudor est miscendus amori ;
 10 dicere quae pudit, scribere jussit amor.
 11 Quidquid Amor jussit, non est contemnere tutum ;
 12 regnat et in dominos jus habet ille deos.
 13 Ille mihi primo dubitanti scribere dixit :
 14 "Scribe. Dabit victas ferreus ille manus."
 15 Adsit et, ut nostras avido fovet igne medullas,
 16 figat sic animos in mea vota tuos !
 17 Non ego nequitia socialia foedera rumpam ;
 18 fama, velim quaeras, crimine nostra vacat.
 19 Venit amor gravius, quo serius. Urimur intus ;
 20 urimur, et caecum pectora vulnus habent.

21 Scilicet ut teneros laedunt juga prima juvencos
 22 frenaque vix patitur de grege captus equus,
 23 sic male vixque subit primos rude pectus amores
 24 sarcinaque haec animo non sedet apta meo.
 25 [Ars fit, ubi a teneris crimen condiscitur annis ;
 26 quae venit exacto tempore, pejus amat.]
 27 Tu nova servatae capies libamina famae
 28 et pariter nostrum fiet uterque nocens.
 29 Est aliquid plenis pomaria carpere ramis
 30 et tenui primam delegere ungue rosam.
 31 Si tamen ille prior, quo me sine crimine gessi,
 32 candor ab insolita labe notandus erat,
 33 at bene successit, digno quod adurimur igni ;
 34 pejus adulterio turpis adulter obest.
 35 Si mihi concedat Juno fratremque virumque,
 36 Hippolytum videor praepositura Jovi.
 37 Jam quoque, vix credes, ignotas mittor in artes ;
 38 est mihi per saevas impetus ire feras ;
 39 jam mihi prima dea est arcu praesignis adunco
 40 Delia ; judicium subsequor ipsa tuum.
 41 In nemus ire libet pressisque in retia cervis
 42 hortari celeris per juga summa canes,
 43 aut tremulum excusso jaculum vibrare lacerto
 44 aut in graminea ponere corpus humo.
 45 Saepe juvat versare leves in pulvere currus
 46 torquentem frenis ora fugacis equi ;
 47 nunc feror, ut Bacchi furiis Eleleides actae,
 48 quaeque sub Idaeo tympana colle movent
 49 aut quas semideae Dryades Faunisque bicornes
 50 numine contactas attonuere suo.
 51 Namque mihi referunt, cum se furor ille remisit,
 52 omnia ; me tacitam conscius urit amor.
 53 Forsitan hunc generis fato reddamus amorem
 54 et Venus ex tota gente tributa petat.
 55 Juppiter Europen (prima est ea gentis origo)
 56 dilexit, tauro dissimulante deum ;
 57 Pasiphae mater, decepto subdita tauro,
 58 enixa est utero crimen onusque suo ;
 59 perfidus Aegides, ducentia fila secutus,
 60 curva meae fugit tecta sororis ope.
 61 En, ego nunc, ne forte parum Minoia credar,
 62 in socias leges ultima gentis eo.
 63 Hoc quoque fatale est ; placuit domus una duabus ;
 64 me tua forma capit, capta parente soror.
 65 Thesides Theseusque duas rapuere sorores ;
 66 ponite de nostra bina tropaea domo.
 67 Tempore quo nobis inita est Cerealis Eleusin,
 68 Gnosia me vellem detinisset humus.
 69 Tunc mihi praecipue, nec non tamen ante, placebas ;
 70 acer in extremis ossibus haesit amor.
 71 Candida vestis erat, praecincti flore capilli,
 72 flava verecundus tinxerat ora rubor,
 73 quemque vocant aliae vultum rigidumque trucemque,
 74 pro rigido Phaedra iudice fortis erat.
 75 Sint procul a nobis juvenes ut femina compti.
 76 Fine coli modico forma virilis amat.
 77 Te tuus iste rigor positique sine arte capilli
 78 et levis egregio pulvis in ore decet.

79 Sive ferocis equi luctantia colla recurvas,
80 exiguo flexos miror in orbe pedes ;
81 seu lentum valido torques hastile lacerto,
82 ora ferox in se versa lacertus habet ;
83 sive tenes lato venabula cornea ferro,
84 denique nostra juvat lumina, quidquid agas.
85 Tu modo duritiam silvis depone jugosis.
86 Non sum duritia digna perire tua.
87 Quid juvat incinctae studia exercere Dianae
88 et Veneri numeros eripuisse suos ?
89 Quod caret alterna requie, durabile non est ;
90 haec reparat vires fessaque membra novat ;
91 arcus (et arma tuae tibi sunt imitanda Dianae)
92 si numquam cesses tendere, mollis erit.
93 Clarus erat silvis Cephalus multaeque per herbas
94 conciderant illo percutiente ferae,
95 nec tamen Aurorae male se praebebat amandum ;
96 ibat ad hunc sapiens a sene diva viro.
97 Saepe sub ilicibus Venerem Cinyraque creatum
98 sustinuit positos quaelibet herba duos.
99 Arsit et Oenides in Maenalia Atalanta ;
100 illa ferae spolium pignus amoris habet.
101 Nos quoque quam primum turba numeremur in ista ;
102 si Venerem tollas, rustica silva tua est.
103 Ipsa comes veniam, nec me latebrosa movebunt
104 saxa neque obliquo dente timendus aper.
105 Aequora bina suis oppugnant fluctibus Isthmon
106 et tenuis tellus audit utrumque mare.
107 Hic tecum Troezena colam, Pittheia regna ;
108 jam nunc est patria carior illa mea.
109 Tempore abest aberitque diu Neptunius heros ;
110 illum Pirithoi detinet ora sui ;
111 praeposuit Theseus, nisi si manifesta negamus,
112 Pirithoum Phaedrae Pirithoumque tibi.
113 Sola nec haec ad nos injuria venit ab illo ;
114 in magnis laesi rebus uterque sumus.
115 Ossa mei fratris clava perfracta trinodi
116 sparsit humi, soror est praeda relicta feris.
117 Prima securigeras inter virtute puellas
118 te peperit, nati digna vigore parens ;
119 si quaeras ubi sit, Theseus latus ense peregit ;
120 nec tanto mater pignore tuta fuit.
121 At ne nupta quidem taedaeque accepta jugali ;
122 cur, nisi ne caperes regna paterna nothus ?
123 Addidit et fratres ex me tibi, quos tamen omnis
124 non ego tollendi causa, sed ille fuit.
125 O utinam nocitura tibi, pulcherrime rerum,
126 in medio nisu viscera rupta forent !
127 I nunc, sic meriti lectum reverere parentis,
128 quem fugit et factis abdicat ipse suis.
129 Nec, quia privigno videar coitura noverca,
130 terruerint animos nomina vana tuos.
131 Ista vetus pietas, aevo moritura futuro,
132 rustica Saturno regna tenente fuit ;
133 Juppiter esse pium statuit, quodcumque juvaret,
134 et fas omne facit fratre marita soror.
135 Illa coit firma generis junctura catena,
136 imposuit nodos cui Venus ipsa suos.

137 Nec labor est celare, licet peccemus, ut illa ;
 138 cognato poterit nomine culpa tegi.
 139 Viderit amplexus aliquis, laudabimur ambo,
 140 dicar privigno fida noverca meo.
 141 Non tibi per tenebras duri reseranda mariti
 142 janua, non custos decipiendus erit ;
 143 [ut tenuit domus una duos, domus una tenebit ;
 144 oscula aperta dabas, oscula aperta dabis ;]
 145 tutus eris mecum laudemque merebere culpa,
 146 tu licet in lecto conspiciare meo.
 147 Tolle moras tantum properataque foedera junge ;
 148 qui mihi nunc saevit, sic tibi parcat Amor.
 149 Non ego dedignor supplex humilisque precari.
 150 Heu ! ubi nunc fastus altaque verba ? Jacent.
 151 Et pugnare diu nec me submittere culpae
 152 certa fui, certi siquid haberet amor ;
 153 victa precor genibusque tuis regalia tendo
 154 bracchia. Quid deceat, non videt ullus amans.
 155 Depuduit, profugusque pudor sua signa reliquit.
 156 Da veniam fassae duraque corda doma.
 157 Quod mihi sit genitor, qui possidet aequora, Minos,
 158 quod veniant proavi fulmina torta manu,
 159 quod sit avus radiis frontem vallatus acutis,
 160 purpureo tepidum qui movet axe diem,
 161 nobilitas sub amore jacet ; miserere priorum
 162 et, mihi si non vis parcere, parce meis.
 163 [Est mihi dotalis tellus Jovis insula, Crete ;
 164 serviat Hippolyto regia tota meo.
 165 Flecte, ferox, animos ! Potuit corrumpere taurum
 166 mater ; eris tauro saevior ipse truci ?]
 167 Per Venerem, parcas, oro, quae plurima mecum est.
 168 Sic numquam, quae te spernere possit, ames ;
 169 sic tibi secretis agilis dea saltibus adsit
 170 silvaeque perdendas praebat alta feras ;
 171 sic faveant Satyri montanaque numina Panes,
 172 et cadat adversa cuspide fossus aper ;
 173 sic tibi dent Nymphae, quamvis odisse puellas
 174 diceris, arentem quae levet unda sitim.
 175 Addimus his precibus lacrimas quoque. Verba precantis
 176 perlegis, at lacrimas finge videre meas.

OENONE PARIDI

H_5 v.1 [Nympha suo Paridi, quamvis suus esse recuset,
 2 mittit ab Idaeis verba legenda jugis.]
 3 Perlegis ? an conjunx prohibet nova ? Perlege ; non est
 4 ista Mycenaea littera facta manu.
 5 Pegasis Oenone, Phrygiis celeberrima silvis,
 6 laesa queror de te, si sinis, ipse meo.
 7 Quis deus opposuit nostris sua numina votis ?
 8 Ne tua permaneam, quod mihi crimen obest ?
 9 Leniter, e merito quicquid patiare, ferendum est ;
 10 quae venit indignae poena, dolenda venit.
 11 Nondum tantus eras, cum te contenta marito
 12 edita de magno flumine nympha fui.
 13 Qui nunc Priamides (absit reverentia vero),

14 servus eras ; servo nubere nympha tuli.
 15 Saepe greges inter requievimus arbore tecti
 16 mixtaque cum foliis praebuit herba torum ;
 17 saepe super stramen fenoque jacentibus alto
 18 defensa est humili cana pruina casa.
 19 Quis tibi monstrabat saltus venatibus aptos
 20 et tegetet catulos qua fera rupe suos ?
 21 Retia saepe comes maculis distincta tetendi,
 22 saepe citos egi per juga longa canes.
 23 Incisae servant a te mea nomina fagi
 24 et legor Oenone falce notata tua ;
 25 et quantum trunci, tantum mea nomina crescunt.
 26 crescite et in titulos surgite recta meos.
 27 [Populus est, memini, fluviali consita rivo,
 28 est in qua nostri littera scripta memor ;]
 29 popule, vive, precor, quae consita margine ripae
 30 hoc in rugoso cortice carmen habes :
 31 "Cum Paris Oenone poterit spirare relicta,
 32 ad fontem Xanthi versa recurret aqua."
 33 Xanthe, retro propera versaeque recurrere lymphae !
 34 Sustinet Oenonen deseruisse Paris.
 35 Illa dies fatum miserae mihi dixit, ab illa
 36 pessima mutati coepit amoris hiemps,
 37 qua Venus et Juno sumptisque decentior armis
 38 venit in arbitrium nuda Minerva tuum.
 39 Attoniti micuere sinus gelidusque cucurrit,
 40 ut mihi narrasti, dura per ossa tremor.
 41 Consului (neque enim modice terrebar) anusque
 42 longaevosque senes ; constitit esse nefas.
 43 Caesa abies sectaeque trabes et classe parata
 44 caerulea ceratas accipit unda rates.
 45 Flesti discedens ; hoc saltem parce negare.
 46 Praeterito magis est iste pudendus amor.
 47 Et flesti et nostros vidisti flentis ocellos ;
 48 miscuimus lacrimas maestus uterque suas ;
 49 non sic adpositis vincitur vitibus ulmus,
 50 ut tua sunt collo bracchia nexa meo.
 51 A ! quotiens, cum te vento quererere teneri,
 52 riserunt comites ; ille secundus erat.
 53 Oscula dimissae quotiens repetita dedisti ;
 54 quam vix sustinuit dicere lingua "vale" !
 55 Aura levis rigido pendentia lintea malo
 56 suscitatur et remis eruta canet aqua.
 57 Prosequor infelix oculis abeuntia vela,
 58 qua licet, et lacrimis umet arena meis,
 59 utque celer venias, virides Nereidas oro,
 60 scilicet ut venias in mea damna celer.
 61 Votis ergo meis, alii rediture, redisti.
 62 Ei mihi ! pro dira paelice blanda fui.
 63 Adspicit immensum moles nativa profundum ;
 64 mons fuit ; aequoreis illa resistit aquis.
 65 Hinc ego vela tuae cognovi prima carinae
 66 et mihi per fluctus impetus ire fuit.
 67 Dum moror, in summa fulsit mihi purpura prora.
 68 Pertimui ; cultus non erat ille tuus.
 69 Fit propior terrasque cita ratis attigit aura ;
 70 femineas vidi corde tremente genas.
 71 Non satis id fuerat (quid enim furiosa morabar ?) ;

72 haerebat gremio turpis amica tuo.
73 Tunc vero rupique sinus et pectora planxi
74 et secui madidas ungue rigente genas,
75 implevique sacram querulis ululatibus Iden ;
76 illuc has lacrimas in mea saxa tuli.
77 Sic Helene doleat defectaque conjuge ploret,
78 quaeque prior nobis intulit, ipsa ferat.
79 Nunc tibi conveniunt, quae te per aperta sequantur
80 aequora legitimos destituantque viros.
81 At cum pauper eras armentaque pastor agebas,
82 nulla nisi Oenone pauperis uxor erat.
83 Non ego miror opes, nec me tua regia tangit
84 nec de tot Priami dicar ut una nurus.
85 Non tamen ut Priamus nymphae socer esse recuset
86 aut Hecubae fuerim dissimulanda nurus.
87 Dignaque sum et cupio fieri matrona potentis ;
88 sunt mihi quas possint sceptrum decere manus.
89 Nec me, faginea quod tecum fronde jacebam,
90 despice ; purpureo sum magis apta toro.
91 Denique tutus amor meus est ; mihi nulla parantur
92 bella nec ultrices advehit unda rates.
93 Tyndaris infestis fugitiva reposcitur armis ;
94 hac venit in thalamos dotes superba tuos.
95 Quae si sit Danais reddenda, vel Hectora fratrem,
96 vel cum Deiphobo Polydamanta roga ;
97 quid gravis Antenor, Priamus quid suadeat ipse,
98 consule, quis aetas longa magistra fuit.
99 Turpe rudimentum, patriae praeponere raptam ;
100 causa pudenda tua est ; justa vir arma movet.
101 Nec tibi, si sapias, fidam promitte Lacaenam,
102 quae sit in amplexus tam cito versa tuos.
103 Ut minor Atrides temerati foedera lecti
104 clamat et externo laesus amore dolet,
105 tu quoque clamabis. Nulla reparabilis arte
106 laesa pudicitia est ; deperit illa semel.
107 Ardet amore tui. Sic et Menelaon amavit ;
108 nunc jacet in viduo credulus ille toro.
109 Felix Andromache certo bene nupta marito !
110 uxor ad exemplum fratris habenda fui.
111 Tu levior foliis, tum cum sine pondere suci
112 mobilibus ventis arida facta volant ;
113 et minus est in te quam summa pondus arista,
114 quae levis adsiduis solibus usta riget.
115 Hoc tua (nam recolo) quondam germana canebat
116 sic mihi diffusis vaticinata comis :
117 "Quid facis, Oenone ? Quid arenae semina mandas ?
118 Non profecturis litora bubus aras.
119 Graia juvenca venit, quae te patriamque domumque
120 perdat. Io ! prohibe. Graia juvenca venit.
121 Dum licet, obscenam ponto demergite puppim.
122 Heu ! quantum Phrygii sanguinis illa vehit."
123 Dixerat ; in cursu famulae rapuere furentem,
124 at mihi flaventes diriguere comae.
125 A ! nimium miserae vates mihi vera fuisti :
126 possidet, en, saltus Graia juvenca meos.
127 Sit facie quamvis insignis, adultera certe est.
128 deseruit socios hospite capta deos.
129 Illam de patria Theseus (nisi nomine fallor)

130 nescio quis Theseus abstulit ante sua.
 131 A juvene et cupido credatur reddita virgo ?
 132 Unde hoc compererim tam bene, quaeris ? Amo.
 133 Vim licet appelles et culpam nomine veles ;
 134 quae totiens rapta est, praebuit ipsa rapi.
 135 At manet Oenone fallenti casta marito ;
 136 et poteris falli legibus ipse tuis.
 137 Me Satyri celeres (silvis ego tecta latebam)
 138 quaesierunt rapido, turba proterva, pede
 139 cornigerumque caput pinu praecinctus acuta
 140 Faunus in immensis, qua tumet Ida, jugis.
 141 Me fide conspicuus Trojae munitor amavit ;
 142 ille meae spoliū virginitatis habet,
 143 id quoque luctando ; rupi tamen ungue capillos,
 144 oraue sunt digitis aspera facta meis.
 145 Nec pretium stupri gemmas aurumque poposci ;
 146 turpiter ingenuum munera corpus emunt.
 147 Ipse ratus dignam medicas mihi tradidit artes
 148 admisitque meas ad sua dona manus.
 149 Quaecumque herba potens ad opem radixque medendi
 150 utilis in toto nascitur orbe, mea est.
 151 Me miseram, quod amor non est medicabilis herbis !
 152 Deficior prudens artis ab arte mea.
 153 [Ipse repertor opis vaccas pavisse Pheraeas
 154 fertur et e nostro saucius igne fuit.]
 155 Quod nec graminibus tellus fecunda creandis
 156 nec deus, auxilium tu mihi ferre potes.
 157 Et potes, et merui. Dignae miserere puellae.
 158 Non ego cum Danais arma cruenta fero ;
 159 sed tua sum tecumque fui puerilibus annis,
 160 et tua, quod superest temporis, esse precor.

HYPSIPYLE IASONI

H_6 v.1 [Lemnias Hypsipyle, Bacchi genus, Aesone nato
 2 dicit, et in verbis pars quota mentis erat.]
 3 Litora Thessaliae reduci tetigisse carina
 4 diceris auratae vellere dives ovis.
 5 Gratulor incolumi quantum sinis ; hoc tamen ipso
 6 debueram scripto certior esse tuo.
 7 Nam ne pacta tibi praeter mea regna redires,
 8 cum cuperes, ventos non habuisse potes.
 9 Quamlibet adverso signatur epistula vento ;
 10 Hypsipyle missa digna salute fui.
 11 Cur mihi fama prior quam littera nuntia venit
 12 isse sacros Martis sub juga panda boves,
 13 seminibus jactis segetes adolesse virorum
 14 inque necem dextra non eguisse tua,
 15 pervigilem spoliū pecudis servasse draconem,
 16 rapta tamen forti vellera fulva manu ?
 17 Haec ego si possem timide credentibus "ista
 18 ipse mihi scripsit" dicere, quanta forem !
 19 Quid queror officium lenti cessasse mariti ?
 20 Obsequium, maneo si tua, grande tuli.
 21 Barbara narratur venisse venefica tecum,
 22 in mihi promissi parte recepta tori.

23 Credula res amor est. Utinam temeraria dicar
 24 criminibus falsis insimulasse virum !
 25 Nuper ab Haemoniis hospes mihi Thessalus oris
 26 venerat et tactum vix bene limen erat :
 27 "Aesonides," dixi, "quid agit meus ? " Ille pudore
 28 haesit in opposita lumina fixus humo.
 29 Protinus exilui tunicisque a pectore ruptis
 30 "Vivit ? an," exclamo, "me quoque fata vocant ? "
 31 "Vivit," ait timidus ; timidum jurare coegi ;
 32 vix mihi teste deo credita vita tua est.
 33 [Utque animus rediit, tua facta requirere coepi.
 34 Narrat aenipedes Martis arasse boves,
 35 vipereos dentes in humum pro semine jactos,
 36 et subito natos arma tulisse viros ;
 37 terrigenas populos civili Marte peremptos
 38 implesse aetatis fata diurna suae.
 39 Devictus serpens. Iterum, si vivat Iason,
 40 quaerimus ; alternant spesque timorque fidem.]
 41 Singula dum narrat, studio cursuque loquendi
 42 detegit ingenio vulnera facta tuo.
 43 Heu ! ubi pacta fides ? ubi conubialia jura
 44 faxque sub arsuos dignior ire rogos ?
 45 Non ego sum furto tibi cognita ; pronuba Juno
 46 adfuit et sertis tempora vinctus Hymen ;
 47 [at mihi nec Juno nec Hymen, sed tristis Erinys
 48 praetulit infaustas sanguinolenta faces.]
 49 Quid mihi cum Minyis, quid cum Tritonide pinu ?
 50 Quid tibi cum patria, navita Tiphys, mea ?
 51 Non erat hic aries villo spectabilis aureo,
 52 nec senis Aetae regia Lemnos erat.
 53 Certa fui primo (sed me mala fata trahebant)
 54 hospita feminea pellere castra manu,
 55 Lemniadesque viros, nimium quoque, vincere norunt ;
 56 milite tam forti vitta tuenda fuit.
 57 Urbe virum ut vidi, tectoque animoque recepi.
 58 Hic tibi bisque aestas bisque cucurrit hiemps.
 59 Tertia messis erat, cum tu dare vela coactus
 60 implesti lacrimis talia verba tuis :
 61 "Abstrahor, Hypsipyle, sed (dent modo fata recursus !)
 62 vir tuus hinc abeo, vir tibi semper ero ;
 63 quod tamen e nobis gravida celatur in alvo,
 64 vivat, et ejusdem simus uterque parens ! "
 65 Hactenus et lacrimis in falsa cadentibus ora
 66 cetera te meminisse non potuisse loqui.
 67 Ultimus e sociis sacram conscendis in Argo.
 68 Illa volat ; ventus concava vela tenet ;
 69 [caerula propulsae subducitur unda carinae ;
 70 terra tibi, nobis adspiciuntur aquae.]
 71 In latus omne patens turris circumspicit undas ;
 72 huc feror et lacrimis osque sinusque madent.
 73 Per lacrimas specto, cupidaeque faventia menti
 74 longius adsueto lumina nostra vident.
 75 Adde preces castas immixtaque vota timori,
 76 nunc quoque te salvo persolvenda mihi.
 77 Vota ego persolvam ? votis Medea fruetur !
 78 Cor dolet atque ira mixtus abundat amor.
 79 Dona feram templis, vivum quod Iasona perdo ?
 80 Hostia pro damnis concidat icta meis ?

81 Non equidem segura fui semperque verebar
 82 ne pater Argolica sumeret urbe nurum.
 83 Argolidas timui ; nocuit mihi barbara paelex.
 84 Non exspectata vulnus ab hoste tuli.
 85 Nec facie meritisque placet, sed carmina novit
 86 diraque cantata pabula falce metit.
 87 [Illa reluctantem cursu deducere Lunam
 88 nititur et tenebris abdere Solis equos ;
 89 illa refrenat aquas obliquaque flumina sistit ;
 90 illa loco silvas vivaque saxa movet ;
 91 per tumulos errat passis discincta capillis
 92 certaue de tepidis colligit ossa rogis.
 93 Devovet absentis simulacraue cerea fingit,
 94 et miserum tenues in jecur urget acus,]
 95 et quae nescierim melius. Male quaeritur herbis
 96 moribus et forma conciliandus amor.
 97 Hanc potes amplecti thalamoque relictus in uno
 98 impavidus somno nocte silente frui ?
 99 Scilicet ut tauros, ita te juga ferre coegit,
 100 quaque feros angues, te quoque mulcet ope.
 101 Adde, quod adscribi factis procerumque tuisque
 102 se facit et titulo conjugis uxor obest.
 103 Atque aliquis Peliae de partibus acta venenis
 104 imputat et populum qui sibi credat habet :
 105 "Non haec Aesonides, sed Phasias Aetine
 106 aurea Phrixiae terga revellit ovis."
 107 Non probat Alcimedea mater tua (consule matrem).
 108 Non pater, a gelido cui venit axe nurus ;
 109 illa sibi a Tanai Scythiaeque paludibus udae
 110 quaerat et a patria Phasidis usque virum !
 111 Mobilis Aeonide vernaue incertior aura,
 112 cur tua polliciti pondere verba carent ?
 113 Vir meus hinc ieras, vir non meus inde redisti ;
 114 sim reducis conjunx, sicut euntis eram !
 115 Si te nobilitas generosaue nomina tangunt,
 116 en, ego Minoo nata Thoante feror.
 117 Bacchus avus ; Bacchi conjunx redimita corona
 118 praeradiat stellis signa minora suis.
 119 Dos tibi Lemnos erit, terra ingeniosa colenti ;
 120 me quoque dotales inter habere potes.
 121 Nunc etiam peperit ; gratare ambobus, Iason.
 122 Dulce mihi gravidae fecerat auctor onus.
 123 Felix in numero quoque sum prolemque gemellam,
 124 pignora Lucina bina favente dedi.
 125 Si quaeris cui sint similes, cognosceris illis ;
 126 fallere non norunt ; cetera patris habent,
 127 legatos quos paene dedi pro matre ferendos ;
 128 sed tenuit coeptas saeva noverca vias.
 129 Medeam timui ; plus est Medea noverca ;
 130 Medae faciunt ad scelus omne manus.
 131 Spargere quae fratris potuit lacerata per agros
 132 corpora, pignoribus parceret illa meis ?
 133 Hanc, hanc, o demens Colchisque ablata venenis,
 134 diceris Hypsipyles praeposuisse toro !
 135 Turpiter illa virum cognovit adultera virgo ;
 136 me tibi teque mihi taeda pudica dedit.
 137 Prodidit illa patrem ; rapui de caede Thoanta.
 138 Deseruit Colchos ; me mea Lemnos habet.

139 Quid refert, scelerata piam si vincit et ipso
 140 crimine dotata est emeruitque virum ?
 141 Lemniadum facinus culpo, non miror, Iason ;
 142 quamlibet infirmis ipse dat arma dolor.
 143 Dic age, si ventis, ut oportuit actus iniquis
 144 intrasses portus tuque comesque meos
 145 obviaque exissem fetu comitante gemello,
 146 hiscere nempe tibi terra roganda fuit ?
 147 Quo vultu natos, quo me, scelerate, videres ?
 148 Perfidiae pretio qua nece dignus eras ?
 149 Ipse quidem per me tutus sospesque fuisses,
 150 non quia tu dignus, sed quia mitis ego ;
 151 paelicis ipsa meos implessem sanguine vultus,
 152 quosque veneficiis abstulit illa suis.
 153 Medeae Medea forem. Quodsi quid ab alto
 154 justus adest votis Juppiter ille meis,
 155 quod gemit Hypsipyle, lecti quoque subnuba nostri
 156 maereat et leges sentiat ipsa suas,
 157 utque ego destituor conjunx materque duorum,
 158 a totidem natis orba sit aque viro ;
 159 nec male parta diu teneat pejusque relinquat ;
 160 exulet et toto quaerat in orbe fugam.
 161 Quam fratri germana fuit miseroque parenti
 162 filia, tam natis, tam sit acerba viro ;
 163 cum mare, cum terras consumpserit, aera temptet :
 164 erret inops, exspes, caede cruenta sua.
 165 Haec ego, conjugio fraudata Thoantias, oro.
 166 Vivite devoto nuptaque virque toro !

DIDO AENEAE

H_7 v.1 [Accipe, Dardanide, moriturae carmen Elissae ;
 2 quae legis a nobis ultima verba legis.]
 3 Sic ubi fata vocant, udis abjectus in herbis
 4 ad vada Maeandri concinit albus olor.
 5 Nec quia te nostra sperem prece posse moveri,
 6 adloquor (adverso movimus ista deo),
 7 sed merita et famam corpusque animumque pudicum
 8 cum male perdidderim, perdere verba leve est.
 9 Certus es ire tamen miseramque relinquere Didon,
 10 atque idem venti vela fidemque ferent.
 11 Certus es, Aenea, cum foedere solvere naves
 12 quaeque ubi sint nescis, Itala regna sequi.
 13 Nec nova Carthago, nec te crescentia tangunt
 14 moenia nec sceptro tradita summa tuo.
 15 Facta fugis, facienda petis ; quaerenda per orbem
 16 altera, quaesita est altera terra tibi.
 17 Ut terram invenias, quis eam tibi tradet habendam ?
 18 Quis sua non notis arva tenenda dabit ?
 19 Alter amor tibi restat ? habenda est altera Dido ?
 20 Quamque iterum fallas, altera danda fides ?
 21 Quando erit ut condas instar Carthaginis urbem
 22 et videas populos altus ab arce tuos ?
 23 Omnia si veniant nec di tua vota morentur,
 24 unde tibi, quae te sic amet, uxor erit ?
 25 Uror ut inducto ceratae sulphure taedae ;

26 Aenean animo noxque diesque refert.
 27 Ille quidem male gratus et ad mea munera surdus
 28 et quo, si non sim stulta, carere velim.
 29 Non tamen Aenean, quamvis male cogitat, odi,
 30 sed queror infidum quastaque pejus amo.
 31 Parce, Venus, nurui, durumque amplectere fratrem,
 32 frater Amor ! Castris militet ille tuis
 33 atque ego quem coepi (neque enim dedignor) amare,
 34 materiam curae praebat ille meae.
 35 Fallor et ista mihi falso jactatur imago ;
 36 matris ab ingenio dissidet ille suae.
 37 Te lapis et montes innataque rupibus altis
 38 robora, te saevae progenere ferae,
 39 aut mare, quale vides agitari nunc quoque ventis,
 40 quo tamen adversis fluctibus ire paras.
 41 Quo fugis ? obstat hiemps. Hiemis mihi gratia prosit.
 42 Adspice ut eversas concitet Eurus aquas.
 43 Quod tibi malueram, sine me debere procellis ;
 44 justior est animo ventus et unda tuo.
 45 Non ego sum tanti (quamvis merearis, inique)
 46 ut pereas, dum me per freta longa fugis.
 47 Exerces pretiosa odia et constantia magno,
 48 si, dum me careas, est tibi vile mori.
 49 Jam venti ponent, strataque aequaliter unda
 50 caeruleis Triton per mare curret equis.
 51 Tu quoque cum ventis utinam mutabilis esses !
 52 et, nisi duritia robora vincis, eris.
 53 Quid, si nescires insana quid aequora possunt ?
 54 Expertae totiens tam male credis aquae !
 55 Ut, pelago suadente etiam, retinacula solvas,
 56 multa tamen latus tristia pontus habet.
 57 Nec violasse fidem temptantibus aequora prodest ;
 58 perfidiae poenas exigit ille locus,
 59 praecipue cum laesus amor, quia mater Amorum
 60 nuda Cytheriacis edita fertur aquis.
 61 Perdita ne perdam, timeo, noceamve nocenti
 62 neu bibat aequoreas naufragus hostis aquas.
 63 Vive, precor ! sic te melius quam funere perdam ;
 64 tu potius leti causa ferere mei.
 65 Finge, age, te rapido (nullum sit in omine pondus)
 66 turbine deprendi ; quid tibi mentis erit ?
 67 Protinus occurrent falsae perjuriam linguae
 68 et Phrygia Dido fraude coacta mori ;
 69 conjugis ante oculos deceptae stabit imago
 70 tristis et effusis sanguinolenta comis.
 71 Quidquid id est totum merui ; concedite, dicas,
 72 quaeque cadent, in te fulmina missa putes.
 73 Da breve saevitiae spatium pelagique tuaeque ;
 74 grande morae pretium tuta futura via est.
 75 Nec mihi tu curae ; puero parcatur Iulo.
 76 Te satis est titulum mortis habere meae.
 77 Quid puer Ascanius, quid commeruere Penates ?
 78 Ignibus ereptos obruet unda deos ?
 79 Sed neque fers tecum, nec quae mihi perfide, jactas,
 80 presserunt umeros sacra paterque tuos.
 81 Omnia mentiris, neque enim tua fallere lingua
 82 incipit a nobis primaque plector ego.
 83 Si quaeras ubi sit formosi mater Iuli,

84 occidit a duro sola relicta viro.
85 Haec mihi narraras ; haec me movere. Merentem
86 ure ; minor culpa poena futura mea est.
87 Nec mihi mens dubia est quin te tua numina damnent ;
88 per mare, per terras septima jactat hiemps.
89 Fluctibus ejectum tuta statione recepi
90 vixque bene audito nomine regna dedi.
91 His tamen officiis utinam contenta fuisset,
92 et mihi concubitus fama sepulta foret !
93 Illa dies nocuit, qua nos declive sub antrum
94 caeruleus subitis compulit imber aquis.
95 Audieram vocem ; nymphas ululasse putavi ;
96 Eumenides fatis signa dedere meis.
97 Exige, laese pudor, poenam et violate Sychaeu
98 ad quem, me miseram, plena pudoris eo.
99 Est mihi marmorea sacratus in aede Sychaeus
100 (oppositae frondes velleraque alba tegunt) ;
101 hinc ego me sensi noto quater ore citari ;
102 ipse sono tenui dixit : "Elissa, veni."
103 Nulla mora est, venio, venio tibi dedita conjunx ;
104 sum tamen admissi tarda pudore mei.
105 Da veniam culpae ; decepit idoneus auctor ;
106 invidiam noxae detrahit ille meae.
107 Diva parens seniorque pater, pia sarcina nati,
108 spem mihi mansuri rite dedere viri ;
109 si fuit errandum, causas habet error honestas ;
110 Adde fidem, nulla parte pigendus erit.
111 Durat in extremum vitaeque novissima nostrae
112 prosequitur fati, qui fuit ante, tenor.
113 Occidit Herceas conjunx mactatus ad aras,
114 et sceleris tanti praemia frater habet.
115 Exul agor cineresque viri patriamque relinquo
116 et feror in duras hoste sequente vias.
117 Adplicor ignotis fratricum elapsa fretoque
118 quod tibi donavi, perfide, litus emo ;
119 urbem constitui lateque patentia fixi
120 moenia finitimis invidiosa locis.
121 Bella tument ; bellis peregrina et femina temptor,
122 vixque rudis portas urbis et arma paro ;
123 mille procis placui, qui in me coiere querentes
124 nescio quem thalamis praeposuisse suis.
125 Quid dubitas vinctam Gaetulo tradere Iarbae ?
126 Praebuerim sceleri bracchia nostra tuo.
127 Est etiam frater, cujus manus impia poscit
128 respergi nostro, sparsa cruore viri.
129 Pone deos et quae tangendo sacra profanas.
130 Non bene caelestis impia dextra colit ;
131 Si tu cultor eras elapsis igne futurus,
132 paenitet elapsos ignibus esse deos.
133 Forsitan et gravidam Didon, scelerate, relinquo,
134 parsque tui lateat corpore clausa meo.
135 Accedet fatis matris miserabilis infans
136 et nondum nato funeris auctor eris,
137 cumque parente sua frater morietur Iuli,
138 poenaque conexos auferet una duos.
139 Sed jubet ire deus. Vellem vetuisset adire
140 Punica nec Teucris pressa fuisset humus.
141 Hoc duce nempe deo ventis agitaris iniquis

142 et teris in rapido tempora longa freto ?
143 Pergama vix tanto tibi erant repetenda labore,
144 Hectore si vivo quanta fuere forent.
145 Non patrium Simoenta petis, sed Thybridis undas ;
146 nempe ut pervenias quo cupis, hospes eris,
147 utque latet vitatque tuas abtrusa carinas,
148 vix tibi continget terra petita seni.
149 Hos potius populos in dotem, ambage remissa,
150 accipe et advectas Pygmalionis opes ;
151 Ilion in Tyriam transfer feliciter urbem
152 resque loco regis sceptraque sacra tene.
153 Si tibi mens avida est belli, si quaerit Iulus
154 unde suo partus Marte triumphus eat,
155 quem superet, ne quid desit, praebebimus hostem ;
156 hic pacis leges, hic locus arma capit.
157 Tu modo, per matrem fraternaue tela, sagittas,
158 perque fugae comites, Dardana sacra, deos,
159 (sic superent, quoscumque tua de gente reportas,
160 Mars ferus et damni sit modus ille tui,
161 Ascaniusque suos feliciter impleat annos,
162 et senis Anchisae molliter ossa cubent !)
163 parce, precor, domui, quae se tibi tradit habendam.
164 Quod crimen dicis praeter amasse meum ?
165 Non ego sum Phthia magnisque oriunda Mycenis
166 nec steterunt in te virque paterque meus.
167 Si pudet uxoris, non nupta, sed hospita dicar ;
168 dum tua sit, Dido quidlibet esse feret.
169 Nota mihi freta sunt Afrum plangentia litus ;
170 temporibus certis dantque negantque viam ;
171 cum dabit aura viam, praebebis carbasa ventis ;
172 nunc levis ejectam continet alga ratem.
173 Tempus ut observem, manda mihi ; serius ibis,
174 nec te, si cupies, ipsa manere sinam.
175 Et socii requiem poscunt, laniataque classis
176 postulat exiguas semirefecta moras.
177 Pro meritis et siqua tibi debebimus ultra,
178 pro spe conjugii tempora parva peto ;
179 dum freta mitescant et amorem temperet usus
180 fortiter ediscam tristia posse pati.
181 Si minus, est animus nobis effundere vitam ;
182 in me crudelis non potes esse diu.
183 Adspicias utinam quae sit scribentis imago ;
184 scribimus, et gremio Troicus ensis adest,
185 perque genas lacrimae strictum labuntur in ensem,
186 qui jam pro lacrimis sanguine tinctus erit.
187 Quam bene conveniunt fato tua munera nostro !
188 Instruis impensa nostra sepulcra brevi.
189 Nec mea nunc primum feriuntur pectora telo ;
190 ille locus saevi vulnus amoris habet.
191 Anna soror, soror Anna, meae male conscia culpa,
192 jam dabis in cineres ultima dona meos.
193 Nec consumpta rogis inscribar "Elissa Sychaei",
194 hoc tantum in tumuli marmore carmen erit :
195 "Praebuit Aeneas et causam mortis et ensem ;
196 ipsa sua Dido concidit usa manu."

HERMIONE ORESTI

H_8 v.1 [Alloquor Hermione nuper fratremque virumque
 2 nunc fratrem. Nomen conjugis alter habet.]
 3 Pyrrhus Achillides, animosus imagine patris,
 4 inclusam contra jusque piumque tenet.
 5 Quod potui, renui, ne non invita tenerer ;
 6 cetera femineae non valere manus.
 7 "Quid facis, Aeacidae ? non sum sine vindice, dixi ;
 8 haec tibi sub domino est, Pyrrhe, puella suo."
 9 Surdior ille freto clamantem nomen Orestis
 10 traxit inornatis in sua tecta comis.
 11 Quid gravius capta Lacedaemone serva tulissem,
 12 si raperet Graias barbara turba nurus ?
 13 Parcius Andromachen vexavit Achaia victrix,
 14 cum Danaus Phrygias ureret ignis opes.
 15 At tu, cura mei si te pia tangit, Oreste,
 16 inice non timidas in tua jura manus.
 17 An si quis rapiat stabulis armenta reclusis,
 18 arma feras, rapta conjuge lentus eris ?
 19 Sit socer exemplo, nuptae repetitor ademptae,
 20 [cui pia militiae causa puella fuit
 21 si pater ignavus vidua plorasset in aula]
 22 nupta foret Paridi mater, ut ante fuit.
 23 Nec tu mille rates sinuosaque vela pararis
 24 nec numeros Danai militis ; ipse veni.
 25 Sic quoque eram repetenda tamen, nec turpe marito
 26 aspera pro caro bella tulisse toro ;
 27 quid quod avus nobis idem Pelopeius Atreus,
 28 et, si non esses vir mihi, frater eras ?
 29 Vir, precor, uxori, frater succurre sorori.
 30 Instant officio nomina bina tuo.
 31 Me tibi Tyndareus, vita gravis auctor et annis,
 32 tradidit ; arbitrium neptis habebat avus.
 33 [At pater Aeacidae promiserat inscius acti ;
 34 plus quoque, qui prior est ordine, posset avus.]
 35 Cum tibi nubebam, nulli mea taeda nocebat ;
 36 si jungar Pyrrho, tu mihi laesus eris.
 37 Et pater ignoscet nostro Menelaus amori ;
 38 succubuit telis praepetis ipse dei.
 39 Quem sibi permisit, genero concedet amorem ;
 40 proderit exemplo mater amata suo.
 41 Tu mihi, quod matri pater est ; quas egerat olim
 42 Dardanius partes advena, Pyrrhus agit.
 43 Ille licet patriis sine fine superbiat actis,
 44 et tu, quae referas facta parentis, habes.
 45 Tantalides omnes ipsumque regebat Achillem ;
 46 hic pars militiae, dux erat ille ducum.
 47 Tu quoque habes proavum Pelopem Pelopisque parentem ;
 48 si medios numeres, a Jove quintus eris.
 49 Nec virtute cares. Arma invidiosa tulisti.
 50 Sed tu quid faceres ? Induit illa pater.
 51 Materia vellem fortis meliore fuisses ;
 52 non lecta est operi, sed data causa tuo.
 53 Hanc tamen implesti, juguloque Aegisthus aperto
 54 tecta cruentavit, quae pater ante tuus.
 55 Increpat Aeacides laudemque in crimina vertit,
 56 et tamen adspectus sustinet ille meos.

57 Rumpor et ora mihi pariter cum mente tumescunt
 58 pectoraque inclusis ignibus usta dolent.
 59 Hermione coram quisquamne obtrectet Orestis ?
 60 Nec mihi sunt vires, nec ferus ensis adest.
 61 Flere licet certe ; flendo diffundimus iram
 62 perque sinum lacrimae fluminis instar eunt.
 63 Has solas habeo semper semperque profundo ;
 64 ument incultae fonte perenne genae.
 65 Num generis fato, quod nostros durat in annos,
 66 Tantalides matres apta rapina sumus ?
 67 Non ego fluminei referam mendacia cygni
 68 nec querar in plumis delituisse Jovem.
 69 Qua duo porrectus longe freta distinet Isthmos,
 70 vecta peregrinis Hippodamia rotis ;
 71 Castori Amyclaeo et Amyclaeo Polluci
 72 reddita Mopsopia Taenaris urbe soror ;
 73 Taenaris Idaeo trans aequor ab hospite rapta
 74 Argolicas pro se vertit in arma manus.
 75 Vix equidem memini, memini tamen ; omnia luctus,
 76 omnia solliciti plena timoris erant.
 77 Flebat avus Phoebeque soror fratresque gemelli,
 78 orabat superos Leda suumque Jovem.
 79 Ipsa ego, non longos etiam tunc scissa capillos,
 80 clamabam : "Sine me, me sine, mater abis ? "
 81 Vix conjunx aberas. Ne non Pelopeia credar,
 82 ecce Neoptolemo praeda parata fui.
 83 Pelides utinam vitasset Apollinis arcus !
 84 Damnaret nati facta proterva pater ;
 85 nec quondam placuit nec nunc placuisset Achilli,
 86 abducta viduum conjuge flere virum.
 87 Quae mea caelestes injuria fecit iniquos
 88 quodve mihi miserae sidus obesse querar ?
 89 Parva mea sine matre fui, pater arma ferebat,
 90 et duo cum vivant, orba duobus eram.
 91 Non tibi blanditias primis, mea mater, in annis
 92 incerto dictas ore puella tuli.
 93 Non ego captavi brevibus tua colla lacertis
 94 nec gremio sedi sarcina grata tuo ;
 95 non cultus tibi cura mei, nec pacta marito
 96 intravi thalamos matre parante novos.
 97 Obvia prodieram reduci tibi (vera fatebor),
 98 nec facies nobis nota parentis erat ;
 99 te tamen esse Helenen, quod eras pulcherrima, sensi ;
 100 ipsa requirebas quae tua nata foret.
 101 Pars haec una mihi, conjunx bene cessit Orestes ;
 102 is quoque, ni pro se pugnat, adeptus erit.
 103 Pyrrhus habet captam reduce et victore parente ;
 104 hoc munus nobis diruta Troja dedit.
 105 Cum tamen altus equis Titan radiantibus instat,
 106 perfruor infelix liberiore malo ;
 107 nox ubi me thalamis ululantem et acerba gementem
 108 condidit in maesto procubuique toro,
 109 pro somno lacrimis oculi funguntur abortis,
 110 quaque licet, fugio sicut ab hoste viro.
 111 Saepe malis stupeo rerumque oblita locique
 112 ignara tetigi Scyria membra manu,
 113 utque nefas sensi, male corpora tacta relinquo
 114 et mihi pollutas credor habere manus.

115 Saepe Neoptolemi pro nomine nomen Orestis
 116 exit, et errorem vocis ut omen amo.
 117 Per genus infelix juro generisque parentem,
 118 qui freta, qui terras et sua regna quatit,
 119 per patris ossa tui, patru mihi, quae tibi debent
 120 quod sic sub tumulo fortiter ultra jacent,
 121 aut ego praemoriar primoque exstinguar in aevo,
 122 aut ego Tantalidae Tantalus uxor ero.

DEJANIRA HERCULI

H_9 v.1 [Mittor ad Alciden a conjuge conscia mentis
 2 littera si conjunx Dejanira tua est.]
 3 Gratulor Oechaliam titulis accedere nostris ;
 4 victorem victae subcubuisse queror.
 5 Fama Pelasgiadas subito pervenit in urbes
 6 decolor et factis infitianda tuis,
 7 quem numquam Juno seriesque immensa laborum
 8 fregerit, huic Iolen imposuisse jugum.
 9 Hoc velit Eurystheus, velit hoc germana Tonantis,
 10 laetaque sit vitae labe noverca tuae,
 11 at non ille velit, cui nox (si creditur) una
 12 non tanti, ut tantus conciperere, fuit.
 13 Plus tibi quam Juno nocuit Venus ; illa premo
 14 sustulit, haec humili sub pede colla tenet.
 15 Respice vindicibus pacatum viribus orbem,
 16 qua latam Nereus caeruleus ambit humum.
 17 Se tibi pax terrae, tibi se tuta aequora debent ;
 18 implesti meritis Solis utramque domum ;
 19 quod te laturum est, caelum prius ipse tulisti ;
 20 Hercule supposito sidera fulsit Atlans.
 21 Quid nisi notitia est misero quaesita pudori,
 22 si maculas stupri facta priora nota ?
 23 Tene ferunt geminos pressisse tenaciter angues,
 24 cum tener in cunis jam Jove dignus eras ?
 25 Coepisti melius quam desinis ; ultima primis
 26 cedunt ; dissimiles hic vir et ille puer.
 27 Quem non mille ferae, quem non Stheneleius hostis,
 28 non potuit Juno vincere, vincit Amor.
 29 At bene nupta feror, quia nominer Herculis uxor
 30 sitque socer rapidis qui tonat altus equis.
 31 Quam male inaequales veniunt ad aratra juvenci,
 32 tam premitur magno conjuge nupta minor.
 33 [Non honor est sed onus species laesura ferentes ;
 34 si qua voles apte nubere, nube pari.]
 35 Vir mihi semper abest, et conjuge notior hospes
 36 monstraque terribiles persequiturque feras.
 37 Ipsa domo vidua votis operata pudicis
 38 torqueor, infesto ne vir ab hoste cadat ;
 39 inter serpentes aprosque avidosque leones
 40 jactor et haesuros terna per ora canes.
 41 Me pecudum fibrae simulacraque inania somni
 42 ominaque arcana nocte petita movent.
 43 Aucupor infelix incertae murmura famae,
 44 speque timor dubia spesque timore cadit.
 45 Mater abest queriturque deo placuisse potenti,

46 nec pater Amphitryon nec puer Hyllus adest.
 47 Arbiter Eurystheus astu Junonis iniquae
 48 sentitur nobis iraque longa deae.
 49 Haec mihi ferre parum. Peregrinos addis amores
 50 et mater de te quaelibet esse potest.
 51 Non ego Partheniis temeratam vallibus Augen
 52 nec referam partus, Ormeni nympha, tuos ;
 53 non tibi crimen erunt, Teuthrantia turba, sorores,
 54 quarum de populo nulla relictata tibi est.
 55 Una, recens crimen, referetur adultera nobis,
 56 unde ego sum Lydo facta noverca Lamo.
 57 Maeandros, terris totiens errator in isdem
 58 qui lassas in se saepe retorquet aquas,
 59 vidit in Herculeo suspensa monilia collo,
 60 illo, cui caelum sarcina parva fuit.
 61 Non pudivit fortes auro cohibere lacertos
 62 et solidis gemmas opposuisse toris.
 63 Nempe sub his animam pestis Nemeaea lacertis
 64 edidit, unde umerus tegmina laevus habet !
 65 Ausus es hirsutos mitra redimire capillos ;
 66 aptior Herculeae populus alba comae.
 67 Nec te Maeonia lascivae more puellae
 68 incingi zona dedecuisse putes ?
 69 Non tibi succurrit crudi Diomedis imago,
 70 efferus humana qui dape pavit equas ?
 71 Si te vidisset cultu Busiris in isto,
 72 sic victor victo nempe pudendus eras.
 73 Detrahat Antaeus duro redimicula collo,
 74 ne pigeat molli succubuisse viro.
 75 Inter Ioniacas calathum tenuisse puellas
 76 diceris et dominae pertimuisse minas.
 77 Non fugis, Alcide, victricem mille laborum
 78 rasilibus calathis supposuisse manum
 79 crassaque robusto deducis pollice fila
 80 aequaque formosae pensa rependis erae !
 81 A ! quotiens, digitis dum torques stamina duris,
 82 praevalidae fusos comminuere manus !
 83 [Crederis infelix scuticae tremefactus habenis]
 84 ante pedes dominae pertimuisse minas ...
 85 [Eximias pompas, immania semina laudum]
 86 factaque narrabas dissimulanda tibi,
 87 scilicet immanes elisis faucibus hydros
 88 infantem caudis involuisse manum,
 89 ut Tegeaeus aper cupressifero Erymantho
 90 incubet et vasto pondere laedat humum.
 91 Non tibi Threiciis adfixa penatibus ora,
 92 non hominum pingues caede tacentur equae,
 93 prodigiumque triplex, armenti dives Hiberi
 94 Geryones, quamvis in tribus unus erat ;
 95 inque canes totidem trunco digestus ab uno
 96 cerberos implicitis angue minante comis ;
 97 quaeque redundabat fecundo vulnere serpens
 98 fertilis et damnis dives ab ipsa suis,
 99 quique inter laevumque latus laevumque lacertum
 100 praegrave compressa fauce pependit onus,
 101 et male confisum pedibus formaque bimembri
 102 pulsum Thessalicis agmen equestre jugis.
 103 Haec tu Sidonio potes insignitus amictu

104 dicere ? non cultu lingua retenta silet ?
105 Se quoque nympha tuis ornavit Iardanis armis
106 et tulit a capto nota tropaea viro.
107 I nunc, tolle animos et fortia gesta recense :
108 quo tu non esses, jure vir illa fuit.
109 Qua tanto minor es, quanto te, maxime rerum,
110 quam quos vicisti, vincere majus erat.
111 Illi procedit rerum mensura tuarum ;
112 cede bonis, heres laudis amica tuae.
113 O pudor ! hirsuti costis exuta leonis,
114 aspera texerunt vellera molle latus.
115 Falleris et nescis ; non sunt spolia illa leonis,
116 sed tua, tuque feri victor es, illa tui.
117 Femina tela tulit Lernaeis atra venenis,
118 ferre gravem lana vix satis apta colum,
119 instruxitque manum clava domitrice ferarum
120 vidit et in speculo conjugis arma sui.
121 Haec tamen audieram ; licuit non credere famae.
122 Et venit ad visus mollis ab aure dolor.
123 Ante meos oculos adducitur advena paelex,
124 nec mihi, quae patior, dissimulare licet.
125 Non sinis averti ; mediam captiva per urbem
126 invitis oculis adspicienda venit ;
127 nec venit incultis captarum more capillis,
128 fortunam vultu fassa jacente suam ;
129 ingreditur late lato spectabilis auro,
130 qualiter in Phrygia tu quoque cultus eras ;
131 dat vultum populo sublimis, ut Hercule victo
132 Oechaliam vivo stare parente putes.
133 Forsitan et pulsa Aetolide Deianira
134 nomine deposito paelicis uxor erit
135 Eurytidosque Ioles atque insani Alcidae
136 turpia famosus corpora junget Hymen.
137 Mens fugit admonitu, frigusque perambulat artus
138 et jacet in gremio languida facta manus.
139 Me quoque cum multis, sed me sine crimine amasti ;
140 ne pigeat, pugnae bis tibi causa fui.
141 Cornua flens legit ripis Achelous in udis
142 truncaque limosa tempora mersit aqua ;
143 semivir occubuit in lotifero Eveno
144 Nessus, et infecit sanguis equinus aquas.
145 Sed quid ego haec refero ? Scribenti nuntia venit
146 fama, virum tunicae tabe perire meae.
147 Ei mihi ! quid feci ? quo me furor egit amantem ?
148 Impia quid dubitas Deianira mori ?
149 [An tuus in media conjunx lacerabitur Oeta,
150 tu sceleris tanti causa superstes eris ?
151 Ecquid adhuc habeo facti cur Herculis uxor
152 credar ? conjugii mors mea pignus erit !
153 Tu quoque cognosces in me, Meleagre, sororem.
154 Impia quid dubitas Deianira mori ?]
155 Heu devota domus ! solio sedet Agrios alto,
156 Oenea desertum nuda senecta premit ;
157 exulat ignotis Tydeus germanus in oris ;
158 alter fatali vivus in igne fuit ;
159 exegit ferrum sua per praecordia mater.
160 Impia quid dubitas Deianira mori ?
161 Deprecor hoc unum per jura sacerrima lecti,

162 ne videar fatis insidiata tuis.
 163 Nessus, ut est avidum percussus harundine pectus,
 164 "Hic, dixit, vires sanguis amoris habet."
 165 Inlita Nesseo misi tibi texta veneno.
 166 Impia quid dubitas Deianira mori ?
 167 Jamque vale, seniorque pater germanaque Gorge
 168 et patria et patriae frater adempte tuae,
 169 et tu lux oculis hodierna novissima nostris
 170 virque (sed o possis !) et puer Hylle, vale.

ARIADNE THESEO

H_10 v.1 [Illa relictas feris etiam nunc, improbe Theseu
 2 vivit. Et haec aequa mente tulisse velis ?
 3 Mitius inveni quam te genus omne ferarum ;
 4 credita non ulli quam tibi pejus eram.]
 5 Quae legis, ex illo, Theseu, tibi litore mitto,
 6 unde tuam sine me vela tulere ratem,
 7 in quo me somnusque meus male prodidit et tu
 8 per facinus somnis insidiate meis.
 9 Tempus erat, vitrea quo primum terra pruina
 10 spargitur et tectae fronde queruntur aves.
 11 Incertum vigilans ac somno languida movi
 12 Thesea prensuras semisupina manus ;
 13 nullus erat. Referoque manus iterumque retempto
 14 perque torum moveo bracchia ; nullus erat.
 15 Excussere metus somnum ; conterrita surgo,
 16 membraque sunt viduo praecipitata toro.
 17 Protinus adductis sonuerunt pectora palmis,
 18 utque erat e somno turbida, rupta coma est.
 19 Luna fuit ; specto siquid nisi litora cernam ;
 20 quod videant oculi, nil nisi litus habent.
 21 Nunc huc, nunc illuc et utroque sine ordine, curro ;
 22 alta puellares tardat harena pedes.
 23 Interea toto clamanti litore "Theseu ! " ;
 24 reddebant nomen concava saxa tuum,
 25 et quotiens ego te, totiens locus ipse vocabat ;
 26 ipse locus miserae ferre volebat opem.
 27 Mons fuit ; apparent frutices in vertice rari ;
 28 hinc scopulus raucis pendet adesus aquis.
 29 Ascendo (vires animus dabat) atque ita late
 30 aequora prospectu metior alta meo.
 31 Inde ego (nam ventis quoque sum crudelibus usa)
 32 vidi praecipiti carbasa tenta Noto.
 33 Aut vidi aut acie tamquam vidisse putarem ;
 34 frigidior glacie semianimisque fui.
 35 Nec languere diu patitur dolor. Excitor illo,
 36 excitor et summa Thesea voce voco.
 37 "Quo fugis ? exclamo. Scelerate revertere Theseu,
 38 flecte ratem ! Numerum non habet illa suum. "
 39 Haec ego ; quod voci deerat, plangore replebam ;
 40 verbera cum verbis mixta fuere meis.
 41 Si non audires, ut saltem cernere posses,
 42 jactatae late signa dedere manus,
 43 candidaque imposui longae velamina virgae,
 44 scilicet oblitos admonitura mei.

45 Jamque oculis ereptus eras. Tum denique flevi ;
 46 torpuerant molles ante dolore genae.
 47 Quid potius facerent, quam me mea lumina flerent,
 48 postquam desieram vela videre tua ?
 49 Aut ego diffusis erravi sola capillis,
 50 qualis ab Ogygio concita Baccha deo,
 51 aut mare prospiciens in saxo frigida sedi,
 52 quamque lapis sedes, tam lapis ipsa fui.
 53 Saepe torum repeto qui nos acceperat ambos,
 54 sed non acceptos exhibiturus erat,
 55 et tua, quae possum, pro te vestigia tango
 56 strataque, quae membris intepuere tuis.
 57 Incumbo lacrimisque toro manante profusis :
 58 "Pressimus, exclamo, te duo, redde duos.
 59 Venimus huc ambo ; cur non discedimus ambo ?
 60 Perfide, pars nostri, lectule, major ubi est ? "
 61 Quid faciam ? quo sola ferar ? vacat insula cultu ;
 62 non hominum video, non ego facta boum.
 63 Omne latus terrae cingit mare ; navita nusquam,
 64 nulla per ambiguas puppis itura vias.
 65 Finge dari comitesque mihi ventosque ratemque ;
 66 quid sequar ? Accessus terra paterna negat.
 67 Ut rate felici pacata per aequora labar,
 68 temperet ut ventos Aeolus, exul ero.
 69 Non ego te, Crete centum digesta per urbes,
 70 aspiciam, puero cognita terra Jovi.
 71 A ! pater et tellus justo regnata parenti
 72 prodita sunt facto, nomina cara, meo,
 73 cum tibi, ne victor tecto morerere recurvo,
 74 quae regerent passus, pro duce fila dedi,
 75 cum mihi dicebas : "Per ego ipsa pericula juro,
 76 te fore, dum nostrum vivet uterque, meam."
 77 Vivimus, et non sum, Theseu, tua, si modo vivit
 78 femina perjuri fraude sepulta viri.
 79 Me quoque, qua fratrem mactasses, improbe, clava ;
 80 Esset, quam dederas, morte soluta fides.
 81 Nunc ego non tantum quae sum passura recordor,
 82 sed quaecumque potest ulla relicta pati.
 83 Occurrunt animo pereundi mille figurae.
 84 Morsque minus poenae quam mora mortis habet.
 85 Jam jam venturos aut hac aut suspicor illac,
 86 qui lanient avido viscera dente, lupos ;
 87 forsitan et fulvos tellus alat ista leones ;
 88 quis scit an et saevas tigridas intus alat ?
 89 Et freta dicuntur magnas expellere phocas !
 90 Quis vetat et gladios per latus ire meum ?
 91 Tantum ne religer dura captiva catena
 92 neve traham serva grandia pensa manu,
 93 cui pater est Minos, cui mater filia Phoebi,
 94 quodque magis memini, quae tibi pacta fui.
 95 Si mare, si terras porrectaque litora vidi,
 96 [multa mihi terrae, multa minantur aquae.
 97 Caelum restabat ; timeo simulacra deorum.]
 98 Destituor rapidis praeda cibusque feris.
 99 [Sive colunt habitantque viri, diffidimus illis ;
 100 externos didici laesa timere viros.]
 101 Viveret Androgeos utinam, nec facta luisses
 102 impia funeribus, Cecropi terra, tuis ;

103 nec tua mactasset nodoso stipite, Theseu,
 104 ardua parte virum dextera, parte bovem,
 105 nec tibi, quae reditus monstrarent, fila dedissem,
 106 fila per adductas saepe recepta manus.
 107 Non equidem miror, si stat victoria tecum,
 108 strataque Cretaeam belua planxit humum ;
 109 non poterant figi praecordia ferrea cornu ;
 110 ut te non tegeres, pectore tutus eras.
 111 Illic tu silices, illic adamanta tulisti,
 112 illic qui silices, Thesea, vincat, habes.
 113 Nec pater est Aegeus, nec tu Pittheidos Aethrae
 114 filius ; auctores saxa fretumque tui.
 115 Crudeles somni, quid me tenuistis inertem ?
 116 Ah ! semel aeterna nocte premenda fui.
 117 Vos quoque crudeles, venti, nimiumque parati
 118 flaminaque in lacrimas officiosa meas,
 119 dextera crudelis, quae me fratremque necavit,
 120 et data poscenti, nomen inane, fides,
 121 in me jurarunt somnus ventusque fidesque ;
 122 prodita sum causis una puella tribus.
 123 Ergo ego nec lacrimas matris moritura videbi,
 124 nec, mea qui digitis lumina condat, erit ;
 125 spiritus infelix peregrinas ibit in auras
 126 nec positos artus unguet amica manus ;
 127 ossa superstabant volucres inhumata marinae ?
 128 Haec sunt officiis digna sepulcra meis ?
 129 Ibis Cecropios portus patriaque receptus,
 130 cum steteris urbis celsus in arce tuae
 131 et bene narraris letum taurique virique
 132 sectaque per dubias saxea tecta vias ;
 133 me quoque narrato sola tellure relictam.
 134 Non ego sum titulis subripienda tuis.
 135 Di facerent ut me summa de puppe videres ;
 136 movisset vultus maesta figura tuos.
 137 Nunc quoque non oculis, sed qua potes, adspice mente
 138 haerentem scopulo quem vaga pulsat aqua ;
 139 adspice demissos lugentis more capillos
 140 et tunicas lacrimis sicut ab imbre graves.
 141 Corpus, ut impulsae segetes aquilonibus, horret,
 142 litteraque articulo pressa tremente labat.
 143 Non te per meritum, quoniam male cessit, adoro.
 144 Debita sit facto gratia nulla meo,
 145 sed ne poena quidem. Si non ego causa salutis,
 146 non tamen est cur sis tu mihi causa necis.
 147 Has tibi plangendo lugubria pectora lassas
 148 infelix tendo trans freta lata manus ;
 149 hos tibi, qui superant, ostendo maesta capillos.
 150 Per lacrimas oro, quas tua facta movent,
 151 flecte ratem, Theseu, versoque relabere velo.
 152 Si prius occidero, tu tamen ossa feres.

CANACE MACAREO

H_11 v.1 [Aeolis Aeolidae quam non habet ipsa salutem
 2 mittit et armata verba notata manu.]
 3 Si qua tamen caecis errabunt scripta lituris,

4 oblitus a dominae caede libellus erit.
 5 Dextra tenet calamum, strictum tenet altera ferrum,
 6 et jacet in gremio charta soluta meo.
 7 Haec est Aeolidos fratri scribentis imago ;
 8 sic videor duro posse placere patri.
 9 Ipse necis cuperem nostrae spectator adesset
 10 auctorisque oculis exigeretur opus.
 11 Ut ferus est multoque suis truculentior Euris,
 12 spectasset siccis vulnera nostra genis.
 13 Scilicet est aliquid cum saevis vivere ventis ;
 14 ingenio populi convenit ille sui.
 15 Ille Noto Zephyroque et Sithonio Aquiloni
 16 imperat et pinnis, Eure proterve, tuis.
 17 Imperat heu ! ventis, tumidae non imperat irae,
 18 possidet et vitiis regna minora suis.
 19 Quid juvat admotam per avorum nomina caelo
 20 inter cognatos posse referre Jovem ?
 21 Num minus infestum, funebria munera, ferrum
 22 feminea teneo, non mea tela, manu ?
 23 O utinam, Macareu, quae nos commisit in unum,
 24 venisset leto serior hora meo !
 25 Cur umquam plus me, frater, quam frater amasti,
 26 et tibi, non debet quod soror esse, fui ?
 27 Ipsa quoque incalui, qualemque audire solebam,
 28 nescio quem sensi corde tepente deum.
 29 Fugerat ore color, macies adduxerat artus,
 30 sumebant minimos ora coacta cibos ;
 31 nec somni faciles et nox erat annua nobis,
 32 et gemitum nullo laesa dolore dabam.
 33 Nec, cur haec facerem, poteram mihi reddere causam
 34 nec noram quid amans esset ; at illud erat.
 35 Prima malum nutrix animo praesensit anili,
 36 prima mihi nutrix "Aeoli, dixit, amas."
 37 Erubui gremioque pudor dejecit ocellos ;
 38 haec satis e tacita signa fatentis erant.
 39 Jamque tumescebant vitiati pondera ventris
 40 aegraque furtivum membra gravabat onus.
 41 Quas mihi non herbas, quae non medicamina nutrix
 42 attulit audaci supposuitque manu,
 43 ut penitus nostris (hoc te celavimus unum)
 44 visceribus crescens excuteretur onus !
 45 A ! nimium vivax admotis restitit infans
 46 artibus et tecto tutus ab hoste fuit.
 47 Jam noviens erat orta soror pulcherrima Phoebi.
 48 Denaque luciferos Luna movebat equos.
 49 Nescia quae faceret subitos mihi causa dolores.
 50 Et rudis ad partus et nova miles eram ;
 51 nec tenui vocem : "Quid, ait, tua crimina prodis ? "
 52 oraque clamantis conscia pressit anus.
 53 Quid faciam infelix ? gemitus dolor edere cogit,
 54 sed timor et nutrix et pudor ipse vetant.
 55 Contineo gemitus elapsaque verba rependo
 56 et cogor lacrimas combibere ipsa meas.
 57 Mors erat ante oculos et opem Lucina negabat
 58 et grave, si moriar, mors quoque crimen erat,
 59 cum super incumbens scissa tunicaque comaque
 60 pressa refovisti pectora nostra tuis
 61 et mihi : "Vive, soror, soror o carissima, aisti,

62 vive nec unius corpore perde duos.
63 Spes bona det vires ; fratri es nam nupta futura ;
64 illius, de quo mater, et uxor eris."
65 Mortua, crede mihi, tamen ad tua verba revixi,
66 et positum est uteri crimen onusque mei.
67 Quid tibi grataris ? media sedet Aeolus aula ;
68 crimina sunt oculis subripienda patris.
69 Frugibus infantem ramisque albentis olivae
70 et levibus vittis sedula celat anus,
71 fictaque sacra facit dicitque precantia verba ;
72 dat populus sacris, dat pater ipse viam.
73 Jam prope limen erat ; patrias vagitus ad aures
74 venit et indicio proditur ille suo.
75 Eripit infantem mentitaque sacra revelat
76 Aeolus ; insana regia voce sonat.
77 Ut mare fit tremulum, tenui cum stringitur aura,
78 ut quatitur tepido fraxinus acta Noto,
79 sic mea vibrari pallentia membra videres ;
80 quassus ab imposito corpore lectus erat.
81 Inruit et nostrum vulgat clamore pudorem
82 et vix a misero continet ore manus ;
83 ipsa nihil praeter lacrimas pudibunda profudi ;
84 torpuerat gelido lingua retenta metu.
85 Jamque dari parvum canibusque avibusque nepotem
86 jusserat in solis destituique locis.
87 Vagitus dedit ille miser (sensusse putares)
88 quaque suum poterat voce rogabat avum.
89 Quid mihi tunc animi credis, germane, fuisse
90 (nam potes ex animo colligere ipse tuo),
91 cum mea me coram silvas inimicus in altas
92 viscera montanis ferret edenda lupis ?
93 Exierat thalamo ; tunc demum pectora plangi
94 contigit inque meas unguibus ire genas.
95 Interea patrius vultu maerente satelles
96 venit et indignos edidit ore sonos :
97 "Aeolus hunc ense mittit tibi" (tradidit ense)
98 et jubet ex merito scire quid iste velit."
99 Scimus et utemur violento fortiter ense ;
100 pectoribus condam dona paterna meis.
101 His mea muneribus, genitor, conubia donas ?
102 Hac tua dote, pater, filia dives erit !
103 Tolle procul de caede faces, Hymenaeae, maritas
104 et fuge turbato tecta nefanda pede.
105 Ferte faces in me, quas fertis, Erinyes atrae,
106 et meus ex isto luceat igne rogas.
107 [Nubite felices Parca meliore sorores,
108 amissae memores sed tamen este mei.]
109 Quid puer admisit tam paucis editus horis ?
110 Quo laesit facto vix bene natus avum ?
111 Si potuit meruisse necem, meruisse putetur.
112 A ! miser admissio plectitur ille meo.
113 Nate, dolor matris, rapidarum praeda ferarum,
114 ei mihi ! natali dilacerate tuo,
115 nate, parum fausti miserabile pignus amoris,
116 haec tibi prima dies, haec tibi summa fuit.
117 Non mihi te licuit lacrimis perfundere justis,
118 in tua non tonsas ferre sepulcra comas,
119 non super incubui, non oscula frigida carpsi.

120 Diripiunt avidae viscera nostra ferae.
 121 Ipsa quoque infantis cum vulnere prosequar umbras
 122 nec mater fuero dicta nec orba diu.
 123 Tu tamen, o frustra miserae sperate sorori,
 124 sparsa, precor, nati collige membra tui
 125 et refer ad matrem socioque impone sepulcro,
 126 urnaque nos habeat quamlibet arta duos.
 127 [Vive memor nostri lacrimasque in vulnera funde
 128 neve reformida corpus amantis amans ;
 129 tu, rogo, dilectae nimium mandata sororis
 130 perfer ; mandatum persequar ipsa patris.]

MEDEA IASONI

H_12 v.1 [Exul inops contempta novo Medea marito
 2 dicit, an a regnis tempora nulla vacant ?]
 3 At tibi Colchorum, memini, regina vacavi,
 4 ars mea cum peteres ut tibi ferret opem.
 5 Tunc, quae dispensant mortalia fata, sorores
 6 debuerant fusos evoluisse meos.
 7 Tum potui Medea mori bene. Quidquid ab illo
 8 produxi vitae tempore, poena fuit.
 9 Ei mihi ! cur umquam juvenalibus acta lacertis
 10 Phrixeam petiit Pelias arbor ovem ?
 11 Cur umquam Colchi Magnetida vidimus Argon
 12 turbaque Phasiacam Graia bibistis aquam ?
 13 Cur mihi plus aequo flavi placuere capilli
 14 et decor et linguae gratia ficta tuae ?
 15 Aut, semel in nostras quoniam nova puppis harenas
 16 venerat audacis attuleratque viros,
 17 isset anhelatos non praemedicatus in ignes
 18 inmemor Aesonides aeraque adunca boum ;
 19 semina jecisset, totidem quot severat hostes,
 20 ut caderet cultu cultor ab ipse suo.
 21 Quantum perfidiae tecum, scelerate, perisset !
 22 Dempsta forent capiti quam mala multa meo !
 23 Est aliqua ingrato meritum exprobrare voluptas ;
 24 hac fruar, haec de te gaudia sola feram.
 25 Jussus inexpertam Colchos advertere puppim
 26 intrasti patriae regna beata meae.
 27 Hoc illic Medea fui, nova nupta quod hic est ;
 28 quam pater est illi, tam mihi dives erat ;
 29 hic Ephyren bimarem, Scythia tenus ille nivosa
 30 omne tenet, Ponti qua plaga laeva jacet.
 31 Accipit hospitio juvenes Aeeta Pelasgos,
 32 et premitis pictos corpora Graia toros.
 33 Tunc ego te vidi ; tunc coepi scire quis esses ;
 34 illa fuit mentis prima ruina meae.
 35 Et vidi et perii nec notis ignibus arsi,
 36 ardet ut ad magnos pinea taeda deos.
 37 Et formosus eras et me mea fata trahebant ;
 38 abstulerant oculi lumina nostra tui.
 39 Perfide, sensisti. Quis enim bene celat amorem ?
 40 Eminent indicio prodita flamma suo.
 41 Dicitur interea tibi lex, ut dura ferorum
 42 insolito premeres vomere colla boum.

43 Martis erant tauri plus quam per cornua saevi,
 44 quorum terribilis spiritus ignis erat,
 45 aere pedes solidi praetentaque naribus aera,
 46 nigra per adflatus haec quoque facta suos ;
 47 semina praeterea populos genitura juberis
 48 spargere devota lata per arva manu,
 49 qui peterent natis secum tua corpora telis ;
 50 illa est agricolae messis iniqua suo ;
 51 lumina custodis succumbere nescia somno
 52 ultimus est aliqua decipere arte labor.
 53 Dixerat Aeetes ; maesti consurgitis omnes,
 54 mensaque purpureos deserit alta toros.
 55 Quam tibi tunc longe regnum dotale Creusae
 56 et socer et magni nata Creontis erat ?
 57 Tristis abis ; oculis abeuntem prosequor udis,
 58 et dixit tenui murmure lingua "vale".
 59 Ut positum tetigi thalamo male saucia lectum,
 60 acta est per lacrimas nox mihi, quanta fuit ;
 61 ante oculos taurique meos segetesque nefandae,
 62 ante meos oculos pervigil anguis erat.
 63 Hinc amor, hinc timor est ; ipsum timor auget amorem.
 64 Mane erat et thalamo cara recepta soror
 65 disjectamque comas aversaque in ora jacentem
 66 invenit et lacrimis omnia plena meis.
 67 Orat opem Minyis, alter petit, alter habebit
 68 Aesonio juveni, quod rogat illa, damus.
 69 Est nemus et piceis et frondibus ilicis atrum ;
 70 vix illuc radiis solis adire licet.
 71 Sunt in eo (fuerant certe) delubra Dianae ;
 72 aurea barbarica stat dea facta manu.
 73 Noscis an exciderunt mecum loca ? Venimus illuc ;
 74 orsus es infido sic prior ore loqui :
 75 "Jus tibi et arbitrium nostrae fortuna salutis
 76 tradidit inque tua est vitaque morsque manu.
 77 Perdere posse sat est, siquem juvet ipsa potestas :
 78 sed tibi servatus gloria major ero.
 79 Per mala nostra precor, quorum potes esse levamen,
 80 per genus et numen cuncta videntis avi,
 81 per triplices vultus arcanaque sacra Dianae
 82 et si forte aliquos gens habet ista deos,
 83 o virgo, miserere mei, miserere meorum ;
 84 effice me meritis tempus in omne tuum.
 85 Quodsi forte virum non dedignare Pelasgum
 86 (sed mihi tam faciles unde meosque deos ?)
 87 spiritus ante meus tenues vanescet in auras
 88 quam thalamo nisi tu nupta sit ulla meo.
 89 Conscia sit Juno sacris praefecta maritis
 90 et dea, marmorea cujus in aede sumus."
 91 Haec animum (et quota pars haec sunt ?) movere puellae
 92 simplicis et dextrae dextera juncta meae.
 93 Vidi etiam lacrimas (an et ars est fraudis in illis ?) ;
 94 sic cito sum verbis capta puella tuis.
 95 Jungis et aeripedes inadusto corpore tauros
 96 et solidam jusso vomere findis humum.
 97 Arva venenatis pro semine dentibus imples ;
 98 nascitur et gladios scutaque miles habet ;
 99 ipsa ego, quae dederam medicamina, pallida sedi,
 100 cum vidi subitosa arma tenere viros,

101 donec terrigenae, facinus mirabile, fratres
102 inter se strictas conseruere manus.
103 Insuper ecce draco squamis crepitantibus horrens
104 sibilat et torto pectore verit humum.
105 Dotis opes ubi erant ? ubi erat tibi regia conjunx
106 quique maris gemini distinet Isthmos aquas ?
107 Illa ego, quae tibi sum nunc denique barbara facta,
108 nunc tibi sum pauper, nunc tibi visa nocens,
109 flammea subdixi medicato lumina somno
110 et tibi, quae raperes, vellera tuta dedi.
111 Proditus est genitor, regnum patriamque reliqui ;
112 optima cum cara matre relicta soror ;
113 virginitas facta est peregrini praeda latronis ;
114 munus, in exilio quodlibet esse, tuli.
115 At non te fugiens sine me, germane, reliqui ;
116 deficit hoc uno littera nostra loco ;
117 quod facere ausa mea est, non audet scribere dextra ;
118 sic ego, sed tecum, dilaceranda fui.
119 Nec tamen extimui (quid enim post illa timerem ?)
120 credere me pelago, femina jamque nocens.
121 Numen ubi est ? ubi di ? meritas subeamus in alto,
122 tu fraudis poenas, credulitatis ego.
123 Complexos utinam Symplegades elisissent
124 nostrarque adhaerent ossibus ossa tuis,
125 aut nos Scylla rapax canibus misisset edendos
126 (debut ingratis Scylla nocere viris),
127 quaeque vomit totidem fluctus totidemque resorbet,
128 nos quoque Trinacriae supposuisset aquae !
129 Sospes ad Haemonias victorque reverteris urbes ;
130 ponitur ad patrios aurea lana deos.
131 Quid referam Peliae natas pietate nocentes
132 caesaque virginea membra paterna manu ?
133 [Ut culpent alii, tibi me laudare necesse est,
134 pro quo sum totiens esse coacta nocens.]
135 Ausus es (o ! justo desunt sua verba dolori),
136 ausus es "Aesonia, dicere, cede domo."
137 Jussa domo cessi natis comitata duobus
138 et, qui me sequitur semper, amore tui.
139 Ut subito nostras Hymen cantatus ad aures
140 venit et accenso lampades igne micant
141 tibiaque effundit socialia carmina vobis,
142 ei mihi ! funerea flebiliora tuba,
143 pertimui nec adhuc tantum scelus esse putabam ;
144 sed tamen in toto pectore frigus erat.
145 Turba ruunt et "Hymen" clamant "Hymenaeae" frequenter ;
146 quo propior vox haec, hoc mihi pejus erat.
147 Diversi flebant servi lacrimasque tegebant
148 (quis vellet tanti nuntius esse mali ?) ;
149 me quoque, quidquid erat, potius nescire juvabat,
150 sed tamquam scirem, mens mea tristis erat,
151 cum minor e pueris casu studiove videndi
152 adstitit ad geminae limina prima foris :
153 "Huc mihi, mater, adi ! pompam pater, inquit, Iason
154 ducit et adjunctos aureus urget equos."
155 Protinus abscissa planxi mea pectora veste
156 tuta nec a digitis ora fuere meis.
157 Ire animus mediae suadebat in agmina turbae
158 sertaque compositis demere rapta comis ;

159 vix me continui quin sic laniata capillos
160 clamarem "meus est" iniceremque manus.
161 Laese pater, gaude ; Colchi gaudete relictii ;
162 inferias umbrae fratris habete mei ;
163 deseror amissis regno patriaque domoque
164 conjuge, qui nobis omnia solus erat.
165 Serpentes igitur potui taurosque furentes,
166 unum non potui perdomuisse, virum ;
167 quaeque feros pepuli doctis medicatibus ignes,
168 non valeo flammam effugere ipsa meas.
169 Ipsi me cantus herbaeque artesque relinquunt ;
170 nil dea, nil Hecates sacra potentis agunt.
171 Non mihi grata dies ; noctes vigilantur amarae,
172 et tener a misero pectore somnus abit ;
173 quae me non possum, potui sopire draconem ;
174 utilior cuivis quam mihi cura mea est.
175 Quos ego servavi, paelex amplectitur artus
176 et nostri fructus illa laboris habet.
177 Forsitan et, stultae dum te jactare maritae
178 quaeris et infestis auribus apta loqui,
179 in faciem moresque meos nova crimina fingas.
180 Rideat et vitiis laeta sit illa meis ;
181 rideat et Tyrio jaceat sublimis in ostro.
182 Flebit et ardore vincet adusta meos.
183 Dum ferrum flammaeque aderunt sucusque veneni,
184 hostis Medae nullus inultus erit.
185 Quodsi forte preces praecordia ferrea tangunt,
186 nunc animis audi verba minora meis.
187 Tam tibi sum supplex, quam tu mihi saepe fuisti,
188 nec moror ante tuos procubuisse pedes.
189 Si tibi sum vilis, communis respice natos :
190 saeviet in partus dira noverca meos.
191 Et nimium similes tibi sunt, et imagine tangor
192 et quotiens video, lumina nostra madent.
193 Per superos oro, per avitae lumina flammae,
194 per meritum et natos, pignora nostra, duos,
195 redde torum, pro quo tot res insana reliqui.
196 Adde fidem dictis auxiliumque refer.
197 Non ego te imploro contra taurosque virosque,
198 utque tua serpens victa quiescat ope.
199 Te peto, quem merui, quem nobis ipse dedisti,
200 cum quo sum pariter facta parente parens.
201 Dos ubi sit, quaeris ? Campo numeravimus illo
202 qui tibi laturo vellus arandus erat ;
203 arduus ille aries villo spectabilis auro
204 dos mea, quam, dicam si tibi "redde," neges.
205 Dos mea tu sospes, dos est mea Graia juventus.
206 I nunc, Sisyphias, improbe, confer opes.
207 Quod vivis, quod habes nuptam socerumque potentes,
208 hoc ipsum, ingratus quod potes esse, meum est.
209 Quos equidem actutum... Sed quid praedicere poenam
210 attinet ? Ingentis parturit ira minas.
211 Quo feret ira sequar. Facti fortasse pigebit ;
212 et piget infido consuluisse viro.
213 Viderit ista deus, qui nunc mea pectora versat.
214 Nescio quid certe mens mea majus agit.

LAODAMIA PROTESILAO

H_13 v.1 [Mittit et optat amans, quo mittitur, ire salutem
 2 Haemonis Haemonio Laodamia viro.]
 3 Aulide te fama est vento retinente morari ;
 4 a me cum fugeres, hic ubi ventus erat ?
 5 Tum freta debuerant vestris obsistere remis ;
 6 illud erat saevis utile tempus aquis.
 7 Oscula plura viro mandataque plura dedissem,
 8 et sunt quae volui dicere multa tibi.
 9 Raptus es hinc praeceps, et qui tua vela vocaret,
 10 quem cuperent nautae, non ego, ventus erat.
 11 Ventus erat nautis aptus, non aptus amanti.
 12 Solvor ab amplexu, Protesilae, tuo
 13 linguaque mandantis verba imperfecta reliquit ;
 14 vix illud potui dicere triste "vale".
 15 Incubuit Boreas abreptaque vela tetendit,
 16 jamque meus longe Protesilaus erat.
 17 Dum potui spectare virum, spectare juvabat
 18 sumque tuos oculos usque secuta meis.
 19 Ut te non poteram, poteram tua vela videre,
 20 vela diu vultus detinuere meos.
 21 At postquam nec te nec vela fugacia vidi,
 22 et quod spectarem, nil nisi pontus erat,
 23 lux quoque tecum abiit, tenebrisque exsanguis obortis
 24 succiduo dicor procubuisse genu.
 25 Vix socer Iphiclus, vix me grandaevus Acastus,
 26 vix mater gelida maesta refecit aqua ;
 27 officium fecere pium, sed inutile nobis ;
 28 indignor miserae non licuisse mori.
 29 Ut rediit animus, pariter rediere dolores ;
 30 pectora legitimus casta momordit amor.
 31 Nec mihi pectendos cura est praebere capillos,
 32 nec libet aurata corpora veste tegi.
 33 Ut quas pampinea tetigisse Bicorniger hasta
 34 creditur, huc illuc, qua furor egit, eo.
 35 Conveniunt matres Phylleides et mihi clamant :
 36 "Indue regales, Laodamia, sinus."
 37 Scilicet ipsa geram saturatas murice vestes,
 38 bella sub Iliacis moenibus ille geret ;
 39 ipsa comas pectar, galea caput ille premetur ;
 40 ipsa novas vestes, dura vir arma ferat ?
 41 Qua possum, squalore tuos imitata labores
 42 dicar et haec belli tempora tristis agam.
 43 Dyspari Priamide, damno formose tuorum,
 44 tam sis hostis iners quam malus hospes eras.
 45 Aut te Taenariae faciem culpasse maritae,
 46 aut illi vellem displicuisse tuam.
 47 Tu, qui pro rapta nimium, Menelae, laboras,
 48 ei mihi ! quam multis flebilis ultor eris !
 49 Di, precor, a nobis omen removete sinistrum
 50 et sua det reduci vir meus arma Jovi.
 51 Sed timeo, quotiens subiit miserabile bellum ;
 52 more nivis lacrimae sole madentis eunt.
 53 Ilion et Tenedos Simoisque et Xanthus et Ide
 54 nomina sunt ipso paene timenda sono.
 55 Nec rapere ausurus, nisi si defendere posset,

56 hospes erat ; vires noverat ille suas.
57 Venerat, ut fama est, multo spectabilis auro
58 quique suo Phrygias corpore ferret opes,
59 [classe virisque potens, per quae fera bella geruntur ;
60 et sequitur regni pars quota quemque sui ?]
61 His ego te victam, consors Ledaea gemellis,
62 suspicor ; haec Danais posse nocere puto.
63 [Hectora nescio quem timeo ; Paris Hectora dixit
64 ferrea sanguinea bella movere manu.]
65 Hectora, quisquis is est, si sum tibi cara, caveto ;
66 signatum memori pectore nomen habe.
67 Hunc ubi vitaris, alios vitare memento
68 et multos illic Hectoras esse puta
69 et facito ut dicas, quotiens pugnare parabis :
70 "Parcere me jussit Laodamia sibi."
71 Si cadere Argolico fas est sub milite Trojam,
72 te quoque non ullum vulnus habente cadat.
73 Pugnet et adversos tendat Menelaus in hostes ;
74 hostibus e mediis nupta petenda viro est.
75 Causa tua est dispar ; tu tantum vivere pugna
76 inque pios dominae posse redire sinus.
77 Parcite, Dardanidae, de tot, precor, hostibus uni,
78 ne meus ex illo corpore sanguis eat.
79 Non est quem deceat nudo concurrere ferro ;
80 saevaque in oppositos pectora ferre viros ;
81 fortius ille potest multo, quam pugnat, amare :]
82 bella gerant alii, Protesilaus amet.
83 Nunc fateor ; volui revocare animusque ferebat ;
84 substitit auspicii lingua timore mali.
85 Cum foribus velles ad Trojam exire paternis,
86 pes tuus offenso limine signa dedit ;
87 ut vidi, ingemui tacitoque in pectore dixi :
88 "Signa reversuri sint, precor, ista viri ! "
89 Haec tibi nunc refero, ne sis animosus in armis.
90 Fac meus in ventos hic timor omnis eat.
91 Sors quoque nescio quem fato designat iniquo,
92 qui primus Danaum Troada tangat humum ;
93 infelix, quae prima virum lugebit ademptum !
94 Di faciant ne tu strenuus esse velis.
95 Inter mille rates tua sit millensima puppis
96 jamque fatigatas ultima verset aquas.
97 Hoc quoque praemoneo, de nave novissimus exi.
98 Non est, quo properes, terra paterna tibi.
99 Cum venies, remoque move veloque carinam
100 inque tuo celerem litore siste gradum.
101 Sive latet Phoebus seu terris altior exstat,
102 tu mihi luce celer, tu mihi nocte venis,
103 nocte tamen quam luce magis ; nox grata puellis,
104 quarum suppositus colla lacertus habet.
105 Aucupor in lecto mendaces caelibe somnos ;
106 dum careo veris, gaudia falsa juvant.
107 Sed tua cur nobis pallens occurrit imago ?
108 Cur venit a vobis multa querela latens ?
109 Excutor somno simulacraque noctis adoro ;
110 nulla caret fumo Thessalis ara meo ;
111 tura damus lacrimamque super, qua sparsa relucet,
112 ut solet adfuso surgere flamma mero.
113 Quando ego, te reducem cupidis amplexa lacertis,

114 languida laetitia solvar ab ipsa mea ?
 115 Quando erit ut lecto mecum bene junctus in uno
 116 militiae referas splendida facta tuae ?
 117 Quae mihi dum referes, quamvis audire juvabit,
 118 multa tamen capies oscula, multa dabis ;
 119 semper in his apte narrantia verba resistunt ;
 120 promptior est dulci lingua refecta mora.
 121 Sed cum Troja subit, subeunt ventique fretumque,
 122 spes bona sollicito victa timore cadit.
 123 Hoc quoque, quod venti prohibent exire carinas,
 124 me movet ; invitis ire paratis aquis.
 125 Quis velit in patriam vento prohibente reverti ?
 126 A patria pelago vela vetante datis !
 127 Ipsae suam non praebet iter Neptunus ad urbem.
 128 Quo ruitis ? Vestras quisque redite domos.
 129 Quo ruitis, Danaei ? ventos audite vetantes.
 130 Non subiti casus, numinis ista mora est.
 131 Quid petitur tanto nisi turpis adultera bello ?
 132 Dum licet, Inachiae vertite vela rates.
 133 Sed quid ago ? revoco ? revocaminis omen abesto,
 134 blandaue compositas aura secundet aquas !
 135 Troasin invideo, quae si lacrimosa suorum
 136 funera conspicient, nec procul hostis erit ;
 137 ipsa suis manibus forti nova nupta marito
 138 imponet galeam Dardanaeque arma dabit ;
 139 arma dabit, dumque arma dabit, simul oscula sumet
 140 (hoc genus officii dulce duobus erit).
 141 Producetque virum, dabit et mandata reverti
 142 et dicet "referas ista fac arma Jovi ! "
 143 Ille ferens dominae mandata recentia secum
 144 pugnabit caute respicietque domum ;
 145 exuet haec reduci clipeum galeamque resolvat
 146 excipietque suo corpora lassa sinu.
 147 Nos sumus incertae, nos anxius omnia cogit,
 148 quae possunt fieri, facta putare timor.
 149 Dum tamen arma gerens diverso miles in orbe,
 150 quae referat vultus est mihi cera tuos ;
 151 illi blanditias, illi tibi debita verba
 152 dicimus, amplexus accipit illa meos.
 153 Crede mihi, plus est quam quod videatur, imago ;
 154 adde sonum cerae, Protesilaus erit.
 155 Hanc specto teneoque sinu pro conjuge vero
 156 et, tamquam possit verba referre, queror.
 157 Per reditus corpusque tuum, mea numina, juro
 158 perque pares animi conjugiique faces
 159 perque, quod ut videam canis albere capillis,
 160 mox tutum possis ipse referre, caput,
 161 me tibi venturam comitem, quocumque vocaris,
 162 sive - quod heu ! timeo , sive superstes eris.
 163 [Ultima mandato claudetur epistula parvo.
 164 Si tibi cura mei, sit tibi cura tui.]

HYPERMESTRA LYNCEO

H_14 v.1 [Mittit Hypermestra de tot modo fratribus uni
 2 (cetera nuptarum crimine turba jacet) :]

3 clausa domo teneor gravibusque coercita vinclis ;
4 est mihi supplicii causa fuisse piam.
5 Quod manus extimuit jugulo demittere ferrum,
6 sum rea ; laudarer, si scelus ausa forem.
7 Esse ream praestat, quam sic placuisse parenti ;
8 non piget immunes caedis habere manus.
9 Me pater igne licet, quem non violavimus, urat,
10 quaeque aderant sacris, tendat in ora faces
11 aut illo jugulet, quem non bene tradidit ense,
12 ut, qua non cecidit vir nece, nupta cadam,
13 non tamen ut dicant morientia "paenitet" ora
14 efficiet ; non es quam piget esse piam.
15 Paeniteat sceleris Danaum saevasque sorores ;
16 hic solet eventus facta nefanda sequi.
17 Cor pavet admonitu temeratae sanguine noctis
18 et subitus dextrae praepedit ossa tremor ;
19 quam tu caede putes fungi potuisse mariti,
20 scribere de facta non sibi caede timet.
21 Sed tamen experiar. Modo facta crepuscula terris,
22 ultima pars lucis primaque noctis erat ;
23 ducimur Inachides magni sub tecta Pelasgi,
24 et socer armatas accipit ipse nurus.
25 Undique conlucent praecinctae lampades auro.
26 Dantur in invitos impia tura focos ;
27 Vulgus "Hymen, Hymenaeae" vocant ; fugit ille vocantes ;
28 ipsa Jovis conjunx cessit ab urbe sua.
29 Ecce, mero dubii, comitum clamore frequentes,
30 flore novo madidas impediante comas,
31 in thalamos laeti - thalamos, sua busta ! - feruntur
32 strataque funeribus corpore dicta premunt.
33 Jamque cibo vinoque graves somnoque jacebant
34 securumque quies alta per Argos erat ;
35 circum me gemitus morientum audire videbar
36 et tamen audieram, quodque verebar erat.
37 Sanguis abit, mentemque calor corpusque relinquit,
38 inque novo jacui frigida facta toro.
39 Ut leni Zephyro graciles vibrantur aristae,
40 frigida populeas ut quatit aura comas,
41 aut sic, aut etiam tremui magis ; ipse jacebas,
42 quaeque tibi dederam causa soporis erant.
43 Excussere metum violenti jussa parentis.
44 Erigor et capio tela tremente manu ;
45 non ego falsa loquar ; ter acutum sustulit ense,
46 ter male sublato reccidit ense manus.
47 [Admovi jugulo (sine me tibi vera fateri),
48 admovi jugulo tela paterna tuo,]
49 et timor et pietas crudelibus obstitit ausis,
50 castaque mandatum dextra refugit opus.
51 Purpureos laniata sinus, laniata capillos,
52 exiguo dixi talia verba sono :
53 "Saevus, Hypermestra, pater est tibi ; jussa parentis
54 effice ; germanis sit comes iste suis.
55 Femina sum et virgo, natura mitis et annis ;
56 non faciunt molles ad fera tela manus.
57 Quin age dumque jacet, fortis imitare sorores.
58 Credibile est caesos omnibus esse viros.
59 Si manus haec aliquam posset committere caedem,
60 morte foret dominae sanguinolenta suae.

61 Haud meruere necem patruelia regna petendo,
62 quae tamen externis danda forent generis.
63 Finge viros meruisse mori ; quid fecimus ipsae ?
64 Quo mihi commisso non licet esse piae ?
65 Quid mihi cum ferro ? quo bellica tela puellae ?
66 Aptior est digitis lana colusque meis."
67 Haec ego ; dumque queror, lacrimae sua verba sequuntur
68 deque meis oculis in tua membra cadunt.
69 Dum petis amplexus sopitaque bracchia jactas,
70 paene manus telo saucia facta tua est.
71 Jamque patrem famulosque patris lucemque timebam ;
72 expulerunt somnos haec mea dicta tuos :
73 "Surge age, Belide, de tot modo fratribus unus.
74 Nox tibi, ni properas, ista perennis erit."
75 Territus exurgis ; fugit omnis inertia somni ;
76 adspicis in timida fortia tela manu.
77 Quaerenti causam "dum nox sinit, effuge, " dixi ;
78 dum nox atra sinit, tu fugis, ipsa moror.
79 Mane erat et Danaus generos ex caede jacentes
80 dinumerat ; summae criminis unus abes ;
81 fert male cognatae jacturam mortis in uno
82 et queritur facti sanguinis esse parum.
83 Abstrahor a patriis pedibus raptamque capillis
84 (haec meruit pietas praemia !) carcer habet.
85 Scilicet ex illo Junonia permanet ira,
86 cum bos ex homine est, ex bove facta dea.
87 At satis est poenae teneram mugisse puellam,
88 nec, modo formosam, posse placere Jovi.
89 Adstitit in ripa liquidi nova vacca parentis
90 cornuaque in patriis non sua vidit aquis
91 conatoque loqui mugitus edidit ore
92 territaque est forma, territa voce sua.
93 Quid furis, infelix ? quid te miraris in umbra ?
94 quid numeras factos ad nova membra pedes ?
95 Illa Jovis magni paelex metuenda sorori
96 fronde levas nimiam caespitibusque famem,
97 fonte bibis spectasque tuam stupefacta figuram,
98 et, te ne feriant, quae geris, arma, times,
99 quaeque modo, ut possis etiam Jove digna videri,
100 dives eras, nuda nuda recumbis humo.
101 Per mare, per terras cognataque flumina curris ;
102 dat mare, dant amnes, dat tibi terra viam.
103 Quae tibi causa fugae ? quid tu freta longa pererras ?
104 Non poteris vultus effugere ipsa tuos.
105 Inachi, quo properas ? eadem sequerisque fugisque ;
106 tu tibi dux comiti, tu comes ipsa duci.
107 Per septem Nilus portus emissus in aequor
108 exuit insana paelicis ora bovis.
109 Ultima quid referam, quorum mihi cana senectus
110 auctor ? dant anni, quod querar, ecce mei.
111 Bella pater patruusque gerunt ; regnoque domoque
112 pellimur ; ejectos ultimus orbis habet.
113 [Ille ferox solus solio sceptroque potitur ;
114 cum sene nos inopi turba vagamur inops.]
115 De fratrum populo pars exiguissima restat.
116 Quique dati leto, quaeque dedere, fleo ;
117 nam mihi quot fratres, totidem periere sorores ;
118 accipiat lacrimas utraque turba meas.

119 En, ego, quod vivis, poenae crucianda reservor ;
 120 quid fiet sonti, cum rea laudis agar ?
 121 Et consanguineae quondam centesima summae
 122 infelix uno fratre manente cadam.
 123 At tu, siqua piae, Lynceu, tibi cura sororis,
 124 quaeque tibi tribui munera, dignus habes,
 125 vel fer opem, vel dede neci defunctaque vita
 126 corpora furtivis insuper adde rogis
 127 et sepeli lacrimis perfusa fidelibus ossa,
 128 sculptaque sint titulo nostra sepulcra brevi :
 129 "Exul Hypermestra, pretium pietatis iniquum,
 130 quam mortem fratri depulit, ipsa tulit."
 131 Scribere plura libet, sed pondere lapsa catenae
 132 est manus et vires subtrahit ipse timor.

SAPPHO PHAONI

H_15 v.1 Ecquid, ut adspecta est studiosae littera dextrae,
 2 protinus est oculis cognita nostra tuis ?
 3 An, nisi legisse auctoris nomina Sapphus,
 4 hoc breve nescires unde veniret opus ?
 5 Forsitan et quare mea sint alterna requiras
 6 carmina, cum lyricis sim magis apta modis.
 7 Flendus amor meus est ; elegiae flebile carmen ;
 8 non facit ad lacrimas barbitos ulla meas.
 9 Uror, ut, indomitis ignem exercentibus Euris,
 10 fertilis accensis messibus ardet ager.
 11 Arva Phaon celebrat diversa Typhoidos Aetnae ;
 12 me calor Aetnaeo non minor igne tenet.
 13 Nec mihi dispositis quae jungam carmina nervis
 14 proveniunt ; vacuae carmina mentis opus.
 15 Nec me Pyrrhides Methymniadesve puellae,
 16 nec me Lesbiadum cetera turba juvant.
 17 Vilis Anactorie, vilis mihi candida Cydro ;
 18 non oculis grata est Atthis, ut ante, meis,
 19 atque aliae centum, quas non sine crimine amavi.
 20 Improbe, multarum quod fuit, unus habes.
 21 Est in te facies, sunt apti lusibus anni.
 22 O facies oculis insidiosa meis !
 23 Sume fidem et pharetram, fies manifestus Apollo.
 24 Accedant capiti cornua, Bacchus eris.
 25 Et Phoebus Daphnen, et Cnosida Bacchus amavit.
 26 Nec norat lyricos illa vel illa modos.
 27 At mihi Pegasides blandissima carmina dictant ;
 28 jam canitur toto nomen in orbe meum.
 29 Nec plus Alcaeus, consors patriaeque lyraeque,
 30 laudis habet, quamvis grandius ille sonet.
 31 Si mihi difficilis formam natura negavit,
 32 ingenio formae damna repende meae.
 33 Sum brevis ; at nomen quod terras impleat omnes
 34 est mihi ; mensuram nominis ipsa fero.
 35 Candida si non sum, placuit Cepheia Perseo
 36 Andromede, patriae fusca colore suae.
 37 Et variis albae junguntur saepe columbae ;
 38 et niger a viridi turtur amatur ave.
 39 Si, nisi quae facie poterit te digna videri,

40 nulla futura tua est, nulla futura tua est.
 41 At, mea cum legeres, etiam formosa videbar ;
 42 unam jurabas usque decere loqui.
 43 Cantabam, memini (meminerunt omnia amantes) ;
 44 oscula cantanti tu mihi rapta dabas.
 45 Haec quoque laudabas ; omnique a parte placebam,
 46 sed tunc praecipue, cum fit Amoris opus.
 47 Tunc te plus solito lascivia nostra juvabat,
 48 crebraque mobilitas, aptaque verba joco,
 49 et quod, ubi amborum fuerat confusa voluptas,
 50 plurimus in lasso corpore languor erat.
 51 Nunc tibi Sicelides veniunt, nova praeda, puellae.
 52 Quid mihi cum Lesbo ? Sicelis esse volo,
 53 aut vos erronem tellure remittite vestra,
 54 Nesiades matres Nesiadesque nurus.
 55 Nec vos decipiant blandae mendacia linguae ;
 56 quae dicit vobis, dixerat ante mihi.
 57 Tu quoque, quae montes celebras, Erycina, Sicanos,
 58 (nam tua sum) vati consule, diva, tuae.
 59 An gravis inceptum peragit Fortuna tenorem
 60 et manet in cursu semper acerba suo ?
 61 Sex mihi natales ierant, cum lecta parentis
 62 ante diem lacrimas ossa bibere meas.
 63 Arsit post frater, victus meretricis amore
 64 mixtaque cum turpi damna pudore tulit.
 65 Factus inops agili peragit freta caerulea remo,
 66 quasque male amisit, nunc male quaerit opes.
 67 Me quoque, quod monui bene multa fideliter, odit ;
 68 hoc mihi libertas, hoc pia lingua dedit,
 69 et tamquam desint quae me sine fine fatigent,
 70 accumulat curas filia parva meas.
 71 Ultima tu nostris accedis causa querelis,
 72 non agitur vento nostra carina suo.
 73 Ecce jacent collo sparsi sine lege capilli ;
 74 nec premit articulos lucida gemma meos.
 75 Veste tegor vili ; nullum est in crinibus aurum ;
 76 non Arabum noster dona capillus olet.
 77 Cui colar infelix, aut cui placuisse laborem ?
 78 Ille mei cultus unicus auctor abest.
 79 Molle meum levibusque cor est violabile telis,
 80 et semper causa est, cur ego semper amem ;
 81 sive ita nascenti legem dixere Sorores,
 82 nec data sunt vitae fila severa meae,
 83 sive abeunt studia in mores artisque magistra
 84 ingenium nobis molle Thalia facit.
 85 Quid mirum si me primae lanuginis aetas
 86 abstulit, atque anni quos vir amare potest ?
 87 Hunc ne pro Cephalo raperes, Aurora, timebam,
 88 et faceres, sed te prima rapina tenet.
 89 Hunc si conspiciat, quae conspicit omnia Phoebe,
 90 jussus erit somnos continuare Phaon.
 91 Hunc Venus in caelum curru vexisset eburno ;
 92 sed videt et Marti posse placere suo.
 93 O nec adhuc juvenis, nec jam puer, utilis aetas,
 94 o decus atque aevi gloria magna tui,
 95 huc ades inque sinus, formose, relabere nostros ;
 96 non ut ames oro, me sed amare sinas.
 97 Scribimus et lacrimis oculi rorantur obortis.

98 Adspice quam sit in hoc multa litura loco.
 99 Si tam certus eras hinc ire, modestius isses
 100 et mihi dixisses : "Lesbi puella, vale."
 101 Non tecum lacrimas, non oscula nostra tulisti ;
 102 denique non timui quod dolitura fui.
 103 Nil de te mecum est, nisi tantum injuria ; nec tu
 104 admoneat quod te, pignus amantis habes.
 105 Non mandata dedi ; neque enim mandata dedissem
 106 ulla, nisi ut nolles immemor esse mei.
 107 Per tibi, qui numquam longe discedit, Amorem,
 108 perque novem juro, numina nostra, deas,
 109 cum mihi nescio quis "Fugiunt tua gaudia" dixit,
 110 nec me flere diu, nec potuisse loqui.
 111 et lacrimae deerant oculis et verba palato ;
 112 adstrictum gelido frigore pectus erat.
 113 Postquam se dolor invenit, nec pectora planxi
 114 nec puduit scissis exululare comis,
 115 non aliter quam si nati pia mater adempti
 116 portet ad exstructos corpus inane rogos.
 117 Gaudet et e nostro crescit maerore Charaxus
 118 frater et ante oculos itque reditque meos
 119 utque pudenda mei videatur causa doloris :
 120 "Quid dolet haec ? certe filia vivit, " ait.
 121 Non veniunt in idem pudor atque amor ; omne videbat
 122 vulgus ; eram lacero pectus aperta sinu.
 123 Tu mihi cura, Phaon ; te somnia nostra reducunt,
 124 somnia formoso candidiora die.
 125 Illic te invenio, quamquam regionibus absis ;
 126 sed non longa satis gaudia somnus habet.
 127 Saepe tuos nostra cervice onerare lacertos,
 128 saepe tuae videor supposuisse meos.
 129 Oscula cognosco, quae tu committere linguae
 130 aptaque consueras accipere, apta dare.
 131 Blandior interdum, verisque simillima verba
 132 eloquor, et vigilant sensibus ora meis.
 133 Ulteriora pudet narrare, sed omnia fiunt,
 134 et juvat, et siccae non licet esse mihi.
 135 At cum se Titan ostendit et omnia secum,
 136 tam cito me somnos destituisse queror.
 137 Antra nemusque peto tamquam nemus antraque prosint ;
 138 conscia deliciis illa fuere meis.
 139 Illuc mentis inops, ut quam furialis Enyo
 140 attigit, in collo crine jacente, feror.
 141 Antra vident oculi scabro pendentia topho,
 142 quae mihi Mygdonii marmoris instar erant.
 143 Invenio silvam, quae saepe cubilia nobis
 144 praebuit et multa texit opaca coma.
 145 At non invenio dominum silvaeque meumque :
 146 vile solum locus est ; dos erat ille loci.
 147 Agnovi pressas noti mihi caespitis herbas ;
 148 de nostro curvum pondere gramen erat.
 149 Incubui, tetigique locum qua parte fuisti ;
 150 grata prius lacrimas combibit herba meas ;
 151 quin etiam rami positus lugere videntur
 152 frondibus, et nullae dulce queruntur aves.
 153 Sola virum non ultra pie maestissima mater
 154 concinit Ismarium Daulias ales Ityn.
 155 Ales Ityn, Sappho desertos cantat amores.

156 Hactenus ut media cetera nocte silent.
157 Est nitidus vitroque magis perlucidus amni.
158 Fons sacer ; hunc multi numen habere putant.
159 Quem supra ramos expandit aquatica lotos,
160 una nemus. Tenero caespite terra viret.
161 Hic ego cum lassos posuissem flebilis artus,
162 constitit ante oculos Naias una meos ;
163 constitit et dixit : "Quoniam non ignibus aequis
164 ureris, Ambracia est terra petenda tibi.
165 Phoebus ab excelso, quantum patet, adspicit aequor ;
166 Actiacum populi Leucadiumque vocant.
167 Hinc se Deucalion, Pyrrhae succensus amore,
168 misit, et illaeso corpore pressit aquas.
169 Nec mora, versus amor figit lentissima Pyrrhae
170 pectora ; Deucalion igne levatus abit.
171 Hanc legem locus ille tenet. Pete protinus altam
172 Leucada, nec saxo desiluisse time."
173 Ut monuit, cum voce abiit. Ego frigida surgo ;
174 nec lacrimas oculi continuere mei.
175 Ibimus, o nymphe, monstrataque saxa petemus.
176 Sit procul insano victus amore timor.
177 Quidquid erit, melius quam nunc erit. Aura, subito ;
178 et mea non magnum corpora pondus habent.
179 Tu quoque, mollis Amor, pinnas suppone cadenti,
180 ne sim Leucadiae mortua crimen aquae.
181 Inde chelyn Phoebo, communia munera, ponam,
182 et sub ea versus unus et alter erunt :
183 "Grata lyram posui tibi, Phoebe, poetria Sappho :
184 convenit illa mihi, convenit illa tibi."
185 Cur tamen Actiacas miseram me mittis ad oras,
186 cum profugum possis ipse referre pedem ?
187 Tu mihi Leucadia potes esse salubrior unda ;
188 et forma et meritis tu mihi Phoebus eris.
189 An potes, o scopulis undaque ferocior omni,
190 si moriar, titulum mortis habere meae ?
191 At quanto melius jungi mea pectora tecum,
192 quam poterant saxis praecipitanda dari !
193 Haec sunt illa, Phaon, quae tu laudare solebas,
194 visaue sunt totiens ingeniosa tibi.
195 Nunc vellem facunda forem ; dolor artibus obstat
196 ingeniumque meis substitit omne malis.
197 Non mihi respondent veteres in carmina vires ;
198 plectra dolore jacent, muta dolore lyra est.
199 [Lesbides aequoreae, nupturaque nuptaque proles,
200 Lesbides, Aeolia nomina dicta lyra,]
201 Lesbides, infamem quae me fecistis amatae,
202 desinite ad citharas turba venire mea.
203 Abstulit omne Phaon, quod vobis ante placebat.
204 Me miseram ! dixi quam modo paene "meus."
205 Efficite ut redeat, vates quoque vestra redibit.
206 Ingenio vires ille dat, ille rapit.
207 Ecquid ago precibus ? pectusne agreste movetur ?
208 an riget ? et Zephyri verba caduca ferunt ?
209 Qui mea verba ferunt, vellem tua vela referrent.
210 Hoc te, si saperes, lente, decebat opus.
211 [Sive redis, puppique tuae votiva parantur
212 munera, quid laceras pectora nostra mora ?]
213 Solve ratem. Venus, orta mari, mare praestat amanti.

214 Aura dabit cursum ; tu modo solve ratem.
 215 Ipse gubernabit residens in puppe Cupido ;
 216 ipse dabit tenera vela legetque manu.
 217 Sive juvat longe fugisse Pelasgida Sappho,
 218 nec tamen invenies cur ego digna fuga,
 219 hoc saltem miseræ crudelis epistula dicat,
 220 ut mihi Leucadiae fata petantur aquae.

PARIS HELENÆ

H_16 v.1 Hanc tibi Priamides mitto, Ledaea, salutem,
 2 quae tribui sola te mihi dante potest.
 3 Eloquar an flammae non est opus indice notae
 4 et plus quam vellem, jam meus exstat amor ?
 5 Ille quidem lateat malim, dum tempora dentur
 6 laetitiae mixtos non habitura metus.
 7 Sed male dissimulo ; quis enim celaverit ignem,
 8 lumine qui semper proditur ipse suo ?
 9 Si tamen expectas vocem quoque rebus ut addam,
 10 uror ; habes animi nuntia verba mei.
 11 Parce, precor, fasso nec vultu cetera duro
 12 perlege sed formae conveniente tuae.
 13 Jamque illud gratum est, quod epistula nostra recepta
 14 spem facit hoc recipi me quoque posse modo.
 15 Quae rata sit, nec te frustra promiserit, opto,
 16 hoc mihi quae suasit, mater Amoris, iter.
 17 Namque ego divino monitu (ne nescia pecces)
 18 advehor et coepto non leve numen adest.
 19 Praemia magna quidem, sed non indebita posco ;
 20 pollicita est thalamo te Cytherea meo.
 21 Hac duce Sigeo dubias a litore feci
 22 longa Phereclea per freta puppe vias.
 23 Illa dedit faciles auras ventosque secundos ;
 24 in mare nimirum jus habet orta mari.
 25 Perstet et ut pelagi, sic pectoris adjuvet aestum ;
 26 deferat in portus et mea vota suos.
 27 Attulimus flammæ, non hic invenimus, illas ;
 28 hae mihi tam longae causa fuere viae.
 29 Nam neque tristis hiemps neque nos huc appulit error ;
 30 Taenaris est classi terra petita meae.
 31 Nec me crede fretum merces portante carina
 32 findere (quas habeo, di tueantur opes !)
 33 nec venio Graias veluti spectator ad urbes
 34 (oppida sunt regni divitiora mei) ;
 35 te peto, quam pepigit lecto Venus aurea nostro ;
 36 te prius optavi quam mihi nota fores ;
 37 ante tuos animo vidi quam lumine vultus ;
 38 prima tulit vulnus nuntia fama tui.
 39 [Nec tamen est mirum, si, sicut oportet, ab arcu
 40 missilibus telis eminus ictus amo.]
 41 Sic placuit fatis ; quae ne convellere temptes,
 42 accipe cum vera dicta relata fide.
 43 Matris adhuc utero partu remorante tenebar
 44 (jam gravidus justo pondere venter erat) ;
 45 illa sibi ingentem visa est sub imagine somni
 46 flammiferam pleno reddere ventre facem.

47 Territa consurgit metuendaque noctis opacae
 48 visa seni Priamo, vatibus ille refert.
 49 Arsurum Paridis vates canit Ilion igni ;
 50 pectoris, ut nunc est, fax fuit illa mei.
 51 Forma vigorque animi, quamvis de plebe videbar,
 52 indicium tectae nobilitatis erat.
 53 Est locus in mediis nemorosae vallibus Idae
 54 devius et piceis illicibusque frequens,
 55 qui nec ovis placidae nec amantis saxa capellae,
 56 nec patulo tardae carpitur ore bovis.
 57 Hinc ego Dardaniae muros excelsaque tecta
 58 et freta prospiciens arbore nixus eram.
 59 Ecce pedum pulsu visa est mihi terra moveri
 60 (vera loquar veri vix habitura fidem) ;
 61 constitit ante oculos actus velocibus alis
 62 Atlantis magni Pleionesque nepos
 63 (fas vidisse fuit, fas sit mihi visa referre)
 64 inque dei digitis aurea virga fuit,
 65 tresque simul divae, Venus et cum Pallade Juno,
 66 graminibus teneros inposuere pedes.
 67 Obstupui, gelidusque comas erexerat horror,
 68 cum mihi : "Pone metum, nuntius ales ait ;
 69 "arbiter es formae ; certamina siste dearum :
 70 vincere quae forma digna sit una duas."
 71 Neve recusarem, verbis Jovis imperat et se
 72 protinus aetheria tollit in astra via.
 73 Mens mea convaluit subitoque audacia venit
 74 nec timui vultu quamque notare meo.
 75 Vincere erant omnes dignae iudexque querebar
 76 non omnes causam vincere posse suam.
 77 Sed tamen ex illis jam tunc magis una placebat,
 78 hanc esse ut scires, unde movetur amor
 79 tantaque vincendi cura est. Ingentibus ardent
 80 iudicium donis sollicitare meum.
 81 Regna Jovis conjunx, virtutem filia jactat ;
 82 ipse potens dubito fortis an esse velim.
 83 Dulce Venus risit : "Ne te, Pari, munera tangant
 84 utraque suspensi plena timoris, ait ;
 85 "nos dabimus quod ames et pulchrae filia Leda
 86 ibit in amplexus pulchrior illa tuos."
 87 Dixit et ex aequo donis formaque probata
 88 victorem caelo rettulit illa pedem.
 89 Interea, sero versis ad prospera fati,
 90 regius agnoscor per rata signa puer.
 91 Laeta domus nato per tempora longa recepto
 92 addit et ad festos hunc quoque Troja diem.
 93 Utque ego te cupio, sic me cupiere puellae ;
 94 multarum votum sola tenere potes.
 95 Nec tantum regum natae petiere ducumque,
 96 sed nymphis etiam curaque amorque fui ;
 97 [quas super Oenonen facies mutarer : in orbe
 98 nec Priamo est a te dignior ulla nurus.]
 99 Sed mihi cunctarum subeunt fastidia, postquam
 100 conjugii spes est, Tyndari, facta tui.
 101 Te vigilans oculis, animo te nocte videbam,
 102 lumina cum placido victa sopore jacent.
 103 Quid facies praesens quae nondum visa placebas ?
 104 Ardebam, quamvis hinc procul ignis erat.

105 Nec potui debere mihi spem longius istam,
106 caerulea peterem quin mea vota via.
107 Troja caeduntur Phrygia pineta securi
108 quaeque erat aequoreis utilis arbor aquis ;
109 ardua proceris spoliantur Gargara silvis
110 innumerasque mihi longa dat Ida trabes ;
111 fundatura citas flectuntur robora naves,
112 textitur et costis panda carina suis.
113 Addimus antennas et vela sequentia malis
114 accipit et pictos puppis adunca deos ;
115 qua tamen ipse vehor, comitata Cupidine parvo
116 sponsor conjugii stat dea picta sui.
117 Imposita est factae postquam manus ultima classi
118 protinus Aegaeis ire lubebat aquis.
119 At pater et genetrix inhihent mea vota rogando
120 propositumque pia voce morantur iter,
121 et soror, effusis ut erat, Cassandra, capillis,
122 cum vellent nostrae jam dare vela rates :
123 "Quo ruis ? " exclamat ; "referes incendia tecum.
124 Quanta per has nescis flamma petatur aquas ! "
125 Vera fuit vates : dictos invenimus ignes
126 et ferus in molli pectore flagrat amor.
127 Portubus egredior ventisque ferentibus usus
128 applicor in terras, Oebalinympha, tuas.
129 Excipit hospitio vir me tuus ; hoc quoque factum
130 non sine consilio numinibusque deum.
131 Ille quidem ostendit quidquid Lacedaemone tota
132 ostendi dignum conspicuumque fuit,
133 sed mihi laudatam cupienti cernere formam
134 lumina nil aliud quo caperentur erat.
135 Ut vidi, obstipui praecordiaque intima sensi
136 attonitus curis intumuisse novis.
137 His similes vultus, quantum reminiscor, habebat
138 venit in arbitrium cum Cytherea meum.
139 Si tu venisses pariter certamen in illud,
140 in dubium Veneris palma futura fuit.
141 Magna quidem de te rumor praeconia fecit,
142 nullaque de facie nescia terra tua est ;
143 nec tibi par usquam Phrygia nec solis ab ortu
144 inter formosas altera nomen habet.
145 Crede sed hoc nobis, minor est tua gloria vero,
146 famaue de forma paene maligna tua est ;
147 plus hic invenio quam quod promiserat illa
148 et tua materia gloria victa sua est.
149 Ergo arsit merito, qui noverat omnia, Theseus,
150 et visa es tanto digna rapina viro,
151 more tuae gentis nitida dum nuda palaestra
152 ludis et es nudis femina mixta viris.
153 Quod rapuit, laudo ; miror quod reddidit umquam :
154 tam bona constanter praeda tenenda fuit.
155 Ante recessisset caput hoc cervice cruenta
156 quam tu de thalamis abstraherere meis.
157 Tene manus umquam nostrae dimittere vellent !
158 Tene meo paterer vivus abire sinu !
159 [Si reddenda fores, aliquid tamen ante tulissem,
160 nec Venus ex toto nostra fuisset iners ;
161 vel mihi virginitas esset libata vel illud
162 quod poterat salva virginitate rapi.]

163 Da modo te ; quae sit Paridis constantia nosces ;
 164 flamma rogi flammis finiet una meas.
 165 Praeposui regnis ego te, quae maxima quondam
 166 pollicita est nobis nupta sororque Jovis,
 167 dumque tuo possem circumdare brachia collo,
 168 contempta est virtus Pallade dante mihi.
 169 Nec piget aut umquam stulte legisse videbor ;
 170 permanet in voto mens mea firma suo.
 171 Spem modo ne nostram fieri patiare caducam,
 172 deprecor, o tanto digna labore peti !
 173 Non ego conjugium generosae degener opto,
 174 nec mea, crede mihi, turpiter uxor eris :
 175 Pliada, si quaeres, in nostra gente Jovemque
 176 invenies, medios ut taceamus avos.
 177 Sceptra parens Asiae, qua nulla beatior ora est,
 178 finibus immensis vix obeunda, tenet.
 179 Innumeras urbes atque aurea tecta videbis
 180 quaeque suos dicas templa decere deos.
 181 Ilion adspicies firmataque turribus altis
 182 moenia, Phoebeae structa canore lyrae.
 183 Quid tibi de turba narrem numeroque virorum ?
 184 Vix populum tellus sustinet illa suum.
 185 Occurrent denso tibi Troades agmine matres
 186 nec capient Phrygias atria nostra nurus.
 187 O quotiens dices "Quam pauper Achaia nostra est ! " :
 188 una domus quaevis urbis habebit opes.
 189 Nec mihi fas fuerit Sparten contemnere vestram ;
 190 in qua tu nata es, terra beata mihi est.
 191 Parca sed est Sparte, tu cultu divite digna ;
 192 ad talem formam non facit iste locus.
 193 Hanc faciem largis sine fine paratibus uti
 194 deliciisque decet luxuriare novis.
 195 Cum videas cultus nostra de gente virorum,
 196 qualem Dardanias credis habere nurus ?
 197 Da modo te facilem nec dedignare maritum,
 198 rure Therapnaeo nata puella, Phrygem.
 199 Phryx erat et nostro genitus de sanguine, qui nunc
 200 cum dis potando nectare miscet aquas.
 201 Phryx erat Aurorae conjunx ; tamen abstulit illum
 202 extremum Noctis quae dea finit iter.
 203 Phryx etiam Anchises, volucrum cui mater Amorum
 204 gaudet in Idaeis concubuisse jugis.
 205 Nec, puto, conlatis forma Menelaus et annis
 206 iudice te nobis anteferendus erit.
 207 Non dabimus certe socerum tibi clara fugantem
 208 lumina, qui trepidos a dape vertat equos,
 209 nec Priamo pater est soceri de caede cruentus
 210 et qui Myrtoas crimine signat aquas,
 211 nec proavo Stygia nostro captantur in unda
 212 poma nec in mediis quaeritur umor aquis.
 213 Quid tamen hoc refert ? Si te tenet ortus ab illis,
 214 cogitur huic domui Juppiter esse socer.
 215 Heu facinus ! totis indignus noctibus ille
 216 te tenet amplexu perfruiturque tuo ;
 217 at mihi conspiceris posita vix denique mensa,
 218 multaque, quae laedant, hoc quoque tempus habet.
 219 Hostibus eveniant convivia talia nostris,
 220 experior posito qualia saepe mero.

221 Paenitet hospitii, cum me spectante lacertos
 222 imponit collo rusticus iste tuo.
 223 Rumpor et invidia (quidni tamen omnia narrem ?)
 224 membra superjecta cum tua veste fovet.
 225 Oscula cum vero coram non dura daretis,
 226 ante oculos posui pocula sumpta meos ;
 227 lumina demitto, cum te tenet artius ille,
 228 crescit et invito lentus in ore cibus.
 229 Saepe dedi gemitus et te, lasciva, notavi
 230 in gemitu risum non tenuisse meo.
 231 Saepe mero volui flammam compescere, at illa
 232 crevit et ebrietas ignis in igne fuit.
 233 Multaque ne videam, versa cervice recumbo,
 234 sed revocas oculos protinus ipsa meos.
 235 Quid faciam, dubito ; dolor est meus illa videre
 236 sed dolor a facie major abesse tua.
 237 Qua licet et possum, luctor celare furorem,
 238 sed tamen apparet dissimulatus amor.
 239 Nec tibi verba damus ; sentis mea vulnera, sentis.
 240 Atque utinam soli sint ea nota tibi !
 241 A ! quotiens lacrimis venientibus ora reflexi,
 242 ne causam fletus quaereret ille mei.
 243 A ! quotiens aliquem narravi potus amorem,
 244 ad vultus referens singula verba tuos,
 245 indiciumque mei ficto sub nomine feci!
 246 Ille ego, si nescis, verus amator eram.
 247 Quin etiam, ut possem verbis petulantius uti,
 248 non semel ebrietas est simulata mihi.
 249 Proditae sunt, memini, tunica tua pectora laxa
 250 atque oculis aditum nuda dedere meis,
 251 pectora vel puris nivibus vel lacte tuamque
 252 complexo matrem candidiora Jove.
 253 Dum stupeo visis (nam pocula forte tenebam),
 254 tortilis a digitis excidit ansa meis.
 255 Oscula si natae dederas, ego protinus illa
 256 Hermiones tenero laetus ab ore tuli.
 257 Et modo cantabam veteres resupinus amores,
 258 et modo per nutum signa tegenda dabam.
 259 Et comitum primas Clymenen Aethramque, tuarum
 260 ausus sum blandis nuper adire sonis,
 261 quae mihi non aliud, quam formidare locutae
 262 orantis medias deseruere preces.
 263 Di facerent pretium magni certaminis esses,
 264 teque suo posset victor habere toro,
 265 ut tulit Hippomenes Schoeneida praemia cursus,
 266 venit ut in Phrygios Hippodamia sinus,
 267 ut ferus Alcides Acheloia cornua fregit,
 268 dum petit amplexus, Deianira, tuos.
 269 Nostra per has leges audacia fortiter isset,
 270 teque mei scires esse laboris opus.
 271 Nunc mihi nil superest, nisi te, formosa, precari
 272 amplectique tuos, si patiare, pedes.
 273 O decus, o praesens geminorum gloria fratrum,
 274 o Jove digna viro, ni Jove nata fores,
 275 aut ego Sigeos repetam te conjuge portus,
 276 aut hic Taenaria contegar exul humo.
 277 Non mea sunt summa leviter destructa sagitta
 278 pectora ; descendit vulnus ad ossa meum.

279 Hoc mihi (nam repeto) fore ut a caeleste sagitta
 280 figar, erat verax vaticinata soror.
 281 Parce datum fatis, Helene, contemnere amorem.
 282 Sic habeas faciles in tua vota deos !
 283 Multa quidem subeunt, sed coram ut plura loquamur,
 284 excipe me lecto nocte silente tuo.
 285 An pudet et metuis Venerem temerare maritam
 286 castaque legitimi fallere jura tori ?
 287 A ! nimium simplex Helene, ne rustica dicam,
 288 hanc faciem culpa posse carere putas ?
 289 Aut faciem mutes aut sis non dura, necesse est ;
 290 lis est cum forma magna pudicitiae.
 291 Juppiter his gaudet, gaudet Venus aurea furtis ;
 292 haec tibi nempe patrem furta dedere Jovem.
 293 Vix fieri, si sunt vires in semine avorum,
 294 et Jovis et Ladae filia, casta potes.
 295 Casta tamen tum sis, cum te mea Troja tenebit,
 296 et tua sim, quaeso, crimina solus ego.
 297 Nunc ea peccemus quae corriget hora jugalis,
 298 si modo promisit non mihi vana Venus.
 299 Sed tibi et hoc suadet rebus, non voce maritus,
 300 neve sui furtis hospitis obstet, abest.
 301 Non habuit tempus, quo Cresia regna videret,
 302 aptius (o mira calliditate virum !)
 303 cessit et "Idaei mando tibi, dixit iturus,
 304 curam pro nobis hospitis, uxor, agas."
 305 Nec legis absentis, testor, mandata mariti ;
 306 cura tibi non est hospitis ulla tui.
 307 Huncine tu speras hominem sine pectore dotes
 308 posse satis formae, Tyndari, nosse tuae ?
 309 Falleris ; ignorat, nec, si bona magna putaret,
 310 quae tenet, externo crederet illa viro.
 311 Ut te nec mea vox nec te meus incitet ardor,
 312 cogimur ipsius commoditate frui,
 313 aut erimus stulti, sic ut superemus et ipsum,
 314 si tam securum tempus abibit iners.
 315 Paene suis ad te manibus deducit amantem ;
 316 utere mandantis simplicitate viri.
 317 Sola jaces viduo tam longa nocte cubili,
 318 in viduo jaceo solus et ipse toro :
 319 te mihi meque tibi communia gaudia jungant,
 320 candidior medio nox erit illa die.
 321 Tunc ego jurabo quaevis tibi numina meque
 322 adstringam verbis in sacra jura tuis ;
 323 tunc ego, si non est fallax fiducia nostra,
 324 efficiam praesens ut mea regna petas.
 325 Si pudet et metuis ne me videare secuta,
 326 ipse reus sine te criminis hujus ero.
 327 Nam sequar Aegidae factum fratrumque tuorum ;
 328 exemplo tangi non propiore potes.
 329 Te rapuit Theseus, geminas Leucippidas illi ;
 330 quartus in exemplis adnumerabor ego.
 331 Troja classis adest armis instructa virisque ;
 332 jam facient celeres remus et aura vias.
 333 Ibis Dardanias ingens regina per urbes,
 334 teque novam credet vulgus adesse deam,
 335 quaque ferēs gressus, adolebunt cinnama flammae,
 336 caesaque sanguineam victima planget humum.

337 Dona pater fratresque et cum genetrice sorores
 338 Iliadesque omnes totaque Troja dabit.
 339 Ei mihi ! pars a me vix dicitur ulla futuri ;
 340 plura feres quam quae littera nostra refert.
 341 Nec tu rapta time ne nos fera bella sequantur,
 342 concitet et vires Graecia magna suas.
 343 Tot prius abductis ecqua est repetita per arma ?
 344 Crede mihi, vanos res habet ista metus.
 345 Nomine ceperunt Aquilonis Erechthida Thraces,
 346 et tuta a bello Bistonis ora fuit ;
 347 Phasida puppe nova vexit Pagasaeus Iason,
 348 laesa neque est Colcha Thessala terra manu ;
 349 te quoque qui rapuit, rapuit Minoida Theseus ;
 350 nulla tamen Minos Cretas ad arma vocat.
 351 Terror in his ipso major solet esse periclo ;
 352 quaeque timere libet, pertimuisse pudet.
 353 Finge tamen, si vis, ingens consurgere bellum ;
 354 et mihi sunt vires, et mea tela nocent.
 355 Nec minor est Asiae quam vestrae copia terrae ;
 356 illa viris dives, dives abundat equis.
 357 Nec plus Atrides animi Menelaus habebit
 358 quam Paris, aut armis antefendus erit.
 359 Paene puer caesis abducta armenta recepi
 360 hostibus et causam nominis inde tuli ;
 361 paene puer juvenes vario certamine vici,
 362 in quibus Ilioneus Deiphobusque fuit.
 363 Neve putes, non me nisi comminus esse timendum,
 364 figitur in jusso nostra sagitta loco.
 365 Non potes haec illi primae dare facta juventae ;
 366 instruere Atriden num potes arte mea.
 367 Omnia si dederis, numquid dabis Hectora fratrem ?
 368 Unus is innumeri militis instar erit.
 369 Quid valeam nescis, et te mea robora fallunt ;
 370 ignoras cui sis nupta futura viro.
 371 Aut igitur nullo belli repetere tumultu,
 372 aut cedent Marti Dorica castra meo.
 373 Nec tamen indignus pro tanta sumere ferrum
 374 conjugis ; certamen praemia magna movent.
 375 Tu quoque, si de te totus contenderit orbis,
 376 nomen ab aeterna posteritate feres ;
 377 spe modo non timida dis hinc egressa secundis
 378 exige cum plena munera pacta fide.

HELENE PARIDI

H_17 v.1 [Si mihi quae legi, Pari, non legisse liceret,
 2 servarem numeros sicut et ante probae.]
 3 Nunc oculos tua cum violarit epistula nostros,
 4 non rescribendi gloria visa levis.
 5 Ausus es hospitii temeratis, advena, sacris
 6 legitimam nuptae sollicitare fidem.
 7 Scilicet idcirco ventosa per aequora vectum
 8 excepit portu Taenaris ora suo,
 9 nec tibi, diversa quamvis e gente venires,
 10 oppositas habuit regia nostra fores,
 11 esset ut officii merces injuria tanti ?

12 Qui sic intrabas, hospes an hostis eras ?
 13 Nec dubito quin haec, cum sit tam justa, vocetur
 14 rustica iudicio nostra querela tuo.
 15 Rustica sim sane, dum non oblita pudoris,
 16 dumque tenor vitae sit sine labe meae.
 17 Si non est ficto tristis mihi vultus in ore
 18 nec sedeo duris torva superciliis,
 19 fama tamen clara est, et adhuc sine crimine lusi
 20 et laudem de me nullus adulter habet.
 21 Quo magis admiror quae sit fiducia coepti,
 22 spemque tori dederit quae tibi causa mei.
 23 An, quia vim nobis Neptunius attulit heros,
 24 rapta semel videor bis quoque digna rapi ?
 25 Crimen erat nostrum, si delinita fuisset ;
 26 cum sim rapta, meum quid nisi nolle fuit ?
 27 Non tamen a facto fructum tulit ille petitum ;
 28 excepto redii passa timore nihil.
 29 Oscula luctanti tantummodo pauca protervus
 30 abstulit ; ulterius nil habet ille mei.
 31 [Quae tua nequitia est, non his contenta fuisset ;
 32 di melius ! similis non fuit ille tui.]
 33 Reddidit intactam, minuitque modestia crimen,
 34 et juvenem facti paenituisse patet.
 35 Thesea paenituit, Paris ut succederet illi,
 36 ne quando nomen non sit in ore meum ?
 37 Nec tamen irascor (quis enim succenset amanti ?)
 38 si modo, quem praefers, non simulatur amor.
 39 Hoc quoque enim dubito, non quod fiducia desit,
 40 aut mea sit facies non bene nota mihi,
 41 sed quia credulitas damno solet esse puellis,
 42 verbaque dicuntur vestra carere fide.
 43 "At peccant aliae matronaque rara pudica est."
 44 Quis prohibet raris nomen inesse meum ?
 45 Nam mea quod visa est tibi mater idonea cujus
 46 exemplo flecti me quoque posse putes,
 47 matris in admissio falsa sub imagine lusae
 48 error inest ; pluma tectus adulter erat ;
 49 nil ego, si peccem, possum nescisse, nec ullus
 50 error, qui facti crimen obumbret, erit ;
 51 illa bene erravit vitiumque auctore redemit ;
 52 felix in culpa quo Jove dicar ego ?
 53 Et genus et proavos et regia nomina jactas.
 54 Clara satis domus haec nobilitate sua est ;
 55 Juppiter ut soceri proavus taceatur et omne
 56 Tantalidae Pelopis Tyndareique decus,
 57 dat mihi Leda Jovem cygno decepta parentem,
 58 quae falsam gremio credula fovit avem.
 59 I nunc et Phrygiae late primordia gentis
 60 cumque suo Priamum Laomedonte refer.
 61 Quos ego suspicio, sed qui tibi gloria magna est
 62 quintus, is a nostro nomine primus erit.
 63 Sceptra tuae quamvis rear esse potentia terrae,
 64 non tamen haec illis esse minora puto.
 65 Si jam divitiis locus hic numeroque virorum
 66 vincitur, at certe barbara terra tua est.
 67 Munera tanta quidem promittit epistula dives,
 68 ut possint ipsas illa movere deas.
 69 Sed si jam vellem fines transire pudoris,

70 tu melior culpae causa futurus eras.
 71 Aut ego perpetuo famam sine labe tenebo,
 72 aut ego te potius quam tua dona sequar,
 73 utque ea non sperno, sic acceptissima semper
 74 munera sunt, auctor quae pretiosa facit.
 75 Plus multo est quod amas, quod sum tibi causa laboris,
 76 quod tam per longas spes tua venit aquas.
 77 Illa quoque, adposita quae nunc facis, improbe, mensa
 78 quamvis experiar dissimulare, noto,
 79 cum modo me spectas oculis, lascive, protervis,
 80 quos vix instantes lumina nostra ferunt,
 81 et modo suspiras, modo pocula proxima nobis
 82 sumis, quaque bibi, tu quoque parte bibis.
 83 A ! quotiens digitis, quotiens ego tecta notavi
 84 signa supercilio paene loquente dari !
 85 Et saepe extimui ne vir meus illa videret,
 86 non satis occultis erubique notis.
 87 Saepe vel exiguo vel nullo murmure dixi :
 88 "Nil pudet hunc", nec vox haec mea falsa fuit.
 89 Orbe quoque in mensae legi sub nomine nostro,
 90 quod deducta mero littera fecit, "amo."
 91 Credere me tamen hoc oculo renuente negavi.
 92 Ei mihi ! jam didici sic ego posse loqui.
 93 His ego blanditiis, si peccatura fuisset,
 94 flecterer ; his poterant pectora nostra capi.
 95 Est quoque, confiteor, facies tibi rara, potestque
 96 velle sub amplexus ire puella tuos.
 97 Altera sed potius felix sine crimine fiat,
 98 quam cadat externo noster amore pudor.
 99 Disce modo exemplo formosis posse carere ;
 100 est virtus placitis abstinuisse bonis.
 101 Quam multos credis juvenes optare quod optas
 102 qui sapiant ? oculos an Paris unus habes ?
 103 Non tu plus cernis, sed plus temerarius audes,
 104 nec tibi plus cordis sed magis oris adest.
 105 Tunc ego te vellem celeri venisse carina,
 106 cum mea virginitas mille petita procis ;
 107 si te vidissem, primus de mille fuisses ;
 108 iudicio veniam vir dabit ipse meo.
 109 Ad possessa venis praeceptaque gaudia serus ;
 110 spes tua lenta fuit ; quod petis, alter habet.
 111 [Ut tamen optarem fieri tua Troica conjunx,
 112 invitam sic me nec Menelaus habet.]
 113 Desine molle, precor, verbis convellere pectus
 114 neve mihi, quam te dicis amare, noce,
 115 me sine, quam tribuit sortem fortuna, tueri
 116 nec spoliū nostri turpe pudoris ave.
 117 At Venus hoc pacta est, et in altae vallibus Idae
 118 tres tibi se nudas exhibuere deae,
 119 unaque cum regnum, belli daret altera laudem,
 120 "Tyndaridis conjunx," tertia dixit, "eris."
 121 Credere vix equidem caelestia corpora possum
 122 arbitrio formam supposuisse tuo,
 123 utque sit hoc verum, certe pars altera ficta est,
 124 iudicii pretium qua data dicor ego.
 125 Non est tanta mihi fiducia corporis ut me
 126 maxima teste dea dona fuisse putem.
 127 Contenta est oculis hominum mea forma probari ;

128 laudatrix Venus est invidiosa mihi.
 129 Sed nihil infirmo, faveo quoque laudibus istis ;
 130 nam mea vox quare, quod cupit esse, neget ?
 131 Nec tu succense, nimium mihi creditus aegre ;
 132 tarda solet magnis rebus inesse fides.
 133 Prima mea est igitur Veneri placuisse voluptas,
 134 proxima me visam praemia summa tibi,
 135 nec te Palladios nec te Junonis honores
 136 auditis Helenae praeposuisse bonis.
 137 Ergo ego sum virtus, ego sum tibi nobile regnum.
 138 Ferrea sim, si non hoc ego pectus amem.
 139 Ferrea, crede mihi, non sum ; sed amare repugno
 140 illum, quem fieri vix puto posse meum.
 141 Quid bibulum curvo proscindere litus aratro
 142 spemque sequi coner, quam locus ipse negat ?
 143 Sum rudis ad Veneris furtum nullaque fidelem
 144 (di mihi sunt testes) lusimus arte virum.
 145 Nunc quoque, quod tacito mando mea verba libello,
 146 fungitur officio littera nostra novo.
 147 Felices, quibus usus adest ! Ego nescia rerum
 148 difficilem culpae suspicor esse viam.
 149 Ipse malo metus est ; jam nunc confundor et omnes
 150 in nostris oculos vultibus esse reor.
 151 Nec reor hoc falso ; sensi malamurmura vulgi,
 152 et quasdam voces rettulit Aethra mihi.
 153 At tu dissimula, nisi si desistere mavis.
 154 Sed cur desistas ? dissimulare potes.
 155 Lude, sed occulte. Major, non maxima, nobis
 156 est data libertas, quod Menelaus abest.
 157 Ille quidem procul est, ita re cogente, profectus ;
 158 magna fuit subitae justae causa viae ;
 159 aut mihi sic visum est. Ego, cum dubitaret an iret :
 160 "Quam primum, dixi, fac rediturus eas."
 161 Omne laetatus dedit oscula, "resque domusque
 162 et tibi sit curae Troicus hospes" ait.
 163 Vix tenui risum, quem dum conpescere luctor,
 164 nil illi potui dicere praeter "erit."
 165 Vela quidem Creten ventis dedit ille secundis ;
 166 sed tu non ideo cuncta licere puta.
 167 Sic meus hinc vir abest ut me custodiat absens.
 168 An nescis longas regibus esse manus ?
 169 Forma quoque est oneri ; nam quo constantius ore
 170 laudamur vestro, justius ille timet.
 171 Quae juvat, ut nunc est, eadem mihi gloria damno est,
 172 et melius famae verba dedisse fuit.
 173 Nec quod abest hic me tecum mirare relictam ;
 174 moribus et vitae credidit ille meae.
 175 De facie metuit, vitae confidit, et illum
 176 securum probitas, forma timere facit.
 177 Tempora ne pereant ultro data praecipis, utque
 178 simplicis utamur commoditate viri.
 179 Et libet et timeo, nec adhuc exacta voluntas
 180 est satis ; in dubio pectora nostra labant.
 181 Et vir abest nobis et tu sine conjuge dormis,
 182 inque vicem tua me, te mea forma capit ;
 183 et longae noctes, et jam sermone coimus,
 184 et tu, me miseram ! blandus, et una domus.
 185 Ah ! peream, si non invitant omnia culpam ;

186 nescio quo tardor sed tamen ipsa metu.
187 Quod male persuades, utinam bene cogere posses !
188 vi mea rusticitas excutienda fuit.
189 Utilis interdum est ipsis injuria passis ;
190 sic certe felix esse coacta forem.
191 Dum novus est, potius coepto pugnemus amori ;
192 flamma recens parva sparsa resedit aqua.
193 Certus in hospitibus non est amor : errat, ut ipsi,
194 cumque nihil speres firmitus esse, fugit.
195 Hypsipyle testis, testis Minoia virgo est,
196 in non exhibitis utraque lusa toris.
197 Tu quoque dilectam multos, infide, per annos
198 diceris Oenonen destituisse tuam ;
199 nec tamen ipse negas, et nobis omnia de te
200 quaerere, si nescis, maxima cura fuit.
201 Adde quod, ut cupias constans in amore manere,
202 non potes ; expediunt jam tua vela Phryges.
203 Dum loqueris mecum, dum nox sperata paratur,
204 qui ferat in patriam, jam tibi ventus erit.
205 Cursibus in mediis novitatis plena relinques
206 gaudia ; cum ventis noster abibit amor.
207 An sequar, ut suades, laudataque Pergama visam
208 pronurus et magni Laomedontis ero ?
209 Non ita contemno volucris praeconia famae,
210 ut probris terras impleat illa meis.
211 Quid de me poterit Sparte, quid Achaia tota,
212 quid gentes Asiae, quid tua Troja loqui ?
213 Quid de me poterit Sparte, quid Achaia tota,
214 totque tui fratres Dardanidesque nurus ?
215 Tu quoque qui poteris fore me sperare fidelem
216 et non exemplis anxius esse tuis ?
217 Quicumque Iliacos intraverit advena portus,
218 is tibi solliciti causa timoris erit.
219 Ipse mihi quotiens iratus "adultera" dices,
220 oblitus nostro crimen inesse tuum !
221 Delicti fies idem reprehensor et auctor.
222 Terra, precor, vultus obruat ante meos !
223 At fruar Iliacis opibus cultuque beato
224 donaque promissis uberiora feram,
225 purpura nempe mihi pretiosaque texta dabuntur,
226 congestoque auri pondere dives ero.
227 Da veniam fassae. Non sunt tua munera tanti ;
228 nescio quo tellus me tenet ista modo.
229 Quis mihi, si laedar, Phrygiis succurret in oris ?
230 Unde petam fratres, unde parentis opem ?
231 Omnia Medae fallax promisit Iason :
232 pulsa est Aesonia num minus illa domo ?
233 Non erat Aetes, ad quem despecta rediret,
234 non Idyia parens Chalchiopeque soror.
235 Tale nihil timeam. Sed nec Medea timebat.
236 Fallitur augurio spes bona saepe suo.
237 Omnibus invenies, quae nunc jactantur in alto,
238 navibus a portu lene fuisse fretum.
239 Fax quoque me terret, quam se peperisse cruentam
240 ante diem partus est tua visa parens ;
241 et vatam timeo monitus, quos igne Pelasgo
242 Ilion arsurum praemonuisse ferunt.
243 Utque favet Cytherea tibi, quia vicit habetque

244 parta per arbitrium bina tropaea tuum,
 245 sic illas vereor, quae, si tua gloria vera est,
 246 iudice te causam non tenuere duae.
 247 [Nec dubito quin, te si prosequar, arma parentur ;
 248 ibit per gladios, ei mihi ! noster amor.]
 249 An fera Centauris indicere bella coegit
 250 Atracis Haemonios Hippodamia viros ;
 251 tu fore tam justa lentum Menelaon in ira
 252 et geminos fratres Tyndareumque putas ?
 253 Quod bene te jactes et fortia facta loquaris,
 254 a verbis facies dissidet ista tuis ;
 255 apta magis Veneri quam sunt tua corpora Marti.
 256 Bella gerant fortes ; tu, Pari, semper ama.
 257 Hectora, quem laudas, pro te pugnare iubeto ;
 258 militia est operis altera digna tuis.
 259 His ego, si saperem pauloque audacior essem,
 260 uterer ; utetur, siqua puella sapit.
 261 Ast ego deposito faciam fortasse pudore
 262 et dabo cunctatas tempore victa manus.
 263 Quod petis, ut furtim praesentes ista loquamur,
 264 scimus quid captes conloquiumque voces ;
 265 sed nimium properas, et adhuc tua messis in herba est.
 266 Haec mora sit voto forsitan amica tuo.
 267 Hactenus arcanum furtivae conscia mentis
 268 littera jam lasso pollice sistat opus.
 269 Cetera per socias Clymenen Aethramque loquamur,
 270 quae mihi sunt comites consiliumque duae.

LEANDER HERONI

H_18 v.1 [Quam cuperem solitas, Hero, tibi ferre per undas
 2 accipe Leandri, dum venit ipse, manum.
 3 Mittit Abydenus, quam mallet ferre, salutem,
 4 si cadat unda maris, Sesti puella, tibi.]
 5 Si mihi di faciles si sunt in amore secundi,
 6 invitis oculis haec mea verba leges.
 7 Sed non sunt faciles ; nam cur mea vota morantur,
 8 currere me nota nec patiuntur aqua ?
 9 Ipsa vides caelum pice nigrius et freta ventis
 10 turbida perque cavas vix adeunda rates.
 11 Unus, et hic audax, a quo tibi littera nostra
 12 redditur, e portu navita movit iter.
 13 Ascensurus eram, nisi quod, cum vincula prorae
 14 solveret, in speculis omnis Abydos erat.
 15 Non poteram celare meos, velut ante, parentes,
 16 quemque tegi volumus, non latuisset amor.
 17 Protinus haec scribens : "Felix, i, littera, dixi ;
 18 jam tibi formosam porriget illa manum.
 19 Forsitan admotis etiam tangere labellis,
 20 rumpere dum niveo vincula dente volet."
 21 Talibus exiguo dictis mihi murmure verbis
 22 cetera cum charta dextra locuta mea est.
 23 At quanto mallet, quam scriberet, illa nataret,
 24 meque per adsuetas sedula ferret aquas !
 25 [Aptior illa quidem placido dare verbera ponto ;
 26 est tamen et sensus apta ministra mei.]

27 Septima nox agitur, spatium mihi longius anno,
28 sollicitum raucis ut mare fervet aquis.
29 His ego si vidi mulcentem pectora somnum
30 noctibus, insani sit mora longa freti !
31 Rupe sedens aliqua specto tua litora tristis,
32 et, quo non possum corpore, mente feror.
33 Lumina quin etiam summa vigilantia turre
34 aut videt aut acies nostra videre putat.
35 Ter mihi deposita est in sicca vestis harena ;
36 ter grave temptavi carpere nudus iter ;
37 obstitit inceptis tumidum juvenalibus aequor,
38 mersit et adversis ora natantis aquis.
39 At tu, de rapidis inmansuetissime ventis,
40 quid mecum certa proelia mente geris ?
41 In me, si nescis, Borea, non aequora, saevis.
42 Quid faceres, esset ni tibi notus amor ?
43 Tam gelidus quod sis, num te tamen, improbe, quondam
44 ignibus Actaeis incaluisse negas ?
45 Gaudia rapturo siquis tibi claudere vellet
46 aereos aditus, quo paterere modo ?
47 Parce, precor, facilemque move moderatius auram.
48 Imperet Hippotades sic tibi triste nihil.
49 Vana peto, precibusque meis obmurmurat ipse,
50 quasque quatit, nulla parte coercet aquas.
51 Nunc daret audaces utinam mihi Daedalus alas,
52 Icarium quamvis hinc prope litus abest.
53 Quidquid erit, patiar, liceat modo corpus in auras
54 tollere, quod dubia saepe pependit aqua.
55 Interea, dum cuncta negant ventique fretumque,
56 mente agito furti tempora prima mei.
57 Nox erat incipiens (namque est meminisse voluptas),
58 cum foribus patriis egrediebar amans.
59 Nec mora, deposito pariter cum veste timore,
60 jactabam liquido brachia lenta mari.
61 Luna fere tremulum praebebat lumen eunti
62 ut comes in nostras officiosa vias.
63 Hanc ego suspiciens : "Faveas, dea candida, dixi,
64 et subeant animo Latmia saxa tuo.
65 Non sinit Endymion te pectoris esse severi ;
66 flecte, precor, vultus ad mea furta tuos.
67 Tu, dea, mortalem caelo delapsa petebas.
68 Vera loqui liceat, quam sequor ipsa dea est ;
69 neu referam mores caelesti pectore dignos ;
70 forma nisi in veras non cadit illa deas.
71 A Veneris facie non est prior ulla tuaque ;
72 neve meis credas vocibus, ipsa vide.
73 Quantum, cum fulges radiis argentea puris,
74 concedunt flammis sidera cuncta tuis,
75 tanto formosior formosior omnibus illa est ;
76 si dubitas, caecum, Cynthia, lumen habes."
77 Haec ego, vel certe non his diversa, locutus
78 per mihi cedentes usque ferebar aquas ;
79 unda repercussae radiabat imagine lunae,
80 et nitor in tacita nocte diurnus erat ;
81 nullaque vox usquam, nullum veniebat ad aures
82 praeter dimotae corpore murmur aquae.
83 Alcyones solae, memores Ceycis amati,
84 nescio quid visae sunt mihi dulce queri.

85 Jamque fatigatis umero sub utroque lacertis
86 fortiter in summas erigor altus aquas.
87 Ut procul adspexi lumen : "Meus ignis in illo est ;
88 illa meum, dixi, litora lumen habent."
89 Et subito lassis vires rediere lacertis,
90 visaque, quam fuerat, mollior unda mihi.
91 Frigora ne possim gelidi sentire profundi,
92 qui calet in cupido pectore, praestat amor.
93 Quo magis accedo propioraque litora fiunt
94 quoque minus restat, plus libet ire mihi.
95 Cum vero possum cerni quoque, protinus addis
96 spectatrix animos, ut valeamque facis.
97 Nunc etiam nando dominae placuisse laboro
98 atque oculis jacto bracchia nostra tuis.
99 Te tua vix prohibet nutrix descendere in altum
100 (hoc quoque enim vidi, nec mihi verba dabas)
101 nec tamen effecit, quamvis retinebat euntem,
102 ne fieret prima pes tuus udus aqua.
103 Excipis amplexu feliciaque oscula jungis,
104 oscula, di magni, trans mare digna peti.
105 Eque tuis demptos umeris mihi tradis amictus
106 et madidam siccas aequoris imbre comam.
107 Cetera nox et nos et turris conscia novit
108 quodque mihi lumen per vada monstrat iter.
109 Non magis illius numerari gaudia noctis
110 Hellespontiaci quam maris alga potest.
111 Quo brevius spatium nobis ad furta dabatur,
112 hoc magis est cautum ne foret illud iners.
113 Jamque fugatura Tithoni conjuge noctem
114 praevis Aurorae Lucifer ortus erat.
115 Oscula congerimus properata sine ordine raptim
116 et querimur parvas noctibus esse moras.
117 Atque ita cunctatus monitu nutricis amaro
118 frigida deserta litora turre peto.
119 Digredimur flentes repetoque ego virginis aequor,
120 respiciens dominam, dum licet, usque meam.
121 Siqua fides vero est, veniens hinc esse natator,
122 cum redeo, videor naufragus esse mihi.
123 [Hoc quoque, si credes : ad te via prona videtur ;
124 a te cum redeo, clivus inertis aquae.]
125 Invitus repeto patriam (quis credere possit ?),
126 invitus certe nunc moror urbe mea.
127 Ei mihi ! cur animis juncti secernimur undis,
128 unaque mens, tellus non habet una duos ?
129 [Vel tua me Sestus, vel te mea sumat Abydos ;
130 tam tua terra mihi, quam tibi nostra placet.]
131 Cur ego confundor, quotiens confunditur aequor ?
132 Cur mihi causa levis, ventus, obesse potest ?
133 Jam nostros curvi norunt delphines amores,
134 ignotum nec me piscibus esse reor.
135 Jam patet attritus solitarum limes aquarum,
136 non aliter multa quam via pressa rota.
137 Quod mihi non esset nisi sic iter, ante querebar ;
138 at nunc per ventos hoc quoque deesse queror.
139 Fluctibus immodicis Athamantidos aequora canent
140 vixque manet portu tuta carina suo.
141 Hoc mare, cum primum de virgine nomina mersa,
142 quae tenet, est nanctum, tale fuisse puto.

143 Et satis amissa locus hic infamis ab Helle est,
144 utque mihi parcat, nomine crimen habet.
145 Invideo Phrixo, quem per freta tristia tutum
146 aurea lanigero vellere vexit ovis ;
147 nec tamen officium pecoris navisve requiro,
148 dummodo, quas findam corpore, dentur aquae.
149 Arte egeo nulla ; fiat modo copia nandi,
150 idem navigium, navita, vector ero.
151 Nec sequor aut Helicen, aut, qua Tyros utitur, Arcton ;
152 publica non curat sidera noster amor.
153 Andromedan alius spectet claramque Coronam,
154 quaeque micat gelido Parrhasis Ursa polo ;
155 at mihi, quod Perseus et cum Jove Liber amarunt,
156 indicium dubiae non placet esse viae.
157 Est aliud lumen, multo mihi certius istis,
158 non errat tenebris quo duce noster amor ;
159 hoc ego dum spectem, Colchos et in ultima Ponti,
160 quaque viam fecit Thessala pinus eam ;
161 et juvenem possim superare Palaemona nando
162 miraue quem subito reddidit herba deum.
163 Saepe per adsiduos languent mea bracchia motus
164 vixque per immensas fessa trahuntur aquas.
165 His ego cum dixi : "pretium non vile laboris,
166 jam dominae vobis colla tenenda dabo",
167 protinus illa valent atque ad sua praemia tendunt,
168 ut celer Eleo carcere missus equus.
169 Ipse meos igitur servo, quibus uror, amores
170 teque, magis caelo digna puella, sequor.
171 Digna quidem caelo es, sed nunc tellure morare
172 aut dic ad superos et mihi qua sit iter.
173 Hic es, et exigue misero contingis amanti,
174 cumque mea fiunt turbida mente freta.
175 Quid mihi, quod lato non separor aequore, prodest ?
176 Num minus haec nobis tam brevis obstat aqua ?
177 An malim, dubito, toto procul orbe remotus
178 cum domina longe spem quoque habere meam.
179 Quo propius nunc es, flamma propiore calesco
180 et res non semper, spes mihi semper adest.
181 Paene manu, quod amo (tanta est vicinia) tango,
182 saepe sed heu ! lacrimas hoc mihi "paene" movet.
183 Velle quid est aliud fugientia prendere poma
184 spemque suo refugi fluminis ore sequi ?
185 Ergo ego te numquam, nisi cum volet unda, tenebo
186 et me felicem nulla videbit hiemps,
187 cumque minus firmum nil sit quam ventus et unda,
188 in ventis et aqua spes mea semper erit ?
189 Aestus adhuc tamen est ; quid, cum mihi laeserit aequor
190 Plias et Arctophylax Oleniumque pecus ?
191 Aut ego non novi, quam sim temerarius, aut me
192 in freta non cautus tum quoque mittet Amor.
193 Neve putes id me, quod abest, promittere tempus,
194 pignora polliciti non tibi tarda dabo.
195 Sit tumidum paucis etiam nunc noctibus aequor,
196 ire per invitas experiemur aquas ;
197 aut mihi continget felix audacia salvo,
198 aut mors solliciti finis amoris erit.
199 Optabo tamen ut partis expellar in istas
200 et teneant portus naufraga membra tuos.

201 Flebis enim tactuque meum dignabere corpus
 202 et "mortis, dices, huic ego causa fui."
 203 Scilicet interitus offenderis omine nostri,
 204 litteraque invisa est hac mea parte tibi.
 205 Desino ; parce queri. Sed uti mare finiat iram,
 206 accedant, quaeso, fac tua vota meis.
 207 Pace brevi nobis opus est, dum transferor isto ;
 208 cum tua contigero litora, perstet hiemps.
 209 Istic est aptum nostrae navale carinae
 210 et melius nulla stat mea puppis aqua.
 211 Illic me claudat Boreas, ubi dulce morari est.
 212 Tunc piger ad nandum, tunc ego cautus ero
 213 nec faciam surdis convicia fluctibus ulla
 214 triste nataturo nec querar esse fretum.
 215 Me pariter venti teneant tenerique lacerti,
 216 per causas istic impediaturque duas.
 217 Cum patietur hiemps, remis ego corporis utar ;
 218 lumen in adspectu tu modo semper habe.
 219 Interea pro me pernoctet epistula tecum,
 220 quam precor ut minima prosequar ipse mora.

HERO LEANDRO

H_19 v.1 Quam mihi misisti verbis, Leandre, salutem
 2 ut possim missam rebus habere, veni.
 3 Longa mora est nobis omnis, quae gaudia differt.
 4 Da veniam fassae ; non patienter amo.
 5 Urimur igne pari, sed sum tibi viribus impar ;
 6 fortius ingenium suspicor esse viris.
 7 Ut corpus, teneris ita mens infirma puellis ;
 8 deficiam, parvi temporis adde moram.
 9 Vos modo venando, modo rus geniale colendo,
 10 ponitis in varia tempora longa mora ;
 11 aut fora vos retinent aut unctae dona palaestrae,
 12 flectitis aut freno colla sequacis equi ;
 13 nunc volucrem laqueo, nunc piscem ducitis hamo ;
 14 diluitur posito serior hora mero.
 15 At mihi summotae, vel si minus acriter urar,
 16 quod faciam, superest praeter amare nihil.
 17 Quod superest, facio, teque, o mea sola voluptas,
 18 plus quoque, quam reddi quod mihi possit, amo.
 19 Aut ego cum cana de te nutrice susurro,
 20 quaeque tuum, miror, causa moretur iter ;
 21 aut mare prospiciens odioso concita vento
 22 corripio verbis aequora paene tuis ;
 23 aut, ubi saevitiae paulum gravis unda remisit,
 24 posse quidem, sed te nolle venire, queror ;
 25 dumque queror, lacrimae per amantia lumina manant,
 26 pollice quas tremulo conscia siccant anus.
 27 Saepe tui spectro si sint in litore passus,
 28 impositas tamquam servet harena notas ;
 29 [utque rogem de te et scribam tibi, siquis Abydo
 30 venerit, aut, quaero, siquis Abydon eat.]
 31 Quid referam, quotiens dem vestibibus oscula, quas tu
 32 Hellespontiaca ponis iturus aqua ?
 33 Sic ubi lux acta est et noctis amicior hora

34 exhibuit pulso sidera clara die,
 35 protinus in summo vigilantia lumina tecto
 36 ponimus, adsuetae signa notamque viae,
 37 tortaque versato ducentes stamina fuso
 38 feminea tardas fallimus arte moras.
 39 Quid loquar interea tam longo tempore, quaeris.
 40 Nil nisi Leandri nomen in ore meo est.
 41 "Jamne putas exisse domo mea gaudia, nutrix,
 42 an vigilant omnes et timet ille suos ?
 43 Jamne suas umeris illum deponere vestes,
 44 Pallade jam pingui tinguere membra putas ? "
 45 adnuit illa fere, non nostra quod oscula curet,
 46 sed movet obrepens somnus anile caput.
 47 Postque morae minimum : "Jam certe navigat, inquit,
 48 lentaque dimotis bracchia jactat aquis."
 49 Paucaque cum tacta perfecit stamina terra,
 50 an medio possis, quaerimus, esse freto,
 51 et modo prospicimus, timida modo voce precamur
 52 ut tibi det faciles utilis aura vias.
 53 Auribus intentis voces captamus et omnem
 54 adventus strepitum credimus esse tui.
 55 Sic ubi deceptae pars est mihi maxima noctis
 56 acta, subit furtim lumina fessa sopor.
 57 Forsitan invitus mecum tamen, improbe, dormis
 58 et, quamquam non vis ipse venire, venis ;
 59 nam modo te videor prope jam spectare natantem,
 60 bracchia nunc umeris umida ferre meis,
 61 nunc dare, quae soleo, madidis velamina membris,
 62 pectora nunc nostro juncta fovere sinu
 63 multaque praeterea linguae reticenda modesta,
 64 quae fecisse juvat, facta referre pudet.
 65 Me miseram ! brevis est haec et non vera voluptas ;
 66 nam tu cum somno semper abire soles.
 67 Firmius o cupidi tandem coeamus amantes,
 68 nec careant vera gaudia nostra fide !
 69 Cur ego tot viduas exegi frigida noctes ?
 70 Cur totiens a me, lente natator, abes ?
 71 Est mare, confiteor, non nunc tractabile nanti ;
 72 nocte sed hesternam lenior aura fuit.
 73 Cur ea praeterita est ? cur non ventura timebas ?
 74 Tam bona cur periit, nec tibi raptata via est ?
 75 Protinus ut similis detur tibi copia cursus,
 76 hoc melior certe, quo prior, illa fuit.
 77 At cito mutata est jactati forma profundi ;
 78 tempore, cum properas, saepe minore venis.
 79 Hic, puto, deprensus, nil, quod querereris, haberes,
 80 meque tibi amplexo nulla noceret hiemps.
 81 Certe ego tum ventos audirem laeta sonantes
 82 et numquam placidas esse precarer aquas.
 83 Quid tamen evenit cur sis metuentior undae
 84 contemptumque prius nunc vereare fretum ?
 85 Nam memini, cum te saevum veniente minaxque
 86 non minus, aut multo non minus, aequor erat,
 87 cum tibi clamabam : "sic tu temerarius esto,
 88 ne miserae virtus sit tua flenda mihi !"
 89 Unde novus timor hic, quoque illa audacia fugit ?
 90 Magnus ubi est spretis ille natator aquis ?
 91 Sis tamen hoc potius, quam quod prius esse solebas,

92 et facias placidum per mare tutus iter,
 93 dummodo sis idem, dum sic ut scribis amemur,
 94 flammaque non fiat frigidus illa cinis.
 95 Non ego tam ventos timeo mea vota morantes,
 96 quam similis vento ne tuus erret amor,
 97 ne non sim tanti, superentque pericula causam,
 98 et videar merces esse labore minor.
 99 Interdum metuo patria ne laedar et impar
 100 dicar Abydeno Thressa puella toro.
 101 Ferre tamen possum patientius omnia, quam si
 102 otia nescio qua paelice captus agis,
 103 in tua si veniunt alieni colla lacerti,
 104 fitque novus nostri finis amoris amor.
 105 A ! potius peream quam crimine vulnerer isto,
 106 fataque sint culpa nostra priora tua !
 107 Nec quia venturi dederis mihi signa doloris,
 108 haec loquor aut fama sollicitata nova.
 109 Omnia sed vereor. Quis enim securus amavit ?
 110 Cogit et absentes plura timere locus.
 111 Felices illas, sua quas praesentia nosse
 112 crimina vera jubet, falsa timere vetat.
 113 Nos tam vana movet quam facta injuria fallit,
 114 incitat et morsus error uterque pares.
 115 O ! utinam venias, aut ut ventusve paterve
 116 causaque sit certe femina nulla morae.
 117 Quodsi quam sciero, moriar, mihi crede, dolendo ;
 118 jamdudum pecca, si mea fata petis.
 119 Sed neque peccabis, frustra ego terreor istis,
 120 quoque minus venias, invida pugnat hiemps.
 121 Me miseram ! quanto planguntur litora fluctu,
 122 et latet obscura condita nube dies !
 123 Forsitan ad pontum mater pia venerit Helles
 124 mersaque roratis nata fleatur aquis,
 125 an mare ab invisio privignae nomine dictum
 126 vexat in aequoream versa noverca deam ?
 127 Non favet, ut nunc est, teneris locus iste puellis ;
 128 hac Helle periit, hac ego laedor aqua.
 129 At tibi flammaram memori, Neptune, tuarum
 130 nullus erat ventis impediendus amor,
 131 si neque Amygone nec laudatissima forma
 132 criminis est Tyro fabula vana tui
 133 lucidaque Alcyone Calyceque Hecataeone nata,
 134 et nondum nexis angue Medusa comis
 135 flavaque Laodice caeloque recepta Celaeno,
 136 et quarum memini nomina lecta mihi,
 137 has certe pluresque canunt, Neptune, poetae
 138 molle latus lateri conposuisse tuo.
 139 Cur igitur, totiens vires expertus amoris,
 140 adsuetum nobis turbine claudis iter ?
 141 Parce, ferox, latoque mari tua proelia misce.
 142 Seducit terras haec brevis unda duas.
 143 Te decet aut magnas magnum jactare carinas
 144 aut etiam totis classibus esse trucem ;
 145 turpe deo pelagi juvenem terrere natantem,
 146 gloriaque est stagno quolibet ista minor.
 147 Nobilis ille quidem est et clarus origine, sed non
 148 a tibi suspecto ducit Ulixae genus.
 149 Da veniam servaque duos : natat ille, sed isdem

150 corpus Leandri, spes mea pendet aquis.
 151 Sternuit en lumen (posito nam scribimus illo),
 152 sternuit et nobis prospera signa dedit.
 153 Ecce merum nutrix faustos instillat in ignes,
 154 "Crasque erimus plures", inquit et ipsa bibit.
 155 Effice nos plures, evicta per aequora lapsus,
 156 o penitus toto corde recepte mihi !
 157 In tua castra redi, socii desertor amoris ;
 158 ponuntur medio cur mea membra toro ?
 159 Quod timeas, non est ; auso Venus ipsa favebit
 160 sternet et aequoreas aequore nata vias.
 161 [Ire libet medias ipsi mihi saepe per undas,
 162 sed solet hoc maribus tutius esse fretum.
 163 Nam cur hac vectis Phrixo Phrixique sorore
 164 sola dedit vastis femina nomen aquis ?]
 165 Forsitan ad reditum metuas ne tempora desint,
 166 aut gemini nequeas ferre laboris onus.
 167 At nos diversi medium coeamus in aequor
 168 obviamque in summis oscula demus aquis,
 169 atque ita quisque suas iterum redeamus ad urbes.
 170 Exiguum sed plus quam nihil illud erit.
 171 Vel pudor hic utinam, qui nos clam cogit amare,
 172 vel timidus famae cedere vellet amor !
 173 Nunc male res junctae, calor et reverentia, pugnant.
 174 Quid sequar, in dubio est ; haec decet, ille juvat.
 175 Ut semel intravit Colchos Pagasaeus Iason,
 176 impositam celeri Phasida puppe tulit ;
 177 ut semel Idaeus Lacedaemona venit adulter,
 178 cum praeda rediit protinus ille sua.
 179 Tu quam saepe petis quod amas, tam saepe relinquis,
 180 et quotiens grave sit puppibus ire, natas.
 181 Sic tamen, o juvenis tumidarum victor aquarum,
 182 sic facito spernas, ut vereare, fretum.
 183 Arte laboratae merguntur ab aequore naves ;
 184 tu tua plus remis bracchia posse putas ?
 185 Quod cupis, hoc nautae metuunt, Leandre, natate ;
 186 exitus hic fractis puppibus esse solet.
 187 Me miseram ! cupio non persuadere quod hortor,
 188 sisque, precor, monitis fortior ipse meis,
 189 dummodo pervenias excussa saepe per undas
 190 inicias umeris bracchia lassa meis.
 191 Sed mihi, caeruleas quotiens obvertor ad undas,
 192 nescio quid pavidum pectora frigus habet.
 193 Nec minus hesternae confundor imagine noctis,
 194 quamvis est sacris illa piata meis.
 195 Namque sub aurora, jam dormitante lucerna,
 196 somnia quo cerni tempore vera solent,
 197 stamina de digitis cecidere sopore remissis,
 198 collaque pulvino nostra ferenda dedi.
 199 Hic ego ventosas nantem delphina per undas
 200 cernere non dubia sum mihi visa fide,
 201 quem postquam bibulis inlisit fluctus harenis,
 202 unda simul miserum vitaeque deseruit.
 203 Quidquid id est, timeo ; nec tu mea somnia ride
 204 nec nisi tranquillo bracchia crede mari.
 205 Si tibi non parcis, dilectae parce puellae,
 206 quae numquam nisi te sospite sospes ero.
 207 Spes tamen est fractis vicinae pacis in undis ;

208 tum placidas toto pectore finde vias.
 209 Interea, quoniam nanti freta pervia non sunt,
 210 leniat invisas littera missa moras.

ACONTIUS CYDIPPAE

H_20 v.1 [Accipe, Cydippe, despecti nomen Aconti
 2 illius in pomo qui tibi verba dedit.]
 3 Pone metum ; nihil hic iterum jurabis amanti ;
 4 promissam satis est te semel esse mihi.
 5 Perlege. Discedat sic corpore languor ab isto,
 6 quod meus est ulla parte dolere dolor.
 7 Quid pudor ante subit ? nam, sicut in aede Dianae,
 8 suspicor ingenuas erubuisse genas.
 9 Conjugium pactamque fidem, non crimina posco ;
 10 debitus ut conjunx, non ut adulter amo.
 11 Verba licet repetas, quae demptus ab arbore fetus
 12 pertulit ad castas me jacente manus ;
 13 invenies illic id te spondere quod opto
 14 te potius, virgo, quam meminisse deam.
 15 Nunc quoque idem studeo ; studium tamen acrius illud
 16 adsumpsit vires auctaque flamma mora est,
 17 quique fuit numquam parvus, nunc tempore longo
 18 et spe, quam dederas tu mihi, crevit amor.
 19 Spem mihi tu dederas ; meus hic tibi credidit ardor ;
 20 non potes hoc factum teste negare dea.
 21 Adfuit et, praesens, ut erant, tua verba notavit
 22 et visa est mota dicta probasse coma.
 23 Deceptam dicas nostra te fraude licebit,
 24 dum fraudis nostrae causa feratur amor.
 25 Fraus mea quid petiit, nisi uti tibi jungerer uni ?
 26 [Id te, quod quereris, conciliare potest.]
 27 Non ego natura nec sum tam callidus usu ;
 28 sollertem tu me, crede, puella, facis.
 29 Te mihi compositis, siquid tamen egimus, a me
 30 adstrinxit verbis ingeniosus Amor.
 31 Dictatis ab eo feci sponsalia verbis
 32 consultoque fui juris Amore vafer.
 33 Sit fraus huic facto nomen, dicarque dolosus,
 34 si tamen est, quod ames, velle tenere, dolus.
 35 En, iterum scribo mittoque rogantia verba ;
 36 altera fraus haec est, quodque queraris habes.
 37 Si noceo quod amo, fateor, sine fine nocebo,
 38 teque petam, caveas tu licet, usque petam.
 39 Per gladios alii placitas rapuere puellas ;
 40 scripta mihi caute littera crimen erit ?
 41 Di faciant possim plures imponere nodos,
 42 ut tua sit nulla libera parte fides.
 43 Mille doli restant ; clivo sudamus in imo ;
 44 ardor inexpertum nil sinet esse meus.
 45 [Sit dubium, possisne capi, captabere certe ;
 46 exitus in dis est, sed capiere tamen.]
 47 Ut partem effugias, non omnia retia falles,
 48 quae tibi, quam credis, plura tetendit Amor.
 49 Si non proficient artes, veniemus ad arma,
 50 vique tui cupido rapta ferere sinu.

51 Non sum qui soleam Paridis reprehendere factum
 52 nec quemquam, qui vir, posset ut esse, fuit.
 53 Nos quoque - sed taceo. Mors hujus poena rapinae
 54 ut sit, erit, quam te non habuisse, minor.
 55 Aut esses formosa minus, peterere modeste ;
 56 audaces facie cogimur esse tua.
 57 Tu facis hoc oculique tui, quibus ignea cedunt
 58 sidera, qui flammae causa fuere meae ;
 59 hoc faciunt flavi crines et eburnea cervix,
 60 quaeque, precor, veniant in mea colla manus,
 61 et decor et motus sine rusticitate pudentes,
 62 et, Thetidis qualis vix rear esse, pedes.
 63 Cetera si possem laudare, beatior essem,
 64 nec dubito, totum quin sibi par sit opus.
 65 Hac ego compulsus, non est mirabile, forma
 66 si pignus volui vocis habere tuae.
 67 Denique, dum captam tu te cogare fateri,
 68 insidiis esto capta puella meis.
 69 Invidiam patiar ; passo sua praemia dentur.
 70 Cur suus a tanto crimine fructus abest ?
 71 [Hesionem Telamon, Briseida cepit Achilles ;
 72 utraque victorem nempe secuta virum.]
 73 Quamlibet accuses et sis irata licebit,
 74 irata liceat dum mihi posse frui.
 75 Idem, qui facimus, factam tenuabimus iram,
 76 copia placandi sit modo parva tui.
 77 Ante tuos liceat flentes consistere vultus
 78 et liceat lacrimis addere verba sua,
 79 utque solent famuli, cum verbera saeva verentur,
 80 tendere submissas ad tua crura manus.
 81 Ignoras tua jura : voca. Cur arguor absens ?
 82 Jamdudum dominae more venire jube.
 83 Ipsa meos scindas licet imperiosa capillos,
 84 oraque sint digitis livida nostra tuis,
 85 omnia perpetiar ; tantum fortasse timebo
 86 corpore laedatur ne manus ista meo.
 87 Sed neque conpedibus nec me conpesce catenis ;
 88 servabor firmo vinctus amore tui.
 89 Cum bene se quantumque volet satiaverit ira,
 90 ipsa tibi dices : "quam patienter amat ! "
 91 Ipsa tibi dices, ubi videris omnia ferre :
 92 "Tam bene qui servit, serviat iste mihi ! "
 93 Nunc reus infelix absens agor, et mea, cum sit
 94 optima, non ullo causa tuente perit.
 95 Hoc quoque, quod tu vis, sit scriptum injuria nostrum ;
 96 quod de me solo nempe queraris, habes.
 97 Non meruit falli mecum quoque Delia ; si non
 98 vis mihi promissum reddere, redde deae.
 99 [Adfuit et vidit, cum tu decepta rubebas
 100 et vocem memori condidit aure tuam.]
 101 Omina re careant ; nihil est violentius illa,
 102 cum sua, quod nolim, numina laesa videt.
 103 Testis erit Calydonis aper sic saevus ut illo
 104 sit magis in natum saeva reperta parens.
 105 Testis et Actaeon, quondam fera creditus illis,
 106 ipse dedit leto cum quibus ante feras,
 107 quaeque superba parens saxo per corpus oborto
 108 nunc quoque Mygdonia flebilis adstat humo.

109 Ei mihi ! Cydippe, timeo tibi dicere verum,
 110 ne videar causa falsa monere mea ;
 111 dicendum tamen est. Hoc, tu, mihi crede, quod aegra
 112 ipso nubendi tempore saepe jaces,
 113 consulit ipsa tibi, neu sis perjura laborat
 114 et salvam salva te cupit esse fide.
 115 Inde fit ut, quotiens existere perfida temptas,
 116 peccatum totiens corrigat illa tuum.
 117 Parce movere feros animosae virginis arcus ;
 118 mitis adhuc fieri, si patiare, potest.
 119 Parce, precor, teneros corrumpere febribus artus ;
 120 servetur facies ista fruenda mihi ;
 121 serventur vultus ad nostra incendia nati,
 122 quique subest niveo levis in ore rubor.
 123 Hostibus et siquis, ne fias nostra, repugnat,
 124 sic sit ut invalida te solet esse mihi.
 125 Torqueor ex aequo vel te nubente vel aegra,
 126 dicere nec possum quid minus ipse velim.
 127 Maceror interdum quod sim tibi causa dolendi,
 128 teque mea laedi calliditate puto.
 129 In caput o ! nostrum dominae perjuriam quaeso
 130 eveniant ; poena tuta sit illa mea.
 131 Ne tamen ignorem, quid agas, adlimina crebro
 132 anxius huc illuc dissimulanter eo ;
 133 subsequor ancillam furtim famulumque requirens
 134 profuerint somni quid tibi quidve cibi.
 135 Me miserum, quod non medicorum jussa ministro
 136 effingoque manus insideoque toro.
 137 Et rursus miserum, quod me procul inde remoto,
 138 quem minime vellem, forsitan alter adest.
 139 Ille manus istas effingit et adsidet aegrae
 140 invisus superis cum superisque mihi,
 141 dumque suo temptat salientem pollice venam,
 142 candida per causam bracchia saepe tenet
 143 contrectatque sinus et forsitan oscula jungit ;
 144 officio merces plenior ista suo est.
 145 Quis tibi permisit nostras praecerpere messes ?
 146 Ad segetem alterius quis tibi fecit iter ?
 147 Iste sinus meus est ; mea turpiter oscula sumis ;
 148 a mihi promisso corpore tolle manus.
 149 Improbe, tolle manus ! Quam tangis, nostra futura est ;
 150 postmodo si facies istud, adulter eris.
 151 Elige de vacuis, quam non sibi vindicet alter ;
 152 si nescis, dominum res habet ista suum.
 153 Nec mihi credideris : recitetur formula pacti ;
 154 neu falsam dicas esse, fac ipsa legat.
 155 Alterius thalamo (tibi nos, tibi dicimus) exi.
 156 Quid facis hic ? Exi, non vacat iste torus.
 157 Nam quod habes et tu scripti verba altera pacti,
 158 non erit idcirco par tua causa meae.
 159 Haec mihi se pepigit, pater hanc tibi, primus ab illa ;
 160 sed propior certe quam pater ipsa sibi est.
 161 Promisit pater hanc, haec se juravit amanti ;
 162 ille homines, haec est testificata deam.
 163 Ille timet mendax, haec et perjura vocari ;
 164 num dubitas, hic sit major an ille metus ?
 165 Denique, ut amborum conferre pericula possis,
 166 respice ad eventus : haec cubat, ille valet.

167 Nos quoque dissimili certamina mente subimus,
168 nec spes par nobis nec timor aequus adest.
169 Tu petis ex tuto, gravior mihi morte repulsa est,
170 idque ego jam, quod tu forsam amabis, amo.
171 Si tibi justitiae, si recti cura fuisset,
172 cedere debueras ignibus ipse meis.
173 Nunc, quoniam ferus hic pro causa pugnat iniqua,
174 ad te, Cydippe, littera nostra redit.
175 Hic facit ut jaceas et sis suspecta Dianae ;
176 hunc tu, si sapias, limen adire vetes.
177 [Hoc faciente subis tam saeva pericula vitae,
178 atque utinam pro te, qui movet illa, cadat !
179 Quem si reppuleris, nec, quem dea damnat, amaris,
180 et tu continuo terque ego salvus ero.]
181 Siste metum, virgo : stabili potiere salute ;
182 fac modo polliciti conscia templa colas.
183 Non bove mactato caelestia numina gaudent,
184 sed quae praestanda est et sine teste fide.
185 Ut valeant, aliae ferrum patiuntur et ignes ;
186 fert aliis tristem sucus amarus opem ;
187 nil opus est istis ; tantum perjurata vita
188 teque simul serva meque datamque fidem.
189 Praeteritae veniam dabit ignorantia culpae ;
190 exciderant animo foedera lecta tuo.
191 At monita es modo voce mea cum casibus istis,
192 quos, quotiens temptas fallere, ferre soles.
193 His quoque vitatis, in partu nempe rogabis,
194 ut tibi luciferas adferat illa manus ?
195 Audiet haec ; repetens quae sunt audita, requiret
196 iste tibi de quo conjugis partus eat.
197 Promittes votum ; scit te promittere falso.
198 Jurabis ; scit te fallere posse deos.
199 Non agitur de me ; cura majore laboro :
200 anxia sunt vitae pectora nostra tuae.
201 Cur modo te dubiam pavidi flevere parentes,
202 ignaros culpae quos facis esse tuae ?
203 Et cur ignorent ? Matri licet omnia narres ;
204 nil tua, Cydippe, facta ruboris habent.
205 Ordine fac referas ut sis mihi cognita primum,
206 sacra pharetratae dum facit ipsa deae,
207 ut te conspecta subito, si forte notasti,
208 restiterim fixis in tua membra genis ;
209 et te dum nimium miror, nota certa furoris,
210 deciderint umeris pallia lapsa meis ;
211 postmodo nescio qua venisse volubile malum,
212 verba ferens doctis insidiosa notis ;
213 quod quia sit lectum sancta praesente Diana,
214 esse tuam vinctam numine teste fidem.
215 Ne tamen ignoret scripti sententia quae sit,
216 lecta tibi quondam nunc quoque verba refer.
217 "Nube, precor, dicet, cui te bona numina jungunt ;
218 quem fore jurasti, sit gener ille mihi.
219 Quisquis is est, placeat, quoniam placet ante Dianae."
220 Talis erit mater, si modo mater erit.
221 Sed tamen ut quaerat quis sim qualisque videto :
222 inveniet vobis consuluisse deam.
223 Insula, Carthaeis quondam celeberrima nymphis,
224 cingitur Aegaeo, nomine Cea, mari.

225 Illa mihi patria est, nec, si generosa probatis
 226 nomina, despectis arguor ortus avis.
 227 Sunt et opes nobis, sunt et sine crimine mores ;
 228 amplius utque nihil, me tibi jungit amor.
 229 Appeteres talem vel non jurata maritum ;
 230 juratae vel non talis habendus erat.
 231 Haec tibi me in somnis jaculatrix scribere Phoebe,
 232 haec tibi me vigilem scribere jussit Amor.
 233 E quibus alterius mihi jam nocuere sagittae ;
 234 alterius noceant ne tibi tela, cave.
 235 Juncta salus nostra est : miserere meique tuique.
 236 quid dubitas unam ferre duobus opem ?
 237 Quod si contigerit, cum jam data signa sonabunt
 238 tinctaque votivo sanguine Delos erit,
 239 aurea ponetur mali felicis imago,
 240 causaque versiculis scripta duobus erit :
 241 "Effigie pomi testatur Acontius hujus,
 242 quae fuerint in eo scripta fuisse rata."
 243 [Longior infirmum ne lasset epistula corpus
 244 clausaque consueto sit sibi fine ; vale.]

CYDIPPE ACONTIO

H_21 v.1 [Littera pervenit tua quo consuevit, Acontii
 2 et paene est oculis insidiata meis.]
 3 Pertimui scriptumque tuum sine murmure legi,
 4 juraret ne quos inscia lingua deos.
 5 Et, puto, captasses iterum, nisi ut ipse fateris,
 6 promissam scires me satis esse semel.
 7 Nec lectura fui, sed, si tibi dura fuisset,
 8 aucta foret saevae forsitan ira deae.
 9 Omnia cum faciam, cum dem pia tura Dianae,
 10 illa tamen justa plus tibi parte favet,
 11 [utque cupis credi, memori te vindicat ira ;
 12 talis in Hippolyto vix fuit illa suo.]
 13 At melius virgo favisset virginis annis,
 14 quos vereor paucos ne velit esse mihi.
 15 Languor enim causis non apparentibus haeret,
 16 adjuvor et nulla fessa medentis ope.
 17 Quam tibi nunc gracilem vix haec rescribere quamque
 18 pallida vix cubito membra levare putas ?
 19 Huc timor accedit, ne quis nisi conscia nutrix
 20 colloquii nobis sentiat esse vices.
 21 Ante fores sedet haec quid agamque rogantibus intus,
 22 ut possim tuto scribere, "dormit" ait.
 23 Mox, ubi, secreti longi causa optima, somnus
 24 credibilis tarda desinit esse mora,
 25 jamque venire videt quos non admittere durum est,
 26 excreat et pacta dat mihi signa nota.
 27 Sicut eram, properans verba imperfecta relinquo,
 28 et tegitur trepido littera coepta sinu.
 29 Inde meos digitos iterum repetita fatigat.
 30 Quantus sit nobis adspicis ipse labor.
 31 Quo peream si dignus eras, ut vera loquamur ;
 32 sed melior justo quamque mereris ego.

33 Ergo te propter totiens incerta salutis
 34 commentis poenas doque dedique tuis ?
 35 Haec nobis formae te laudatore superbae
 36 contingit merces et placuisse nocet ?
 37 Si, tibi deformis, quod mallet, visa fuisset,
 38 culpatum nulla corpus egeret ope ;
 39 nunc laudata gemo, nunc me certamine vestro
 40 perditis et proprio vulneror ipsa bono.
 41 Dum neque tu cedis, nec se putat ille secundum,
 42 tu votis obstas illius, ille tuis,
 43 ipsa velut navis jactor, quam certus in altum
 44 propellit Boreas, aestus et unda refert,
 45 cumque dies caris optata parentibus instat,
 46 immodicus pariter corporis ardor inest.
 47 Ei mihi ! conjugii tempus crudelis ad ipsum
 48 Persephone nostras pulsat acerba fores.
 49 Jam pudet, et timeo, quamvis mihi conscia non sim,
 50 offensos videar ne meruisse deos.
 51 Accidere haec aliquis casu contendit, at alter
 52 acceptum Superis hunc negat esse virum,
 53 neve nihil credas in te quoque dicere famam,
 54 facta veneficiis pars putat ista tuis.
 55 Causa latet, mala nostra patent ; vos pace movetis
 56 aspera submota proelia, plector ego.
 57 Dic, a, nunc, solitoque tibi ne decipe more ;
 58 quid facies odio, sic ubi amore noces ?
 59 Si laedis quod amas, hostem sapienter amabis ;
 60 me, precor, ut serves, perdere velle velis !
 61 Aut tibi jam nulla est speratae cura puellae,
 62 quam ferus indigna tabe perire sinis,
 63 aut, dea si frustra pro me tibi saeva rogatur,
 64 qua mihi te jactes, gratia nulla tua est.
 65 Elige quid fingas. Non vis placare Dianam ;
 66 immemor es nostri. Non potes ; illa tui est.
 67 Vel numquam mallet vel non mihi tempore in illo
 68 esset in Aegaeis cognita Delos aquis.
 69 Tunc mea difficili deducta est aequore navis
 70 et fuit ad coeptas hora sinistra vias.
 71 Quo pede processi ? quo me pede limine movi ?
 72 Picta citae tetigi quo pede texta ratis ?
 73 Bis tamen adverso redierunt carbasa vento...
 74 Mentior, a demens ! ille secundus erat.
 75 Ille secundus erat, qui me referebat euntem
 76 quique parum felix impediabat iter.
 77 Atque utinam constans contra mea vela fuisset !
 78 Sed stultum est venti de levitate queri.
 79 Mota loci fama properabam visere Delon
 80 et facere ignava puppe videbar iter.
 81 Quam saepe ut tardis feci convicia remis
 82 questaque sum vento lintea parca dari.
 83 Et jam transieram Myconon, jam Tenon et Andron,
 84 inque meis oculis candida Delos erat ;
 85 quam procul ut vidi : "Quid me fugis, insula ? dixi.
 86 Laberis in magno numquid, ut ante, mari ? "
 87 Institeram terrae, cum jam prope luce peracta
 88 demere purpureis Sol juga vellet equis.
 89 Quos idem solitos postquam revocavit ad ortus,
 90 comuntur nostrae matre jubente comae.

91 Ipsa dedit gemmas digitis et crinibus aurum
 92 et vestes umeris induit ipsa meis.
 93 Protinus egressae Superis, quibus insula sacra est,
 94 flava salutatis tura merumque damus ;
 95 dumque parens aras votivo sanguine tingit
 96 sectaque fumosis ingerit exta focus,
 97 sedula me nutrix altas quoque ducit in aedes,
 98 erramusque vago per loca sacra pede ;
 99 et modo porticibus spatior modo munera regum
 100 miror et in cunctis stantia signa locis.
 101 Miror et innumeris structam de cornibus aram
 102 et de qua pariens arbore nixa dea est,
 103 et quae praeterea (neque enim meminive libetve
 104 quidquid ibi vidi dicere) Delos habet.
 105 Forsitan haec spectans a te spectabar, Aconti,
 106 visaque simplicitas est mea posse capi.
 107 In templum redeo gradibus sublime Dianae ;
 108 tutior hoc ecquis debuit esse locus ?
 109 Mittitur ante pedes malum cum carmine tali...
 110 Ei mihi ! juravi nunc quoque paene tibi.
 111 Sustulit hoc nutrix mirataque "perlege" dixit.
 112 Insidias legi, magne poeta, tuas.
 113 Nomine conjugii dicto confusa pudore,
 114 sensi me totis erubuisse genis
 115 luminaque in gremio veluti defixa tenebam,
 116 lumina propositi facta ministra tui.
 117 Improbe, quid gaudes aut quae tibi gloria parta est,
 118 quidve vir elusa virgine laudis habes ?
 119 Non ego constiteram sumpta peltata securi,
 120 qualis in Iliaco Penthesilea solo ;
 121 nullus Amazonio caelatus balteus auro,
 122 sicut ab Hippolyte, praeda relata tibi est.
 123 Verba quid exultas tua si mihi verba dederunt,
 124 sumque parum prudens capta puella dolis ?
 125 Cydippen pomum, pomum Schoeneida cepit ;
 126 tu nunc Hippomenes scilicet alter eris ?
 127 At fuerat melius, si te puer iste tenebat,
 128 quem tu nescio quas dicis habere faces,
 129 more bonis solito spem non corrumpere fraude ;
 130 exoranda tibi, non capienda fui.
 131 Cur, me cum peteres, ea non profitenda putabas,
 132 propter quae nobis ipse petendus eras ?
 133 Cogere cur potius quam persuadere volebas,
 134 si poteram audita condicione capi ?
 135 Quid tibi nunc prodest jurandi formula juris
 136 linguaque praesentem testificata deam ?
 137 Quae jurat, mens est. Nil conjuravimus illa ;
 138 illa fidem dictis addere sola potest.
 139 [Consilium prudensque animi sententia jurat,
 140 et nisi iudicii vincula nulla valent.]
 141 Si tibi conjugium volui promittere nostrum,
 142 exige polliciti debita jura tori.
 143 Sed si nil dedimus praeter sine pectore vocem,
 144 verba suis frustra viribus orba tenes.
 145 Non ego juravi ; legi jurantia verba ;
 146 vir mihi non isto more legendus eras.
 147 Decipe sic alias, succedat epistula pomo.
 148 Si valet hoc, magnas ditibus aufer opes ;

149 fac jurent reges sua se tibi regna duros,
 150 sitque tuum toto quidquid in orbe placet.
 151 Major es hoc ipsa multo, mihi crede, Diana,
 152 si tua tam praesens littera numen habet.
 153 Cum tamen haec dixi, cum me tibi firma negavi,
 154 cum bene promissi causa peracta mei est,
 155 confiteor, timeo saevae Latoidos iram
 156 et corpus laedi suspicor inde meum.
 157 Nam quare, quotiens socialia sacra parantur,
 158 nupturae totiens languida membra cadunt ?
 159 Ter mihi jam veniens positas Hymenaeus ad aras
 160 fugit et e thalami limine terga dedit,
 161 vixque manu pigra totiens infusa resurgunt
 162 lumina, vix moto corripit igne faces.
 163 Saepe coronatis stillant unguenta capillis
 164 et trahitur multo splendida palla croco.
 165 Cum tetigit limen, lacrimas mortisque timorem
 166 cernit et a cultu multa remota suo,
 167 et pudet in tristi laetum consurgere turba,
 168 quique erat in palla, transit in ora rubor ;
 169 proicit ipse sua deductas fronte coronas
 170 spissaque de nitidis tergit amoma comis.
 171 At mihi vae ! miserae torrentur febribus artus
 172 et gravius justo pallia pondus habent.
 173 Nostraque plorantes video super ora parentes
 174 et face pro thalami fax mihi mortis adest.
 175 Parce laboranti, picta dea laeta pharetra,
 176 daque salutiferam jam mihi fratris opem.
 177 Turpe tibi est, illum causas depellere leti,
 178 te contra titulum mortis habere meae.
 179 Numquid, in umbroso cum velles fonte lavari,
 180 imprudens vultus ad tua labra tuli ?
 181 Praeteriine tuas de tot caelestibus aras,
 182 aque tua est nostra sprete parente parens ?
 183 Nil ego peccavi, nisi quod perjuriam legi
 184 inque parum fausto carmine docta fui.
 185 Tu quoque pro nobis, si non mentiris amorem,
 186 tura feras ; prosint, quae nocuere, manus.
 187 Cur, quae succenset quod adhuc tibi pacta puella
 188 non tua sit, fieri ne tua possit agit ?
 189 Omnia de viva tibi sunt speranda ; quid aufert
 190 saeva mihi vitam, spem tibi diva mei ?
 191 Nec tu credideris illum, cui destinor uxor,
 192 aegra superposita membra fovere manu.
 193 Adsidet ille quidem, quantum permittitur, ipse
 194 sed meminit nostrum virginis esse torum.
 195 Jam quoque nescio quid de se sensisse videtur ;
 196 nam lacrimae causa saepe latente cadunt,
 197 et minus audacter blanditur et oscula rara
 198 appetit et timido me vocat ore suam.
 199 Nec miror sensisse, notis cum prodar apertis ;
 200 in dextrum vector, cum venit ille, latus
 201 nec loquor et tecto simulatur lumine somnus,
 202 captantem tactus reicioque manum.
 203 Ingemit et tacito suspirat pectore, me quod
 204 infensam, quamvis non mereatur, habet.
 205 Ei mihi, quod gaudes et te juvat ista voluntas !
 206 Ei mihi, quod sensus sum tibi fassa meos !

207 Si mihi lingua foret, tu nostra justius ira,
208 qui mihi tendebas retia, dignus eras.
209 Scribis ut invalidum liceat tibi visere corpus :
210 es procul a nobis, et tamen inde noces.
211 Mirabar quare tibi nomen Acontius esset ;
212 quod faciat longe vulnus, acumen habes.
213 Certe ego convalui nondum de vulnere tali,
214 ut jaculo scriptis eminus icta tuis.
215 Quid tamen huc venias ? Sane miserabile corpus
216 ingenii videas magna tropaea tui !
217 Concidimus macie ; color est sine sanguine, qualem
218 in pomo refero mente fuisse tuo.
219 Candida nec mixto sublucent ora rubore ;
220 forma novi talis marmoris esse solet ;
221 argenti color est inter convivia talis,
222 quod tactum gelidae frigore pallet aquae.
223 Si me nunc videas, visam prius esse negabis :
224 "Arte nec est, dices, ista petenda mea",
225 promissique fidem, ne sim tibi juncta, remittes
226 et cupies illud non meminisse deam.
227 Forsitan et facies jurem ut contraria rursus,
228 quaeque legam mittes altera verba mihi.
229 Sed tamen adspiceres vellem, prout ipse rogabas,
230 et discas sponsae languida membra tuae.
231 Durius et ferro jam sit tibi pectus, Aconti,
232 tu veniam nostris vocibus ipse petas.
233 Ne tamen ignores, ope qua revalescere possim,
234 quaeritur a Delphis fata canente deo.
235 Is quoque nescio quam, nunc ut vaga fama susurrat,
236 neglectam queritur testis habere fidem.
237 Hoc deus et vates, hoc et mea carmina dicunt.
238 A ! desunt voto numina nulla tuo.
239 Unde tibi favor hic ? nisi si nova forte reperta est,
240 quae capiat magnos littera lecta deos.
241 Teque tenente deos, numen sequor ipsa deorum
242 doque libens victas in tua vota manus.
243 [Fassaque sum matri deceptae foedera linguae
244 lumina fixa tenens plena pudoris humo.]
245 Cetera cura tua est ; plus hoc quoque virgine factum,
246 non timuit tecum quod mea charta loqui.
247 Jam satis invalidos calamo lassavimus artus,
248 et manus officium longius aegra negat.
249 [Quid nisi, si cupio mihi jam contingere tecum,
250 restat ? Ut adscribat littera nostra "Vale".]